

中東戰紀本末三編

Final supple
The History of
Russia

China and Japan
1894-5

Whole No Vols. 1

DS
765
.A56x

UNIVERSITY OF
ILLINOIS LIBRARY
AT URBANA-CHAMPAIGN
ASIAN

中東戰紀本
末三編四卷

光緒庚子正月簡盦署

上海廣學會譯著圖
書集成局鑄鉛校印
稟明官署翻刻必究

012761
24.8.45

中東戰紀本末三編弁言

僕作中東戰紀本末初編甫出萬衆爭觀更有竊取以印行者西人比之穿窬非苛論也況更有去精華而存糟粕者尤爲可恨既已稟官立案從嚴懲罰復念初編八卷多據當時西報之所傳述核諸戰事實容或失真既而天津郵示征東電報全文爰本之而作續編且復證以官書佐以拙論成書四卷與初編體例從同荏苒年餘而得英兵部礮兵司主事蒲雷東方觀戰紀實七章不禁爲之雀躍按照西方規制凡遇各國交戰必有隨軍載筆之人衆皆視爲清流卽共信爲篤論顧其人又分三種報館之採風使者有膽有識躬蹈險地軍事雖瞬息千變往往電函交屬馳報於各本館主筆案頭於是成京累兆之人皆翹首以盼消息此其一也兵部海部司員熟嫻軍旅之學或寄跡元戎幕府或追蹤裨將行營確考軍情詳查戰狀貴遲而賤速崇實而黜虛各國之中樞於以折衷至當此又其一也僕作中東戰紀本末類皆取裁於第一種人而此第二種人者率由舊章心清眼慧既熟審中東兩國水陸軍政之利鈍將帥運籌之優絀復灼知士卒若干衆船艦若而號軍行之分合何若戰地之夷險何如更繪輿圖并察清冊一一報其本部較於指上螺紋部臣則總匯一函稿如束筭授諸兼備三長之選刪繁就簡扶質數文勒爲成書移交議院議院復慎擇輕裘緩帶之議士精心讐覈尋諸聚聚英國以軍威雄天下於此彌復究

心特取蒲雷主政所編定作官書以爲萬世之法戒蓋中東戰紀之翔實無有能逾於斯者矣猶憶法德之役俄突之役皆近年戰禍之尤亟者英國皆有似此等作傳之列國人無閒言曾是中東略有影響爰與上海蔡芝絨徵士爾康詳慎綃譯期與半字之出入芝絨固深於華文者也譯錄既成愜心貴賞遂重爲中東戰紀本末三編之刻惟是中國頒行新政實爲救華之善策轉敗爲勝在此一舉因屬芝絨陸續選刊奏議章程之屬更冠之以綸綍用示尊王復得駐華之美使繳來往議和電報駐英法之華使館議戰議守議和諸電報官文書中卓卓可信斷推此種既已類列第二卷復於第四卷中雜取拙作各臆說與夫傳譯西人之議論彙爲一編猶初志也剗剗卒業述其緣起合諸初續二編蓋共爲十有六卷而以文學興國策兩卷殿焉質諸君子或亦有取乎爾則僕等三載之苦心庶不至付諸流水矣乎

光緒二十有六年歲在庚子王正月西歷一千九百年二月大美國林樂知榮章甫自序於上海虹口寓廬

中東戰紀本末三編

中東戰記本末三編目錄

卷之一 合正續編
爲卷十三

諭旨

遵議機造土貨暫緩重稅疏

草莽臣膽
總理衙門

機造貨物懇緩加稅疏

楚督張之洞
禮部堂官

遵議開辦京師學堂情形疏

工部堂官

議准考試時務策論疏

禮部堂官

遵議各省添設學堂辦法疏

總理衙門

議准試策引用

本朝人名疏

戶部堂官

救時揭要疏

新疆巡撫陶模

請免加征土藥稅釐疏

東撫李秉衡

遵議撫請免加土藥稅釐事宜疏

戶部堂官

議覆變通土藥稅章片

戶部堂官

酌定寶星式樣疏

總理衙門

遵議開設經濟特科疏

總理衙門

請飭各省具報釐稅實數疏

戶部堂官

續借英商款訂立合同疏

總理衙門

遵議改定武試新章疏

軍機大臣

議駁順天府呈請改武科章程片

軍機大臣

請准辦津鎮鐵路疏

總理衙門

遵議各省自闢利源事宜疏

戶部堂官

晉省籌辦礦務擬先修鐵路疏

西撫胡聘之

請斟酌舊制釐正文體疏

御史楊深秀

上海廣學會校刊西官署立案翻刻必究

議開晉邊蒙地疏

西撫胡聘之

遵旨籌辦京師大學堂事宜疏

總理衙門

遵議優獎開物成務才事宜疏

總理衙門

遵議經濟特科詳細章程

總理衙門

籌辦大學堂請簡派教習疏

吏部孫家鼐

遵議五城添立小學堂事宜疏

管學大臣

遵議推廣學堂月課章程片

管學大臣

浙江省城專設書院兼課中西疏

浙撫廖壽豐

請妥議新章並造就通籍人才疏

湖廣總督湖南巡撫

奏陳籌辦大學堂大概情形疏

管學大臣

遵旨詳議變通武科疏

楚督張之洞

遵議特派商務大臣游歷事宜疏

總理衙門

遵議遴選生徒游學日本片

總理衙門

變法自強宜謀定後動疏

協辦孫家鼐

遵議鄉會試詳細章程疏

禮部堂官

請裁鄉試算學中額片

禮部堂官

遵議晉省礦辦法並改訂章程疏

總理衙門

遵旨覆陳籌造南北鐵路情形疏

理盛宣懷

請酌改兼使片

總理衙門

遵議貨改照貨徵稅事宜疏

總理衙門

譯書局纂各書並請嚴禁悖書疏

管學大臣

遵旨回奏並請斥逐章京疏

禮部許應騷

特參黨逆焚聽言官並陳主劣蹟疏

監察御史文悌

卷之二合正續編

為卷十四

英兵部礮兵司主事蒲雷東方觀戰紀實七章

有序 附清單五件 又戰場輿地圖一

林樂知譯 蔡爾康記

第一章 論中東水陸武備

第二章 戰禍原始

第三章 紀日本第一軍朝鮮及遼南戰事

第四章 紀日本第二軍奪旅順口事

第五章 紀滿洲戰事

第六章 紀日本第二軍奪威海衛事

第七章 續紀滿洲戰事

附戰事清單五件

一兩軍總數并死亡人數 四日軍用械之數并餉需

二日本死傷病人總數 五日本軍行日記

三中國失艦記數 另輿地圖

節錄中日議和往來轉電大略

北美署鈔

節錄中英往來官電

倫敦使館錄

奉使英法辦事公牘

英使館錄

丁汝昌遺墨

有序并跋

日石印本

李肅毅伯奏議

蓮池書院印本

補不足齋詩鈔

鄞黃家鼎

覆奏海軍統將疏

據實陳奏軍情疏

廳齋銷夏六首

大東講戰狀疏

海軍懲勸章程片

秋感六首

彙覆

鐵路電報等事疏

赴俄致賀正使謝恩疏

感事六首

請命李經方隨往外洋片

卷之三 合初續編
爲卷十五

清韓通商條約

官 文書
通行本

俄日協治朝鮮兩約

林樂知譯
蔡爾康記

朝鮮稱帝全案

蔡爾康鈔

光緒廿年 中續訂
英續訂 緬界約 有序

蔡爾康鈔

光緒廿三年

中續議
英續議 緬條約

蔡爾康錄

擬辦鐵路說帖 呈總署

津盛宣懷
道盛宣懷

蘆漢鐵路行車合同

中路局訂

粵漢鐵路合同

美公司訂

擬定津鎮鐵路章程

江蘇
道員 容閣

四川礦局設立 公招開
司鐵煤 礦章程

保富公司
福安

公議中國通商銀行大概章程

銀行總董

詳籌妥議銀行章程 呈總署

常盛宣懷

郵政局章程註解 并序

總稅
務司 赫德

遵議經濟特科詳細章程

總理衙門

謹擬鄉會試詳細章程

禮部堂官

遵議優獎 開物
成務 人才事宜清單

總理衙門

會議武試章程

軍機大臣

遵議京師大學堂詳細章程

軍機大臣
總理衙門

京師大學堂條規

管學大臣

京師大學堂禁約

管學大臣

奏定給發昭信股票詳細章程

戶部堂官

變通武科謹擬管見

皖鄧華熙
撫鄧華熙

變通武科謹抒管見

豫
撫 劉樹堂

變通武科擬聯 學堂營制
科舉爲一 章程

御史楊福臻

請約量變通成例條陳

進呈書籍呈詞

請開北方利源總公司條議

派委總辦商務局札文

新設時務學堂招考學生示

附跋

至理名言

其三

其五

勸辦蠶桑示

通飭墾荒札

駁斥粵商請撤郵政局稟批

內河行駛小輪船照會

分飭會照咨送特科有請咨北札

湖北巡撫曾鈺	湖南巡撫黃紹箕	道員姚文棟	楚督張之洞	湘撫陳寶箴	湘撫陳寶箴	知縣陳某盛綸	安方連軫	府松陳通聲	府松陳通聲	粵岑春煊	廣州關稅司	總理衙門	道張佩緒
--------	---------	-------	-------	-------	-------	--------	------	-------	-------	------	-------	------	------

謹擬審官定職事宜

變通圖法呈詞

振興商務詳文

自強學堂肄業生不給膏示

嚴斥請釋周漢批詞

其二

其四

路工應用地段不准居奇示

除茶弊以興茶利札文

上海道擬設華洋官報稟批

擬趕築粵漢鐵路取道南稟詞

薦舉經濟特科稟牘并批

致賀品物清單

主事蔡鎮藩	章京劉慶汾	江海關道蔡鈞	楚督張之洞	湘撫陳寶箴	東撫張樹梅	知縣孟慶雲	湖北督撫	江督劉坤一	江督劉坤一	督劉坤一	湘鄂粵商	道張佩緒	京鈔送本
-------	-------	--------	-------	-------	-------	-------	------	-------	-------	------	------	------	------

俄國代計華人數目單

譯俄都報

中國通商口岸名單

日本新報

卷之四

合初續編
爲卷十六

富有大業日新盛德解

蔡爾康作

中俄訂約論

譯英國報

謙公誠說

林樂知著
蔡爾康譯

上合肥傳相書

有跋

瑞宋存禮

東撫導民方命論

附論某撫
違約虐民

林樂知著

中國度支考序

上海蔡爾康

中國度支考跋

林樂知作
任廷旭譯

教化階梯衍義序

上海蔡爾康
美林樂知
滬蔡爾康

戒纏足錄序

闕孔令偉

戒纏足叢說叙

宜梁亨吉

戒纏足叢說跋

上海蔡爾康

英興記序

蔡爾康著

李傅相歷聘歐美記序

林樂知作
蔡爾康述

新學規制考叙

林樂知作
任廷旭述

帝王初學自序

李提摩太

新學彙編序

李提摩太

創議設立女學堂啟

上海同人

書南闈監臨趙侍郎告示後

并跋

美林樂知

歐洲慎戰論

林樂知譯
蔡爾康作

尊德性道問學一以貫之說

并引

李思倫白
滬蔡爾康

論意

李提摩太
蔡爾康譯

貸銀築路合記

蔡爾康稿

三哀私議以廣公見論上并引附跋

林同譯著

又中并記

爽目子撰

又下并序

前人同錄

衛足說

番禹愚叟

俄榮示險於天下尤險於華論英論

樂知譯意爾康撰文

哀公電以察私見篇并敘

林樂作知蔡爾康譯

本廣學會第十一屆年報記略

李提摩太蔡爾康譯

送林榮章先生暫歸美國序

蔡爾康撰

喜林榮章進士重來上海詩

縷馨僊史

中東戰紀本末三編卷之一

合初續編
爲卷十三

美國林樂知審訂

上海蔡爾康茶錄

諭旨

上諭。三載考績。爲國家激揚大典。中外滿漢諸臣。有能恪供職守。勞勩最著者。允宜特加甄叙。以示優眷。茲當京察屆期。吏部開單題請。朕詳加披閱。恭親王。勳勞懋著。夙矢公忠。首佐樞廷。贊襄匡弼。靖共夙夜。夾輔深資。著交宗人府從優議敘。禮親王。世鐸。協辦大學士。吏部尚書。李鴻藻。戶部尚書。翁同龢。工部尚書。剛毅。都察院左都御史。錢應溥。夙夜從公。和衷共濟。盡心籌畫。倍著慎勤。均著交該衙門議敘。大學士。李鴻章。久資倚任。勞瘁不辭。著交部議敘。直隸總督。王文韶。宣勤畿輔。籌畫精詳。著開復降三級留任處分。兩江總督。劉坤一。老成練達。重任克膺。著交部議敘。餘著照舊供職。欽此。光緒二十三年正月二十五日

上諭。本年輪應查閱福建浙江廣東廣西四省營伍之期。福建卽派邊寶泉。浙江卽派廖壽豐。廣東卽派譚鍾麟。廣西卽派史念祖。認真查閱。各省營伍。關係緊要。國家養兵。歲糜鉅帑。原以備禦侮折衝之用。近來各省督撫。循例校閱。往往視爲具文。以致武備日形廢弛。殊屬有負委任。茲特再行申諭。各該督撫。務當逐一簡校。如有技藝荒疏。老弱充數。及軍實不齊等弊。卽將該管將弁。據實糾參。毋得稍涉瞻徇。欽此。

中東戰紀本末

三編卷一 諭旨

廣學會校刊

二月初二日

上諭。張蔭桓現在出差。

謹按英后帝於道光十七年丁酉即西歷一千八百三十七年即位積算至光緒二十三年丁酉即一千八百九十七年適值花甲一周舉行慶典張樵野少司

農奉旨往賀戶部左侍郎兼管三庫事務著徐用儀兼署。欽此。十八日

上諭。前任熱河都統崇禮。工部尚書許應驥。均著在總理各國事務衙門行走。欽此。二十日

上諭。御史宋伯魯奏。奉旨交議事件。請飭各部院。毋得輕心駁斥等語。向來。臣下條陳事件。奉旨交該管各部院議奏。自應準情度理。斟酌盡善。固不得偏執成見。概行議駁。亦豈得不論可否。率行議准。嗣後。遇有交議事件。各該衙門務當權衡事理。秉公定議。至陳奏各員。亦不應逞其臆見。形諸奏牘。是非所在。自難逃朝廷洞鑒也。欽此。二十一日

上諭。步軍統領衙門奏。拿獲冒稱招集商股。議修鐵路人犯。請交部審辦一摺。已革武舉李福明。本係因案擬徒。遞籍管束之犯。今復潛行來京。並刊刻章程知單等件。到處傳送。藉端招搖。實屬大干例禁。著交刑部。嚴行審訊。按律懲辦。餘依議。該衙門知道。欽此。三月二十日

上諭。致仕大學士張之萬。老成練達。學問優長。由道光丁未科一甲一名進士。授職修撰。入直上書房。疊受

先朝知遇之隆。洊擢卿貳。敷歷封圻。勲勞卓著。朕御極後。宣召來京。簡任要職。參預機務。晉贊綸扉。服官五十餘年。謹慎小心。克稱厥職。上年因病。歷次奏請開缺。疊經寬予假期。俾得從容調理。嗣因籲懇。肫切准其致仕。並賞食全俸。方冀長承恩眷。克享期頤。茲聞溘逝。悼惜殊深。著賞給陀羅經被。派郡王銜貝勒載濂。帶領侍衛十員。卽日前往奠醊。晉贈太保。照大學士例賜卹。入祀賢良祠。任內一切處分。悉予開復。應得卹典。該衙門察例具奏。敬按張子青中堂賜諡文達靈柩回籍時。並著沿途地方官。妥爲照料。伊子刑部員外郎張瑞蔭。著俟服闋後。以本部郎中補用。伊孫張元驥。著賞給舉人。准其一體會試。用示篤念耆臣至意。欽此。
五月十六日

上諭。協辦大學士吏部尙書李鴻藻。守正不阿。忠清亮直。由翰林荷

先朝特達之知。入直上書房。同治元年。欽奉

懿旨。在弘德殿授讀。

穆宗毅皇帝恩禮優加。洊擢卿貳。

簡授軍機大臣。朕御極後。晉贊綸扉。先後三十餘年。辦理一切事宜。擘畫精賅。殫心竭力。前因患病。疊次賞假。諭令安心調理。方冀醫治就痊。長資倚畀。遽聞溘逝。悼惜殊深。著賞給陀羅經被。派貝勒載濂。帶領

侍衛十員。卽日前往奠醊。加恩予諡文正。晉贈太子太傅。照大學士例賜卹。入祀賢良祠。任內一切處分。悉予開復。應得卹典。該衙門查例具奏。靈柩回籍時。著沿途地方官。妥爲照料。伊子刑部員外郎李煜瀛。一品廕生李煜瀛。均著賞給郎中。伊孫李宗侗。著賞給舉人。准其一體會試。用示篤念靈臣至意。欽此。月

初三日

上諭朕欽奉

慈禧端佑康頤昭豫莊誠壽恭欽獻崇熙皇太后懿旨。協辦大學士吏部尚書李鴻藻。秉性忠誠。自贊襄樞務以來。深資倚畀。去年患病。尙復力疾從公。本年春間。因腿疾增劇。迭次請假調理。深宮時殷。廕系特派御醫診視。賞給藥餌。並派員前往看視。方冀就痊。長承恩眷。遽聞溘逝。軫惜殊深。著派郡王銜貝勒載澐。帶領侍衛十員。卽日前往賜奠。用示篤念耆臣至意。欽此。初四日

上諭吏部尚書著孫家鼐調補。禮部尚書著許應騤調補。工部尚書著錢應溥補授。都察院左都御史著廖壽恆補授。欽此。初五日

上諭李鴻章著派充武英殿總裁。欽此。同日

上諭都察院左都御史廖壽恆。著仍在總理各國事務衙門行走。欽此。初九日

上諭春秋之義日食必書況值歲首履端歷代引爲

天戒我朝康熙乾隆年間正旦日食曾經再見茲據欽天監題奏二十四年正月初一日日食朕寅畏之餘允宜參稽

成憲明年元旦於乾清宮受禮不御太和殿受賀停止宗親筵宴將屆日食時卽換常服仍於內殿恭設香案虔申祈禱用答

昊蒼垂警之至意至

慈甯宮慶賀係尊養隆儀普天錫福自應照例舉行著各該衙門敬謹預備欽此

八月初二日

西報云一千八百九十八年正月廿一號

光緒二十四年戊戌元旦

亞洲日有食之惟印度獨見爲日食既各國之

善於推步者無不豫測而先知惟西士講求真實无妄之至理恆謂天下萬事萬物之繁賾各具至真至實之機緘向者人特苦於不知耳泰西格致之學愈研究卽愈精深豈素隱行怪比哉苟得其真且實者推暨及於五洲萬國盡化其異同門戶之私不若立教之各尊所聞講道之互宗所尙真可斥爲僞實可指爲虛也夫天文其顯著者也天之有日且其最大者也是以談天之士多懷就日之誠所惜皎皎日輪陽光四射縱有各種儀器罕能細審全形今幸印度有食既之祥各國格致會中特具貲斧

分請專究天文之名士束裝東渡諸名士更視爲難得之機會彼此互相函約各攜祕製諸儀器冀合衆力而定一圖又考印度天時一年約僅兩雨當此冰華凜冽正逢玉宇澄清斷不虞雲黯風霾偶蔽一盤之赤玉益復興高采烈樂此不疲屆時選佛古場將成爲窺兄新地矣至於是日之食斐洲日甫東出見其初虧蓋月行之軌道斜界地與日之中斐洲人仰視日球略爲月掩也既而月球向東行過印度洋之上以次移至孟買日球被掩愈多月球復向東北行至印度加刺吉打都城正影當空日光盡爲月掩計圍徑英程五十里華程百五十里之間繁星遍見於長空飛鳥爭求夫故壘凡史策所書之日食晝晦當未有甚於此時者矣彼測日之諸名士卽就其地分布儀器潛心默究并於月球之將至迤邐以至去盡而日復圓隨時就攝影鏡分照各圖以俟衆人之質證吾輩雖不諳天學亦可披圖冥索冀免扣槃捫燭之誚何幸如之又據推步家言月球過加刺吉打後直走亞洲東境至黑龍江上游再出大洋亞洲各國皆見之惟不若印度之見其食旣耳迨月球自太平洋而至美國已值中夜其人必全不知有日食事

按是年七月朔日卽西歷一千八百九十七年七月廿九號美國日有食之亞洲亦不之見也

林樂知蔡爾康同附譯

上諭翁同龢著以戶部尙書協辦大學士欽此

十五日

上諭禮部奏遵議御史潘慶瀾奏請將已故總兵之母旌獎一摺已故總兵鄧世昌恪遵母訓移孝作忠

力戰捐軀。死事最烈。伊母郭氏。訓子有方。深明大義。著賞給匾額一方。交譚鍾麟等轉給收領。以示旌獎。
欽此。二十四日

上諭。朕欽奉

慈禧端佑康頤昭豫莊誠壽恭欽獻崇熙皇太后懿旨。本年十月初十日。萬壽慶辰。在頤和園排雲殿受賀。欽此。是日。宣表行禮。朕親進表文。初八日。朕率領王公百官。詣

仁壽殿筵宴。初九日。皇后率領內廷公主福晉命婦。詣

仁壽殿筵宴。所有應行典禮。著各該衙門。敬謹預備。欽此。九月初十日

諭旨。本年十月初十日。恭逢

慈禧端佑康頤昭豫莊誠壽恭欽獻崇熙皇太后萬壽慶辰。欽奉

懿旨。在頤和園慶賀筵宴。所有應行典禮。派恭親王慶親王奕劻。會同禮部內務府。敬謹辦理。欽此。同日

上諭。江蘇蘇松太道員缺。著蔡鈞補授。欽此。十四日

上諭。朕欽奉

慈禧端佑康頤昭豫莊誠壽恭欽獻崇熙皇太后懿旨。此次。恭親王等承辦慶辰典禮。妥慎周詳。恭親王

弈訢著賞給御書錫福宣猷匾額一方。御筆長壽字一張。通玉如意一柄。帶膝貂褂一件。金壽字緞四疋。慶親王奕劻著賞給御筆長壽字一張。通玉如意一柄。帶膝貂褂一件。金壽字緞二疋。欽此。十月十日上諭。此次。

慈禧端佑康頤昭豫莊誠壽恭欽獻崇熙皇太后萬壽慶辰。宗親筵宴。綵衣進舞之近支王公。恭親王奕訢。慶親王奕劻。均著交宗人府從優議叙。醇親王載灃。端郡王載漪。郡王銜貝勒載瀛。載灃。貝勒載澐。溥偉。均著於常年俸銀外。加賞銀五百兩。貝勒銜貝子奕謨。貝子溥倫。鎮國公載澤。載洵。不入八分輔國公載瀾。載濤。不入八分輔國公銜鎮國將軍載瀛。頭品頂戴鎮國將軍溥儀。鎮國將軍溥侗。頭品頂戴載溥。二品頂戴溥倬。均著賞給三鑲玉如意一柄。蟒袍一件。欽此。同日。

上諭。上年瞻對番官越境滋事。當諭令鹿傳霖秉公查辦。以息爭端。乃該番官膽敢抗違。經鹿傳霖派兵剿辦。並請收回地方。原屬咎由自取。朝廷因該僧番等世受國家深仁厚澤。豈竟自外生成。恐鹿傳霖操之過感。未足以折服其心。特令鹿傳霖開缺。改派恭壽署理督篆。諭令持平辦理。茲據奏稱。當鹿傳霖派兵進剿之時。該番官等並非有意抗拒。因見大兵臨境。疑懼不敢投案。仍復固守本地。乃鹿傳霖誤聽帶兵官一面之詞。遂謂其叛形昭著。是以有改土歸流之議。茲據達賴喇嘛在理藩院呈請賞還地方。並覽

該署督此次所奏各節。是該番官並無悖逆情事。尙屬可信。朝廷軫念僧番。豈肯以跡近疑似。遽行收回其地。所有三瞻地方。仍著一律賞給達賴喇嘛收受。毋庸改土歸流。達賴喇嘛當仰體朝廷怙冒之仁。知感知畏。力圖自新。卽著慎選番官。嚴加約束。無得再有苛虐瞻民。侵擾鄰境情事。致干罪戾。其一切善後事宜。著恭壽妥爲辦理。以期永遠相安。至德愛格忒朱高竹谷巴塘亨等案。仍著該署督盡心妥籌。次第辦理。另片奏鄂刪什土司爭襲一案。現據該署督將土官釋放。并派員前往。確切查辦。亦尙中肯。著卽從速辦理。毋稍遷延。欽此。十一月初九日

上諭。李秉衡著開缺。四川總督著裕祿補授。欽此。十八日

硃筆。盛宣懷補授大理寺少卿。欽此。十二月初一日

上諭。甘肅提督董福祥著加恩在紫禁城內騎馬。欽此。初二日

上諭。徐樹銘奏請飭各省舉行蠶政等語。蠶政與農功並重。浙江湖北直隸等省均已辦有成效。各省出蠶之地尙多。著各督撫飭令地方官認真籌辦。以廣利源。欽此。初七日

上諭。前因山東鉅野縣地方有盜匪拒捕傷斃教士之案。業將兇犯分別懲辦矣。開缺四川總督前巡撫李秉衡身任地方。不能先事預防。以致釀成巨案。著交部議處。兗沂曹濟道錫良。曹州鎮總兵萬本華。曹

州府知府邵承照一併交部議處。鉅野縣知縣許廷瑞緝捕廢弛稟報遲延。著卽革職。壽張縣有教堂被劫。該縣知縣莊維烈著卽查參。其餘濟甯荷澤單縣城武等州縣亦有民教相爭者。該州縣官著分別撤調。山東係禮樂名邦。士夫服習儒術。素知自重。至草野愚民間有不明事理甚或毆辱教士毀壞教堂此風斷不可長。著該地方官嚴行禁戢實力保護並著通諭各省將軍督撫等嗣後如有藉鬧教堂爲名聚衆生事者卽遵光緒十七年六月諭旨辦理倘仍因循玩忽定行嚴加懲處決不寬貸。欽此。二十三日

上諭國家設官分職體制相維各部院堂官同辦一事無論重大之件必須互相商權折衷至當卽尋常應辦事件亦必彼此商酌方昭妥協近聞各部院堂官每多性耽安逸意存推諉並不常川入署卽有一二勤慎趨公者亦無從面相參酌以致公事積壓弊竇叢生奉旨交議事件覆奏亦多濡滯以此玩愒因循尙復成何事體嗣後各部院堂官務當常川進署振刷精神將一切應辦之事和衷參酌督飭司員迅速辦理毋得稍有遲延至部院衙門胥吏弄文舞弊習爲故常承辦司員往往受其挾制尤宜實力整頓從嚴懲辦毋稍姑容將此通諭知之欽此。二十日

上諭自中東一役以來中外諸臣競言自強之術二年於茲矣現在事機日迫一遇各國交涉之事無不萬分棘手總緣窺我武備廢弛船礮不齊以致強鄰狡焉思啟合以謀我目下欲圖自強自以修明武備

爲第一要義。惟是出入兩款。不數甚鉅。前曾諄諭各該省將軍督撫。嚴杜釐金中飽。汰減練兵冗數。旋據陸續覆奏。並未將釐金中飽之數。和盤托出。所裁兵勇。亦未確查空額。茲據剛毅面奏。今天下之急。莫如練兵籌餉。練兵須練可用之兵。籌餉須籌常年之餉。卽如國初。取民有制。旣無釐金。又無雜稅。而未嘗患財不多。兵不强。今有釐稅及洋藥土藥等課。每年增入三千餘萬之多。而財轉不敷用者。蓋因廣取濫用。漫無限制。故也。今欲籌兵餉。先由戶部查明咸豐三年以前。歲入歲出之款。原有入款。不准欠。原有出款。不必裁。三年以後。續增入款。曰釐金。曰雜稅。曰洋關。曰土藥。續增出款。曰勇餉。曰購械。曰各項經費。近年又有還借洋款一節。應由戶部查明續增入款。共有若干。續增出款。共有若干。可裁則裁。可減則減。務將練勇之空額開除。釐金之中飽嚴杜。餘如鹽場糜費。冗員薪水。出使經費。機器各局雜支。均釐定數目。不許濫支濫銷。庶鉅款不至難籌等語。所奏尙屬切實。當此需款孔亟之時。部臣疆臣。自應不分畛域。竭力圖維。外省用款。疆吏實總其成。著嚴飭在事各員。釐剔弊端。力除中飽。尤須正己率屬。以期大法小廉。應如何認真綜核。集成鉅款。是在該將軍督撫等。激發天良。認真整頓。應卽詳細確實覆奏。至於嚴查兵勇缺額。疊經通諭各省。不啻三令五申。昨復據徐桐摺奏。請飭沿江沿海各督撫。激厲忠義。聯絡鄉團。將備之疲輟者。速卽更換。營勇之缺弱者。趕緊募補。減綠營無用之卒。以養戰士。調內地屯防之旅。以固海疆。

各省將官。有老於兵事。緩急可恃者。無論官職大小。現任退閒。准其一律奏調等語。所奏尤爲當務之急。著卽迅速籌辦。如有知兵之員。爲該將軍督撫等。素所深悉者。并准其保奏。以備干城之選。將此由四百里通諭知之。欽此。同日

上諭。榮祿奏。請設武備特科。參酌中外兵制。造就人才等語。著軍機大臣。會同兵部議奏。欽此。二十日

上諭。從來國運之興。必由於人才之盛。我朝

列祖

列宗御宇。無不下詔求賢。而諸臣亦必灼見真知。始登薦剡。所以名臣碩輔。代有其人。卽至同治年間。如曾國藩。駱秉章等。臚舉賢才。或拔自幕中。或選從僚屬。彼時。人才蔚起。足能削平大難。宏濟時艱。可知封疆大吏。誠忌以人事君之益。悉心採訪。實力保舉。則一時之才。自足副一時之用。現值時局孔艱。需才尤急。各省督撫。朝廷寄以股肱耳目。其各澄心虛己。一秉至公。於所屬道府州縣中。無論現任候補。詳加鑒別。其有居心正大。立論宏通。能力任時艱者。列爲上選。他若盡心民事。通達時務。亦屬有用之才。均著出具切實考語。並臚列其人之實跡成效。詳悉具陳。以備擢用。倘瞻徇情面。或謬探虛聲。保非其人。必科原保官以薦舉不實之罪。至經武整軍。必須覓籌的餉。各省綠營。廢弛已久。邇來防勇亦多沾染習氣。難備

緩急著各該督撫再行核實裁汰。騰出餉項。以備添練新軍之用。各省製造洋務釐捐鹽務等局。總辦以外復有會辦。以及司事經董。名目繁多。每歲虛糜公費。不知凡幾。往往置國事於不顧。而惟爲位置閒員地步。著卽嚴加核減。將節省數目。迅速奏聞。毋得膠持成見。以爲裁無可裁。藉詞搪塞。將此通諭知之。欽此。二十
八日

上諭給事中高燮曾奏。請設武備特科一摺。著軍機大臣會同兵部。歸入榮祿奏請參酌中外兵制。特設武科片內。一併議奏。欽此。光緒二十四年
正月初十日

上諭總理各國事務衙門會同禮部奏。遵議貴州學政嚴修請設專科一摺。據稱就該學政原奏。分別酌擬。一爲歲舉。一爲特科。先行特科。次行歲舉。特科約以六事。一曰內政。凡考求方輿險要。郡國利病。民情風俗者。隸之。二曰外交。凡考求各國政事。條約公法。律例章程者。隸之。三曰理財。凡考求稅則礦產。農功商務者。隸之。四曰經武。凡考求行軍布陣。管駕測量者。隸之。五曰格物。凡考求中西算學。聲光化電者。隸之。六曰考工。凡考求名物象數。製造工程者。隸之。由三品以上京官。及督撫學政。各舉所知。無論已仕未仕。註明其人何所專長。咨送總理衙門。會同禮部。奏請在保和殿。試以策論。簡派閣卷大臣。嚴定去留。詳擬等第。覆試後。帶領引見。聽候擢用。此爲經濟特科。以後或十年一舉。或二十年一舉。候旨遵行。不爲常

例歲舉。則每屆鄉試年分。由各省學政。調取新增算學藝學各書院學堂高等生監。錄送鄉試。初場試專門題。次場試時務題。三場仍試四書文。中式者。名曰經濟科舉人。與文章舉人同場覆試。會試中式經濟科貢士者。亦一體覆試。殿試朝考等語。國家造就人才。但期有裨實用。本可不拘一格。該衙門所議。特科歲舉兩途。洵足以開風氣而廣登進。著照所請准行。其詳細章程。仍著該衙門會同禮部妥議具奏。現在時事多艱。需才孔亟。自降旨以後。該大臣等如有平素所深知者。出具切實考語。陸續咨送。不得瞻徇情面。徒採虛聲。俟咨送人數彙齊至百人以上。即可奏請定期舉行特科。以資觀感。至歲舉既定年限。各該督撫學政。務將新增算學藝學各書院學堂。切實經理。隨時督飭院長教習認真訓迪。精益求精。該生監等亦當思經濟一科。與制藝取士並重。爭自濯磨。力圖上進。用副朝廷旁求俊乂至意。將此通諭知之。欽此。

同日

上諭吏部奏遵議處分一摺。山東巡撫李秉衡於鉅野一案。事前未能防範。迨總理各國事務衙門電查始行奏報。實屬咎有應得。李秉衡著降二級調用。不准抵銷。調任袁沂曹濟道。錫良撤任曹州鎮總兵。萬本華曹州府知府邵承照均著革職留任。泰西各國傳教載在約章。該教士萬里遠來中國。官民自應加意體恤。乃山東鉅野縣竟有盜殺教士二人之案。殊堪惋惜。除凶犯按律懲辦外。准令建立教堂三處。住

房七處。以示朝廷憫念遠人至意。嗣後著張汝梅飭屬實力保護。倘再有不逞之徒。滋事肇釁。惟該地方官是問。凜之欽此。十一日

上諭。戶部奏遵議右中允黃思永奏籌備巨款。請造股票一摺。據稱。按照該中允原摺所陳。詳細參酌。擬由戶部印造股票一百萬張。名曰昭信股票。頒發中外。周年以五釐行息。期以二十年。本利完訖。平時股票准其轉相售賣。每屆還期。准其推用地丁鹽課在京。自王公以下。在外。自將軍督撫以下。無論大小文武。現任候補候選官員等。皆宜領票繳銀。以爲商民之倡。其地方商民願借者。卽責成順天府府尹及各直省將軍督撫。將部定章程先行出示。並派員到處剴切勸諭。不准稍有阻撓抑勒。其辦事之員。能借鉅款者。分別優予獎敘各等語。著依議行。當此需款孔亟。該王公以及內外臣工等。均受朝廷厚恩。卽各省紳商士民。亦當深明大義。共濟時艱。況該部所議章程。既不責以報効。亦不强令捐輸。一律按本計息。分期歸還。諒不致遲延觀望也。特此通諭知之。欽此。十四日

上諭。大學士李鴻章。徐桐。均著加恩。免其帶領引見。欽此。十五日

上諭。王公文武大員。同受朕恩。際此時事多艱。卽使勤慎趨公。力圖振作。猶恐不足以資治理。乃近來告假人員。幾於無日無之。雖其中亦實有因病陳請者。而藉詞飾說。希圖安逸之人。亦復不少。且每遇

壇

廟大祀及致祭

陵寢之差。先期請假尤多。並有分獻及各項執事人員。業經派出。臨時又復告假。承辦衙門屢次奏請改派。似此任意懈弛。安望其夙夜在公。克勤厥職耶。嗣後該王公大臣等。儻有仍蹈積習。無故告假。既派差使以後。託病請假者。經朕查出。定必予以懲處。勿謂不戒。視成也。凜之。欽此。同日

上諭。內閣侍讀學士榮慶奏。請飭培養八旗人才。認真考試一摺。各衙門司員分理庶政。旗員既須考試。漢員何獨不然。當茲時事多艱。欲求幹濟之才。自不在記誦詞章之末。惟講求時務。明習例案。亦須具有學識。始克疏通證明。嗣後各衙門滿漢司員。著各該堂官自行釐定章程。無論何項出身一體面加考試。並認真訓飭。務使究心實學。勉爲有用之才。以備朝廷器使。將此通諭知之。欽此。二十日

上諭。御史王鵬運奏。請開辦京師大學堂等語。京師大學堂迭經臣工奏請。准其建立。現在亟須開辦。其詳細章程。著軍機大臣會同總理各國事務衙門王大臣妥籌具奏。欽此。同日

上諭。侍講惲毓鼎奏。經濟特科宜議登進之途一摺。國家登進人材。必須言行相符。而後可收實效。況經濟一科。係屬特設。內外臣工。尤當仰體破格旁求之意。不得以有才無行之人。濫登薦牘。至該侍講所請

仿照從前觀政之例。以試其能等語。著總理各國事務衙門。參酌情形。奏明辦理。欽此。

同日

上諭。胡燏棻奏。酌改武科章程。請於各省府廳州縣。分設學堂教習等語。著軍機大臣。會同兵部。歸入榮祿等前奏內。一併議奏。欽此。

二十日

上諭。胡燏棻奏。請就各省現有兵餉。精練陸軍一摺。方今時局艱難。自以練兵為第一要義。各省防練各營。近來積習。如空額尅扣。攤派等弊。不勝枚舉。若不嚴行禁革。訓練必不能精。營務安有起色。至操演之法。不宜拘守成格。應如何變通盡利之處。著軍機大臣。會同督辦軍務王大臣。妥議具奏。另片奏。神機營改用新式槍礮各節。著一併議奏。欽此。

同日

上諭。戶部奏。恭親王報効庫平銀二萬兩。不敢作為借款。亦不仰邀議敘等語。恭親王懿親重臣。因國用不足。捐備鉅款。用意正大。洵足矜式百僚。其忠款之忱。朕心尤深嘉許。惟現在甫議開辦。昭信股票。一切章程。尚未奏定。恭親王首先報効。宜將此款。歸入戶部股票。一律辦理。庶幾天下嚮風。繳銀領票。更於大局多所裨益。該部即遵諭行。欽此。

二十日

上諭。裁兵節餉等事。為今日萬不可緩之圖。迭經諭飭各省將軍督撫。認真籌辦。不准藉詞搪塞。連日據魏光燾張汝梅王文韶先後奏到。詳加披閱。無非瀝陳該督撫辦事艱難。籲懇稍寬時日。或竟稱裁無可

裁減無可減。或稍有汰除。仍寥寥無幾。其於各營之廢弛缺額。俱不置詞。似此敷衍塞責。任意遲延。何日始能見諸實政。朕宵旰焦勞。臨朝太息。苟非萬不得已。豈肯裁及佳兵。無如時勢所迫。不得不先其所急。安能以有用之餉。養無著之兵。徒使不肖營員。窟宅其中。剋扣侵吞。習成慣技。督撫瞻徇情面。亦復代爲文飾。置國家大局於不顧。實堪痛恨。疆臣受恩深重。手握軍符。於分內應辦之事。尙每苦力不能舉。辦亦可謂無術之甚矣。自此次申諭之後。該將軍督撫各矢天良。悉心籌畫。經制之兵。何處可以歸併。何處可以全裁。挑練之兵。某營應行改章。某營應行遣撤。及一切糜費。應如何節省。逐一確切查明。迅速辦理。但能省一分無著之餉。即可添一分有用之兵。勉矢惻忱。朕言不再。倘或意存遷就。於可裁之兵。可節之餉。仍有不實不盡。一經查出。朕必治以抗違之罪。莫謂冊籍不符。難於綜核。外間積弊。終不能知也。將此通諭知之。欽此。二十日

上諭。御史胡孚宸奏。經濟歲科生監。請嚴定錄送章程等語。著禮部議奏。欽此。同日

上諭。本年輪應查閱山東河南江蘇安徽江西五省營伍之期。山東卽派張汝梅。河南卽派劉樹棠。江蘇卽派奎俊。安徽卽派鄧華熙。江西卽派德壽。認真查閱。各省營伍。均關緊要。豈容稍有廢弛。近來防營積習。如缺額扣餉等弊。迭經嚴行儆戒。不啻三令五申。各該撫身膺重寄。務當仰體朝廷整飭武備之至意。

逐一簡校如有技藝生疏老弱充數及軍實不齊等事卽將該管將弁從嚴參辦毋得稍涉瞻徇以肅戎行欽此。二月初一日

上諭刑部尙書廖壽恆著在軍機大臣上學習行走欽此。初十日

上諭王毓藻奏覆陳籌餉事宜一摺據稱山東東海臨清兩關關稅前經提歸公項每歲八萬餘兩此外稅款較優各關請飭認真釐剔等語關稅爲餉源大宗自應實力整頓涓滴歸公各關稅款應提充公者諒亦不少豈容經收之員任意侵匿著各該將軍督撫破除情面認真釐剔查有應行歸公之款儘數提用據實報部倘再隱匿不報卽行從嚴參處將此通諭知之欽此。十六日

上諭前據軍機大臣督辦軍務王大臣會奏請將神機營練兵挑選若干另爲選鋒營勤加訓練當經降旨依議茲據管理神機營王大臣奕劻等奏擬由神機營馬步各隊官兵內挑選萬人作爲選鋒隊督飭全營翼長教練槍礮準頭各項雜技及行軍戰陣諸法所擬尙屬切實著依議行該王大臣等務當隨時督察勤加考驗以期緩急可恃毋得有名無實致負委任餘著照所議辦理該部知道欽此。二十三日

上諭前據榮祿高燮曾胡燏棻先後奏請設立武備特科酌改章程各摺片當經諭令軍機大臣會同兵部議奏茲據該王大臣等分別准駁詳議復奏並擬定大概章程開單呈請朕詳加披閱尙屬核實可行

國家設科。武備與文事並重。原期遴選真才。以備折衝之用。現在風氣聿新。雖無庸設立特科。亦應參酌情形。變通舊制。著照該大臣等所議。各直省武鄉試。自光緒二十六年庚子科爲始。會試自光緒二十七年辛丑科爲始。童試自下屆爲始。一律改試槍礮。其默寫武經一場。著卽行裁去。所有一切未盡事宜。及各省應如何設立武備學堂之處。著該衙門隨時奏明辦理。現在時局艱難。朝廷釐定章程。專務振興實學。武場改試槍礮。亦轉移風氣之一端。嗣後主試之王大臣。及督撫學政。尤當加意講求。認真考核。務在作其忠勇。開其智識。平時則嚴督功課。校試則秉公去取。毋得奉行日久。又成具文。致負作育人材至意。該部知道。欽此。二十
六日

上諭。剛毅奏。請飭各省舉行保甲。嚴戡空糧等語。各省保甲。原爲弭盜而設。特奉行日久。不免虛應故事。至武營空糧。實爲近來惡習。既據該尙書歷陳弊竇。更應實力稽查。嚴行整頓。著各督撫。一面飭屬嚴辦保甲。聯絡漁團。一面仍飭各營。認真整頓。不得視爲具文。欽此。三月初
四日

上諭。剛毅奏。請裁冗員薪水。及各局雜支等語。各省設立辦公處所。多立名目。任意開銷。迭經諭令認真裁汰。迄無一省核實遵辦。實屬積習相沿。不知振作。著各督撫。責令藩臬兩司。將現有各局。逕行裁撤。應辦各事。歸併藩臬兩司辦理。以節糜費。毋得濫派濫支。欽此。同日

上諭朕欽奉

慈禧端佑康頤昭豫莊誠壽恭欽獻崇熙皇太后懿旨。著於閏三月二十日起。分作三日。在火器營校場。閱看火器營。健銳營。神機營。及武勝新隊。欽此。朕恭侍

慈輿恪遵

成憲。整軍經武。式振戎行。所有應行事宜。著慶親王奕劻。詳查舊案。敬謹豫備。欽此。

二十四日

上諭。伍廷芳奏。京營及各省綠營。請參用新法訓練等語。著軍機大臣會同神機營王大臣。八旗都統。妥議具奏。欽此。

同日

上諭。大學士麟書。持躬恪慎。學問優長。由宗人府主事。洊歷正卿。屢司文柄。簡授內大臣。翰林院學士。旋登揆席。翊贊綸扉。辦理部旗事務。宣力有年。克勤厥職。前因患病給假。方冀調理就痊。長資倚畀。遽聞溘逝。悼惜殊深。著賞給陀羅經被。派員子溥倫。帶領侍衛十員。卽日前往奠醊。加恩晉贈太子太保銜。照大學士例賜卹。

謹按麟芝庵中堂。賜諡文恪。

任內一切處分。悉予開復。應得卹典。該衙門察例具奏。伊子工部員外郎英

綿。著以五品京堂卽補。伊孫定恆。著賞給舉人。准其一體會試。以示篤念耆臣至意。欽此。

閏三月初三日

上諭。給事中高燾會奏。昭信股票。宜分別辦理一摺。昭信股票。原期上下流通。不特爲暫時籌款之計。前

經諄諭。不准苛派抑勒。若如所奏。各省辦理此事。名為勸借。實則勒索催迫。騷擾閭閻。莫此為甚。亟應嚴行查禁。著各督撫。通飭各該地方官。遵照部定章程。妥為辦理。商民等願領與否。各聽其便。如有不肖官吏。藉端指派。致滋擾累。立即查參懲辦。以杜流弊。而順輿情。該部知道。欽此。二十日

上諭。朕欽奉

慈禧端佑康頤昭豫莊誠壽恭欽獻崇熙皇太后懿旨。此次神機營火器營健銳營武勝新隊操演各項陣法。技藝嫺熟。步伐整齊。施放槍礮。聲勢均尚聯絡。該管王大臣督率有方。允宜量予恩施。用昭激勸。奕勳載漪均著賞加二級。熙敬桂祥恩伯芬車敬信剛毅均著賞加一級。神機營武勝新隊全營翼長均著賞加二級。賞給八綵緞一件。各營備操官員均著賞加一級。各營備操兵丁馬步技藝兵丁著每名賞銀二兩。各項執事兵丁著每名賞銀一兩。以示獎勵。仍著該王大臣隨時督練。精益求精。俾効禦侮折衝之用。欽此。朕恭侍

慈輿親臨簡閱。現當整軍經武之際。該王大臣尤應訓勵弁兵。益加講肄。毋得始勤終惰。以副朝廷委任。

至意。欽此。二十日

上諭。朕欽奉

慈禧端佑康頤昭豫莊誠壽恭欽獻崇熙皇太后懿旨。恭親王奕訢，誼屬親賢，久襄密勿。溯自同治初元，予與

孝貞顯皇后垂簾聽政，其時東南未靖，國事多艱。恭親王翊贊謨猷，削平大難，論功行賞，特命以親王世襲罔替。三十餘年，恪恭奉職，殫竭忠忱。其間養疾家居，旋復起膺樞要，朝夕從事，力任其難。本年二月之杪，舊疾舉發，予率皇帝迭次親臨看視，方冀安心調理，可卽就痊。不意本月初十日遽爾長逝，時事方殷，失此良弼，予懷震悼。曷可勝言。本日臨邸奠醊，追維疇昔，眷念成勞。恭親王著賜諡曰忠，入祀賢良祠。守衛陵寢，添設丁戶，四時祭祀，官爲經理。伊孫溥偉著卽日承襲親王，用示篤念宗親，愴懷賢輔至意。欽此。

四月十一日

上諭朕叔恭親王天賦聰明，宅心忠正，自幼爲

皇祖宣宗成皇帝所鍾愛。

遣詔封爲親王。迨

皇考文宗顯皇帝御極。

命在軍機處行走。同治初年。

中東戰紀本末

三編卷一 諭旨

十二

廣學會校刊

兩宮皇太后特加倚畀。

授爲議政王旋。

命以親王世襲罔替。並加一員勒。

賞食全俸。凡軍國重事。無一不盡心規畫。上協。

聖謨。中間養病數年。又復起膺重寄。夙夜匪懈。終始不渝。上月之杪。痰喘頻作。猶力疾視事。經朕再三慰。

諭。始行請假調理。閏月中旬。疾勢增劇。朕奉。

皇太后。三次親詣邸第看視。王氣息僅屬。殷殷以國事爲念。方冀藥物扶持。漸卽康復。不意本月初十日。

遽爾長逝。念近支尊長中。王年德最尊。勳望最隆。失此股肱。曷勝震悼。著賞給陀羅經被。卽日親臨奠醊。

輟朝五日。朕素服十五日。派總管內務府大臣啟秀。辦理喪事。所有一切事宜。俱由官經理。其餘飾終典。

禮。該衙門詳查例章具奏。欽此。同日

上諭朕欽奉

慈禧端佑康頤昭豫莊誠壽恭欽獻崇熙皇太后懿旨。我朝家法。親郡王等有功在。

社稷者。皆得配享。

太廟所以示崇隆之典。爲萬世人臣樹之鵠也。溯當咸豐十年。

文宗顯皇帝秋獮木蘭。恭親王奕訢留京辦事。中外父安。迨同治初元。垂簾聽政。恭親王首膺重寄。入贊樞機。薦舉賢才。肅清區宇。數十年來。蹇蹇匪躬。恪勤罔懈。王之功績。薄海咸知。王之惓誠。

祖

宗昭鑒。今不幸遘疾奄逝。論其德業。允足侑食。

廟廷。著大學士九卿。考定位次。一切典禮。詳議以聞。欽此。十二日

上諭。朕叔恭親王薨逝。昨朕親臨奠醊。追懷勲德。感愴彌深。業經欽奉。

懿旨。賜加諡號。入祀賢良祠。並以王功在。

社稷。

特恩侑食。

廟廷。其飾終典禮。諭令該衙門查例具奏。本日呈遞遺章。情殷納誨。上則敬。

天法。

祖尊養。

中東戰紀本末

三編卷一 諭旨

十三

廣學會校刊

慈闈下則經武整軍。用人行政。靡不懇切周詳。循覽之餘。倍增悲惋。朕仰承

慈訓。近年以來。軍國重事。實賴王竭誠匡弼。悉合機宜。一旦失茲柱石。中外臣工。諒亦同深感悼。爾諸臣等。當以恭忠親王爲法。各摠忠愍。共濟時艱。以竟賢王勤於國家之意。欽此。十三日

上諭。前據戶部議准。副都統景祺奏。請抽收鋪稅藥牙。嗣後體察情形。因恐有累閭閻。該部奏請停辦。業已電知各省。一體遵行。第恐商民尚未周知。難免不肖官吏。藉端擾累。殊乖朝廷勤恤民隱之意。茲特明白宣示。並著各督撫通行曉諭。如該地方官。有影射勒捐情弊。卽著該管上司。嚴行參辦。以防弊混。而順輿情。欽此。十六日

上諭。榮祿著補授大學士。管理戶部事務。剛毅著調補兵部尚書。協辦大學士。刑部尚書著崇禮補授。欽此。二十日

上諭。前經降旨。開辦京師大學堂。入堂肄業者。由中學小學以次而升。必有成效可觀。惟各省中學小學。尚未一律開辦。總計各直省省會。及府廳州縣。無不各有書院。著各該督撫。督飭地方官。各將所屬書院。坐落處所。經費數目。限兩個月。詳查具奏。卽將各省府廳州縣現有之大小書院。一律改爲兼習中學西學之學校。至於學校階級。自應以省會之大書院。爲高等學。郡城之書院。爲中等學。州縣之書院。爲小學。

皆頒給京師大學堂章程。令其仿照辦理。其地方自行捐辦之義學社學等。亦令一律中西兼習。以廣造就。至各書院需用經費。如上海電報局招商局及廣東闖姓等捐。頗有溢款。此外陋規濫費。當亦不少。著各該督撫。儘數提作各學堂經費。各省紳民。如能捐建學堂。或廣爲勸募。准各督撫。按照籌捐數目。酌量奏請給獎。其有獨力措捐鉅款者。朕必予以破格之賞。所有中學小學應讀之書。仍遵前諭。由官設書局編譯中外要書。頒發遵行。至於民間祠廟。其有不在祀典者。卽著各地方官。曉諭民間。一律改爲學堂。以節糜費。而隆教育。似此實力振興。庶幾風氣徧開。人無不學。學無不實。用副朝廷愛養成材至意。將此通諭知之。欽此。

同日

上諭。數年以來。中外臣工。講求時務。多主變法自強。邇者詔書數下。如開特科。裁冗兵。改武科制度。立大小學堂。皆經一再審定。籌之至熟。妥議施行。惟是風氣尙未大開。論說莫衷一是。或徂於老成憂國。以爲舊章必應墨守。新法必當擯除。衆喙嚶嚶。空言無補。試問時局如此。國勢如此。若仍以不練之兵。有限之餉。士無實學。工無良師。強弱相形。貧富懸絕。豈真能制梃以撻堅甲利兵乎。朕維國是不定。則號令不行。極其流弊。必至門戶紛爭。互相水火。徒蹈宋明積習。於國政毫無裨益。卽以中國大經大法而論。五帝三王。不相沿襲。譬之冬裘夏葛。勢不兩存。用特明白宣示。中外大小諸臣。自王公以及士庶。各宜努力向上。

發憤爲雄。以聖賢義理之學。植其根本。又須博采各學之切於時務者。實力講求。以救空疏迂謬之弊。專心致志。精益求精。毋徒襲其皮毛。毋競騰其口說。務求化無用爲有用。以成通經濟變之才。京師大學堂。爲各行省之倡。尤應首先舉辦。著軍機大臣總理各國事務王大臣。會同妥速議奏。所有翰林院編檢各部院司員。各門侍衛。候補候選道府州縣以下各官。大員子弟。八旗世職。各武職後裔。其願入學堂者。均准入學肄習。以期人才輩出。共濟時艱。不得敷衍因循。徇私援引。致負朝廷諄諄誥誡之至意。將此通諭知之。欽此。二十三日

上諭。方今各國交通。使才爲當務之急。著各直省督撫。亟舉平日所知。品學端正。通達時務。不染習氣者。無論官職大小。酌保數員。交總理各國事務衙門考驗。帶領引見。以備朝廷任使。欽此。同日

上諭。翰林院侍讀學士徐致靖奏。保舉通達時務人材一摺。工部主事康有爲。刑部主事張元濟。均著於本月二十八日。預備引見。湖南鹽法長寶道黃遵憲。江蘇候補知府譚嗣同。著該督撫送部引見。廣東舉人梁啟超。著總理各國事務衙門。查看具奏。欽此。二十四日

上諭。總理各國事務衙門奏。遵議侍郎榮惠奏。請特設商務大臣。及選派宗室。游歷各國。一摺。商務爲富強要圖。自應及時舉辦。前經該衙門奏。請於各省會。設立商務局。公舉殷實紳商。派充局董。詳定章程。但

能實力遵行。自當日有起色。卽著各督撫。率同官紳。認真講求。妥速籌辦。總期聯絡商情。上下一氣。毋得虛應故事。並將辦理情形。迅速具奏。至選派宗室王公。遊歷各國。亦係開通風氣。因時制宜之舉。著宗人府。察看該王公員勒等。如有留心國事。志趣向上者。切實保薦。聽候簡派。欽此。同日

上諭。總理各國事務衙門。會同禮部奏。遵議經濟特科章程。開單呈覽。一摺。所擬章程八條。尙屬詳備。卽著照所請行。經濟特科。原期振興士氣。亟應認真選舉。以廣登進。而勵人才。著三品以上京官。及各省督撫。學政。各舉所知。限於三個月內。迅速咨送總理各國事務衙門。會同禮部。奏請考試。一俟咨送人數足數。考選。卽可隨時奏請。定期舉行。不必俟各省彙齊。再行請旨。用副朝廷側席求賢至意。該衙門知道。單併發。將此通諭知之。欽此。二十五日

上諭。昨經降旨。諭令宗人府。保薦王公員勒等。選派游歷。因念近支王貝勒等。職分較崇。朕當親行查看。毋庸保薦。其王公以下。及閒散宗室。如有志趣遠大。才具優長者。著宗人府隨時保奏。欽此。二十七日

硃諭。協辦大學士戶部尙書翁同龢。近來辦事。多未允協。以致衆情不服。屢經有人參奏。且每於召對時。諮詢事件。任意可否。喜怒失常。詞色漸露。實屬狂妄任性。斷難勝樞機之任。本應查明各節。予以重懲。姑念其在毓慶宮行走有年。不忍遽加嚴譴。翁同龢著卽開缺回籍。以示保全。特諭。欽此。同日

上諭。嗣後。在廷臣工。如蒙

慈禧端佑康頤昭豫莊誠壽恭欽獻崇熙皇太后賞加品級。及補授滿漢侍郎以上各官。均著具摺恭詣皇太后前謝恩。各省將軍都統督撫等官。亦著一體具摺奏謝。欽此。同

上諭。王文韶著迅即來京陛見。直隸總督著榮祿暫行署理。欽此。同

上諭。御史曾宗彥奏。農工二務。亟宜振興一摺。另片奏。南北洋宜設立礦學學堂等語。著總理各國事務衙門一併議奏。欽此。五月初二日

上諭。御史宋伯魯楊深秀奏。禮臣守舊迂謬。阻撓新政一摺。著許應騤按照所參各節。明白回奏。欽此。同

上諭。許應騤奏。遵旨明白回奏。一摺。該尚書被參各節。既據逐一陳明。並無阻撓等情。即著毋庸置議。禮部有總司科舉學校之責。總理衙門辦理交涉事件。均關緊要。該尚書嗣後。遇事務當益加勉勵。與各堂官和衷商榷。毋負委任。欽此。初四日

上諭。孫家鼐著以吏部尚書協辦大學士。欽此。初五日

上諭。王文韶著在軍機大臣上行走。欽此。同日

上諭。戶部尚書著王文韶補授。欽此。同日

上諭王文韶著在總理各國事務衙門行走。欽此。同

上諭榮祿著補授直隸總督。兼充辦理通商事務北洋大臣。欽此。同

上諭我朝承宋明舊制。以四書文取士。康熙年間。曾經停止八股。改試策論。未久。旋復舊制。一時文運昌明。儒生稽古窮經。類能推究本原。發明義理。制科所得。實不乏通經致用之才。乃近來風氣日漓。文體日敝。所試時藝。大都隨題敷衍。於經義罕有發明。而謬陋空疏者。每獲濫竽充選。若不因時變通。何以見實學而拔真才。著自下科爲始。鄉會試及生童歲科各試。向用四書文者。一律改試策論。其如何分場命題考試。一切詳細章程。該部卽妥議具奏。此次特降諭旨。實因時文積弊太深。不得不隨時改變。以破拘墟之習。至士人爲學。自當以四書六經爲根柢。策論與制義。殊流同源。仍不外通經史以達時務。總期體用兼備。人皆勉爲通儒。毋得競逞博涉。徒蹈空言。致負朝廷破格求才之至意。欽此。同

上諭前因蘆漢鐵路。設立招商公司。特派盛宣懷督辦。計時將及兩年。所有勘路購地各事宜。應已辦有端緒。此項鐵路。關係緊要。豈容觀望。俄延現在業已籌有的款。著盛宣懷。尅日興工趕辦。並將辦理情形。先行具奏。倘再延不開辦。玩誤要工。責有攸歸。盛宣懷豈能當此重咎耶。此外粵漢甯滬鐵路。並著承辦各員。一併迅速開辦。毋得任意遲緩。欽此。初八

上諭。前據順天府尹胡燏棻奏。請精練陸軍。並神機營改用新法操演。又出使大臣伍廷芳奏。京營綠營。參用西法。各摺片。當經先後諭令軍機大臣。會同督辦軍務王大臣。及神機營王大臣。八旗都統。妥議具奏。現在督辦軍務處業已裁撤。所有諭令覆議各節。即著軍機大臣。會同神機營王大臣。八旗都統。迅速議奏。毋得延緩。欽此。初九日

上諭。茲當整飭庶務之際。部院各衙門承辦事件。首戒因循。前因京師大學堂。為各行省之倡。特降諭旨。令軍機大臣總理各國事務王大臣。會同議奏。即著迅速覆奏。毋再遲延。其各部院衙門。於奉旨交議事件。務當督飭司員。剋期議覆。倘再仍前玩愒。並不依限覆奏。定即從嚴懲處。不貸。欽此。同日

上諭。御史宋伯魯奏。請將經濟歲舉。歸併一科。並各生童歲科試。迅即改試策論。一摺。前因八股時文。積弊太深。特諭令改試策論。用覘實學。惟是挈領提綱。鄉會試既改策論。經濟歲舉。亦不外此。自應併為一科。以免紛歧。至生童歲科試。著各省學政。奉到此次諭旨後。即行一律改為策論。毋庸候至下屆更改。將此通諭知之。欽此。十二日

上諭。李鴻章著稽察欽奉上諭事件處。欽此。同日

上諭。軍機大臣會同總理各國事務衙門王大臣奏。遵旨籌辦京師大學堂。並擬詳細章程。繕單呈覽。一

摺京師大學堂。爲各行省之倡。必須規模閎遠。始足以隆視聽。而育人才。現據該王大臣詳擬章程。參用泰西學規。綱舉目張。尙屬周備。卽著照所議辦理。派孫家鼐管理大學堂事務。辦事各員。由該大臣慎選奏派。至總教習。綜司功課。尤須妥擇學賅中外之士。奏請簡派。其分教習各員。亦宜一體精選。中西並用。其所需興辦經費。及常年用款。著戶部分別籌撥。所有原設官書局。及新設譯書局。著併歸大學堂。由管學大臣督率辦理。此次設立大學堂。爲作育人才。講求時事起見。該大臣務須督飭該教習等。按照現定課程。認真訓迪。日起有功。用副朝廷振興實學至意。該衙門知道。軍併發。欽此。十五日

上諭。建設大學堂工程事務。著派慶親王奕劻。禮部尙書許應騷。迅速辦理。欽此。十六日

上諭。總理各國事務衙門奏。議覆御史曾宗彥奏。請振興農學一摺。農務爲富國根本。亟宜振興。各省可耕之土。未盡地力者尙多。著各督撫。督飭各該地方官。勸諭紳民。兼採中西各法。切實興辦。不得空言搪塞。須知講求農田種植之道。全在地方官。隨時維持保護。實力奉行。如果辦有成效。准其擇尤奏請獎敘。上海近日創設農學會。頗開風氣。著劉坤一。查明該學會章程。咨送總理衙門。查核頒行。其外洋農學諸書。著各省學堂。廣爲編譯。以便肄習。欽此。同日

上諭。自古致治之道。必自開物成務爲先。近來各國通商。工藝繁興。風氣日闢。中國地大物博。聰明才力。

不乏傑出之英。祇以囿於舊習。未能自出新奇。現在振興庶務。富強至計。首在鼓勵人才。各省士民。著有新書。及創建新法。製成新器。果係堪資要用者。允宜獎賞。以爲之勸。或量其材能。授以實職。或錫之章服。表以殊榮。所製之器。頒給執照。酌定年限。准其專利售賣。如有能獨力創建學堂。開闢地利。興造槍礮各廠。有裨於經國遠猷。殖民大計者。並著照軍功之例。給予特賞。以昭鼓勵。其如何詳定章程之處。著總理各國事務衙門。卽行妥議具奏。欽此。十七日

上諭。胡聘之奏。遵議武科改制各節。開單呈覽一摺。另片奏。鄉會各試。請將學堂生童。擇優取中等語。著兵部會同總理各國事務衙門。併入陶模奏。請變通武科摺內。一併議奏。單併發。欽此。同日

上諭。前據順天府尹胡燏棻奏。請精練陸軍。並神機營改用新法操演。出使大臣伍廷芳奏。京營綠營參用西法各摺片。先後諭令軍機大臣。會同神機營王大臣。八旗都統。妥議。茲據該王大臣等。會同議奏。改練洋操。爲練兵要著。各省綠營練勇。迭經諭令認真裁併。一律挑練。著該將軍督撫。歸入前次戶部兵部議覆御史曾宗彥奏。請改操摺內。一併迅速籌議。切實具奏。神機營業經挑選馬步官兵一萬人。勤加訓練。卽著汰弱留強。實力講求。務成勁旅。八旗滿洲蒙古漢軍驍騎營。兩翼前鋒護軍營。均著以五成改習洋操。五成改習洋機擡槍。著派奕劻色楞額永隆。管理八旗驍騎營。崇禮載卓蘇瞻岱。管理兩翼前鋒

護軍營。奕劻向來辦事認真。熟諳武備。務須會同簡派各員。並督同各旗營專操大臣。按照泰西兵制。更定新章。認真操演。其八旗漢軍礮隊營。簾牌營。著一併改用新法。挑練精壯。如式演練。以成有用之兵。倘使日起有功。何惜寬籌餉項。各直省將軍督撫。及該管王大臣等。務當振刷精神。屏除積習。毋得始勤終怠。至一切陣法器械營制餉章。及挑選將弁教習各節。著按照胡燏棻等所奏。議定切實辦法。奏明辦理。用副朝廷整軍經武至意。將此通諭知之。欽此。二十一日

上諭。裕祿著在軍機大臣上行走。署理鑲藍旗漢軍都統。凱泰著毋庸兼署。欽此。二十三日

上諭。四川總督著奎俊補授。德壽著調補江蘇巡撫。江西巡撫著松壽補授。袁昶著補授江甯布政使。欽此。二十四日

上諭。各國傳教。載在條約。迭經諭令各該督撫。妥爲保護。以期民教相安。乃本年四川江北廳等處。教案未了。廣西永安州。復有殺斃教民之事。湖北沙市。亦有因案牽連之事。總因地方官不能仰體朝廷諄諄誥誡之意。遇有民教交涉案件。非漫不經心。卽意存歧視。眈域未化。斯嫌隙易生。無怪教案之層見迭出也。用是特加申諭各直省大吏。凡有教堂州縣。務當諄飭地方官。實力保護。平日如有教士謁見。不得任意拒絕。使彼此誠信相孚。從教之人。自不致藉端生事。一面開導百姓。毋以薄物細故。輕啟釁端。卽使事

出倉猝該管官吏果能持平辦理亦何難消患未萌是在各該將軍督撫嚴飭所屬隨時妥慎籌辦從前未結之案卽著迅速了結此後不准再有教案倘仍防範不力除將該地方官照總理衙門奏定新章從嚴懲辦外該將軍督撫責無旁貸亦必執法從事勿謂言之不預也將此通諭知之欽此

同日

上諭前經降旨各省士民著書製器暨捐辦學堂各事給予獎勵諭令總理各國事務衙門妥議具奏茲據該王大臣等議定詳細章程開單呈覽所擬給予世職實官虛銜及許令專利頒賞匾額各節量能示獎尙屬妥協著依議行卽由該衙門咨行各直省將軍督撫通飭所屬將章程出示曉諭以動觀聽而開風氣朝廷鼓勵人材不靳破格之賞仍應嚴防冒濫所有著書製器各事該衙門務當認真考驗嚴定罰懲以期無負振興庶務實事求是之至意該衙門知道單併發欽此

二十
五日

上諭近來各省商務未見暢興皆由官商不能聯絡遇有鋪商倒閉追比涉訟胥吏需索以致商賈觀望難期起色當此整頓商務之際此種情弊亟宜認真釐剔著各直省將軍督撫嚴飭各該地方官務須體察情形盡心保護凡有倒閉虧空之案應卽訊明查追斷還並嚴禁胥吏勒索等弊以儆奸蠹而安善良欽此

二十
六日

上諭裁空糧節餉需爲方今救弊之要圖前經諭令各省體察情形妥速具奏現據該將軍督撫先後奏

陳。或裁制兵。或裁防勇。或裁練軍。或稱業經裁併。無可再裁。當經詳加披閱。各省情形。雖屬不同。但法儉則亟宜變通。財匱則尤資補救。其已裁者。卽著照擬定章程。妥速辦理。其未裁者。仍著再行切實酌覈。總期裁一名空糧。卽節一分虛糜。空糧裁盡。餉項自舒。無論水陸各軍。一律挑留精壯。勤加訓練。俾成勁旅。並著遵照前降諭旨。力行保甲。諸姦禁暴。相輔而行。再能整頓釐金。嚴杜中飽。富國強兵之計。無有亟於此者。當茲時事多艱。朕宵旰焦勞。力圖振作。每待臣下以誠。而竟不以誠相應。各該疆臣。身膺重寄。具有天良。何至誥誡諄諄。仍復掩塞支吾。苟且塞責耶。經此次諄諭之後。儻再有仍前敷衍。不肯實力奉行。經朕查出。或別經發覺。試問各該大臣。能當此重咎否也。將此通諭知之。欽此。二十日

上諭。孫家鼐奏。敬陳管見。一摺。據稱。原任詹事府中允馮桂芬。所著校邠廬抗議一書。最爲精密。其書板在天津廣仁堂。請飭刷印頒行等語。著榮祿迅卽刷印一千部。剋日送交軍機處。毋稍遲延。欽此。二十日

上諭。御史宋伯魯奏。請將上海時務報。改爲官報。一摺。著管理大學堂大臣孫家鼐。酌核妥議。奏明辦理。欽此。同日

上諭。張之洞陳寶箴奏。請飭妥議科舉章程。並酌改考試詩賦小楷之法。一摺。鄉會試改試策論。前據禮部詳擬分場命題各章程。已依議行。茲據該督等奏稱。宜合科舉經濟學堂爲一事。求才不厭多門。學術

仍歸一是。擬爲先博後約。隨場去取之法。將三場先後之序互易等語。朕詳加披閱。所奏各節。剴切周詳。頗中肯綮。著照所擬。鄉會試仍定爲三場。第一場試中國史事。國朝政治論五道。第二場試時務策五道。專問五洲各國之政。專門之藝。第三場試四書義二篇。五經義一篇。首場按中額十倍錄取。二場三倍錄取。取者始准試次場。每場發榜一次。三場完畢。如額取中。其學政歲科兩考生童。亦以此例推之。先試經古一場。專以史論時務策命題。正場試四書義五經義各一篇。禮部卽通行各省。一體遵照。朝廷於科舉一事。斟酌至再。不厭求詳。典試諸臣。務當仰體此意。精心衡校。以期遴選真才。至詞章楷法。雖館閣撰擬。應奉文字。未可盡廢。如需用此項人員。自當先期特降諭旨考試。偶一舉行。不爲常例。嗣後一切考試。均以講求實學實政爲主。不得憑楷法之優劣爲高下。以勵碩學。而黜浮華。其未盡事宜。仍著該部隨時妥酌具奏。欽此。

六月初一日

上諭。前據孫家鼐奏。請將馮桂芬所著校邠廬抗議。刷印發交部院等衙門簽議。當經諭令榮祿迅速刷印。茲據軍機大臣將應行頒發各衙門及擬定數目開單呈覽。卽著照單開俟書到後發交各衙門悉心校看。逐條籤識。各附簡明論說。分別可行不可行。限十日咨送軍機處彙齊進呈。以備垂覽。欽此。

初六日

上諭。翰林院奏侍講黃紹箕呈進張之洞所著勸學篇。據呈代奏一摺。原書內外各篇。朕詳加披覽。持論

平正通達於學術人心。大有裨益。著將所備副本四十部。由軍機處頒發各省督撫學政各一部。俾得廣為刊布。實力勸導。以重名教。而杜扞言。欽此。初七日

上諭。孫家鼐奏。遵議上海時務報改為官報一摺。報館之設。所以宣國是而達民情。必應官為倡辦。該尚書所擬章程三條。均尚周妥。著照所請。將時務報改為官報。派康有為督辦其事。所出之報。隨時呈進。其天津上海湖北廣東等處報館。凡有報單。均著該督撫咨送都察院及大學堂各一分。擇其有關時務者。由大學堂一併呈覽。至各報體例。自應以指陳利弊。開擴見聞為主。中外時事。均許據實昌言。不必意存忌諱。用副朝廷明目達聰。勤求治理之至意。所籌官報經費。即依議行。欽此。初八日

上諭。御史韓培森奏。請籌辦倉穀一摺。積穀為民食攸關。遇有偏災。藉資補救。乃各地方官。往往不以民事為重。以致所設倉廩。半屬有名無實。如逢前後任接代。恆以銀錢抵交。期於簡便。一遇荒歉。輒請開放賑款。留截漕糧。復圖中飽。毫無實惠。此風亟應禁革。著各督撫嚴飭各府州縣。所有倉穀。務當認真籌辦。實儲在倉。其有以銀錢列抵交代者。勒限一律買補。以備緩急。不得陽奉陰違。虛應故事。欽此。同日

上諭。李端棻奏。各省學堂。請特派紳士督辦等語。現在京師大學堂業經專派管學大臣。尅日興辦。各省中學堂小學堂。亦當一律設立。以為培養人才之本。惟事屬創始。首貴得人。著各該督撫就各省在籍紳

士中選擇品學兼優。能孚眾望之人。派令管理各該學堂一切事宜。仍隨時稟承督撫認真辦理。該督撫慎選有人。即著奏請派充。以專責成。而收實效。欽此。十一日

上諭。國家請求武備。非添設海軍。籌造兵輪。無以爲自強之計。茲經召見裕祿。詢以福州船廠情形。據奏工匠機器一切。均足以資興造。惟所需款項較鉅。必須於原撥常年經費以外。另籌的款。按年撥解。庶足備製造船礮之用。著各該將軍督撫。遵照單開指撥數目。妥議辦理。方今時勢艱難。朕宵旰焦勞。力求振作。思禦外侮。則整軍經武。難再視爲緩圖。各該將軍督撫。受恩深重。蒿目時艱。亦當仰體朕懷。協力同心。先其所急。當此度支匱乏。難於挹注。惟有於無可設法之中。力籌撥濟。如釐金之剔除中飽。局務之酌量歸併。皆當破除情面。實力籌維。倘指款實有不敷。除應解各項京餉。暨應還洋款。不准擅動外。其餘無論何款。准其移緩就急。如數撥解。不准託詞延宕。國計安危所繫。我君臣總宜相感以誠。同維大局。用副朕殷殷訓誥之至意。仍將遵辦緣由。於接奉此旨十日內。先行電奏。以慰廑系。原單著鈔給閱看。將此各諭令知之。欽此。

同日○謹按指撥船廠經費單開直隸二十萬兩。奉天五萬兩。江蘇二十五萬兩。安徽五萬兩。江西八萬兩。福建十萬兩。浙江八萬兩。湖南十萬兩。湖北十五萬兩。河南山。東山西。陝西甘肅吉林各五萬兩。四川十萬兩。出使經費二十萬兩。淮揚督銷局十二萬兩。

上諭。李端棻奏請刪改則例等語。各衙門咸有例案。勒爲成書。斟若畫一。不特易於遵行。兼可杜吏胥任

意准駁之弊法至善也。乃閱時既久。各衙門例案太煩。堂司各官不能盡記。吏胥因緣爲奸。舞文弄法。無所不至。時或舍例引案。尤多牽混附會。無論或准或駁。皆恃例案爲藏身之固。是非大加刪訂。使之歸於簡易。不可著各部院堂官督飭司員。各將該衙門舊例細心紬繹。其有語涉兩歧。易滋弊混。或貌似詳細。揆之情理。實多窒礙者。概行刪去。另定簡明則例。奏准施行。一切舊例不得再行牽涉。尤不得藉口無例可援。濫引成案。致啟弊端。如有事屬創辦。不能以成例相繩者。准該衙門隨案據實聲明。請旨辦理。仍按衙門煩簡。立定期限。督飭司員迅速辦竣具奏。將此通諭知之。欽此。同日

上諭。近因各省裁汰營勇。保衛地方。全在嚴查保甲。以輔兵力之不足。各省辦理保甲章程未必詳備。迭經諭令各督撫從嚴稽察。率皆視爲具文。並未將現辦情形詳晰覆奏。殊屬因循廢弛。自此次申諭之後。各該督撫務當嚴飭地方官。於保甲一事實力舉行。以期民情固結。奸宄無從匿跡。仍將整頓辦法先行切實具奏。以副朕綏靖閭閻至意。欽此。十二日

上諭。御史鄭思贊奏。特科大典。請嚴定濫保處分。一摺。經濟特科之設。朝廷原期拔取真才。以備賢良之選。非爲倖進之徒。開營謀之路。中外臣工。例得保送特科者。務當屏除私心。汲引善類。必於所保之人。學問才具。灼見真知。始可登諸薦牘。不得瞻徇情面。濫保私人。如有言行不符。及干求奔競等情。一經察出。

定將原保大臣從嚴懲處。欽此。

同日

上諭。鐵路礦務。爲時政最要關鍵。現在津榆津蘆鐵路早已工竣。由山海關至大凌河一帶。亦已籌款接辦。其粵漢蘆漢兩路。均歸總公司建造。是幹路規模大段已具。礦務以開平漠河兩處辦理最爲得法。成效已著。現正一律推廣。惟路礦事務繁重。誠恐各省辦法未能畫一。或致章程歧出。動多窒礙。亟應設一總匯之地。以一事權。著於京師專設礦務鐵路總局。特派總理各國事務大臣王文韶張蔭桓專理其事。所有各省開礦築路一切公司事宜。盡歸統轄。以專責成。欽此。

十五日

上諭。通商惠工。務材訓農。古之善政。方今力圖富強。業經明諭各省。振興農政。獎勵工藝。並派大臣督辦沿江等處商務。惟中國地大物博。若不開通風氣。不足以盡地力而闢利源。圖治之法。以農爲體。以工商爲用。現當整飭庶務之際。著各直省督撫認真勸導紳民。兼採中西各法。講求利弊。有能創製新法者。必當立予優獎。該督撫等務當仰體朝廷開物成務之意。各於該管地方考察情形。所有頒行農學章程及製造新器新藝。專利給獎。並設立商務局。選派員紳開辦各節。皆當實力推廣。俾有成效。此外迭經明降諭旨飭辦事宜。亦均悉心講求。次第興辦。毋得徒託空言。一奏塞責。並將各項如何辦理情形。隨時具奏。將此通諭知之。欽此。

同日

上諭。朝廷整飭吏治。不啻三令五申。乃各省大吏。往往粉飾因循。於所屬各員。不肯認真考察。以致賢者無由各盡其長。不肖者得以自匿其短。甚至案關吏議。尙不免巧爲開脫。誤國病民。皆由於此。著各省督撫。嗣後於屬員中。務當嚴加考核。賢能者。卽行臚陳政績。保薦擢用。其曠廢職事。營私舞弊之員。隨時分別奏參。立予黜革。經此次申諭後。各該督撫。身膺重寄。尙其振刷精神。秉公舉劾。以期吏治日有起色。毋負諄諄誥誡之至意。欽此。同日

上諭。朝廷振興庶務。不厭講求。所賴大小臣工。各抒讜論。以備採擇。著翰林院詹事府都察院。各於值日之日。由該堂官輪派講讀編檢八員。中贊二員。科道四員。隨同到班聽候召見。藉收敷奏以言之益。其部院司員。有條陳事件者。著由各堂官代奏。士民有上書言事者。著赴都察院呈遞。毋得拘牽忌諱。稍有阻格。用副邇言必察之至意。欽此。同日

諭旨。著翰林院詹事府都察院。各於值日之日。由該堂官輪派講讀編檢八員。中贊二員。科道四員。隨同到班聽候召見。其是日未經召見之員。著於下次值日。再行到班。仍按照各衙門派定員數。呈遞騰牌。欽此。十六日軍機大臣面奉

上諭。孫家鼐奏。議覆五城添立小學堂。請飭設法勸辦一摺。京師現已設立大學堂。其小學堂亦應及時

創立俾京外舉貢生監等一體入學。廣爲造就。以備升入大學堂之選。著五城御史設法勸辦。務期與大學堂相輔而行。用副培養人材之至意。其大學堂章程。仍著孫家鼐條分縷析。迅速妥議具奏。欽此。十七日

上諭。前據孫家鼐奏。遵議上海時務報改爲官報。派康有爲督辦其事。並據廖壽恆面奏。嗣後辦理官報事宜。應令康有爲向孫家鼐商辦。當經諭令由總理衙門傳知康有爲遵照。茲據孫家鼐奏。陳官報一切辦法。報館之設。義在發明國是。宣達民情。原與古者陳詩觀風之制相同。一切學校農商兵刑財賦。均准臚陳利弊。藉爲詔譴之助。兼可繙譯各國報章。以備官商士庶開擴見聞。其於內政外交。裨益非淺。所需經費。自應先行籌定。以爲久遠之計。著照官書局之例。由兩江總督按月籌撥銀一千兩。並另撥開辦經費銀六千兩。以資布置。各省官民閱報。仍照商務例價。著各督撫通核全省文武衙門差局書院學堂。應閱報單數目。移送官報局。該局卽按期照數分送。其報價著照湖北成案。籌款墊解。至報館所著論說。總以昌明大義。抉去壅蔽爲要義。不必拘牽忌諱。致多窒礙。泰西律例。專有報律一門。應由康有爲詳細繹出。參以中國情形。定爲報律。送交孫家鼐呈覽。欽此。二十日

上諭。目今時局艱難。欲求自強之策。不得不舍舊圖新。前因中外臣工。半多墨守舊章。曾經剴切曉諭。最以講求時務。勿蹈宋明積習。諄諄訓誡。不啻三令五申。惟是朝廷用意之所在。大小臣工。恐尚未盡深悉。

現在應辦一切要務。造端宏大。條目煩多。不得不裒集衆長。折衷一是。遇有交議事件。內外諸臣。務當周諮博訪。詳細討論。毋緣飾經術。附會古義。毋固執成見。隱便身圖。倘或面從心違。希冀敷衍塞責。致令朝廷實事求是之意。愆其本旨。甚非朕所深望於諸臣也。總之中國現在。病在痿痺。積弊太深。諸臣所宜力戒。卽如陳寶箴。自簡任湖南巡撫以來。銳意整頓。卽不免指摘紛乘。此等悠悠之口。屬在搢紳。倘仍隨聲附和。則是有意阻撓。不顧大局。必當予以嚴懲。斷難寬貸。至於襄理庶務。需才甚多。上年曾有考試各部院司員之諭。著各該堂官認真考察。果係有用之材。卽當據實臚陳。候朕錄用。如或闕茸不職。亦當立予參劾。毋令濫竽。當此時事孔棘。茲後懲前深維窮變通久之義。創辦一切實具萬不得已之苦衷。用再明白申諭。爾諸臣其各精白乃心。力除壅蔽。上下以一誠相感。庶國是以定。治理蒸蒸日上。朕實有厚望焉。欽此。

同日

上諭孫家鼐奏籌辦大學堂大概情形一摺。所擬章程八條。大都參酌東西洋各國學校制度。暨內外臣工籌議。與前奏擬定辦法。間有變通之處。縷晰條分。尙屬妥協。造端伊始。不妨博採衆長。仍須折衷一是。卽著孫家鼐按照所擬各節認真辦理。以專責成。其學堂房舍業經准令暫撥公所應用。交內務府量爲脩葺。著內務府尅日修理。交管理大學堂大臣以便及時開辦。毋稍延緩。另片奏議覆給事中鄭思賀奏

推廣學堂月課章程。請將額滿之員。以月課代甄別等語。著依議行。惟茲事體大。必須精益求精。務臻美備。所有一切未盡事宜。仍應隨時體察情形。妥籌具奏。至派充西學總教習丁建良。據孫家鼐面奏。請予鼓勵。著賞給二品頂戴。以示殊榮。該衙門知道。欽此。同日

上諭。中國創建水師。歷有年所。惟是制勝之道。首在得人。欲求堪任將領之才。必以學堂為根本。應如何增設學額。添製練船。講求駕駛。諳習風濤。以備異日增購戰船。可期統帶得力。著南北洋大臣沿江沿海各將軍督撫一體實力籌辦。妥議具奏。至鐵路礦務。為目今切要之圖。造端伊始。亟應設立學堂。預儲人才。方可冀收實效。所有各處鐵路扼要之區。及開礦省份。應行增設學堂。切實舉辦之處。著王文韶張蔭桓悉心籌議。奏明辦理。欽此。二十三日

上諭。孫家鼐奏。舉人梁啟超恭擬譯書局章程。並瀝陳開辦情形。據呈代奏一摺。譯書局事務。前經派令梁啟超辦理。現在京師設立大學堂。為各國觀聽所係。應需功課書籍。尤應速行編譯。以便誦習。該舉人所擬章程十條。均尚切實。即著依議行。此事創辦伊始。應先為經久之計。必須寬籌經費。方不至草率遷就。致隘規模。現在購辦機器。及中外書籍。所費不貲。所請開辦經費銀一萬兩。俾得措置裕如。其常年款項。亦應寬為核計。著於原定每月經費一千兩外。再行增給每月二千兩。以備博選通才。益宏搜討。以上

各款均由戶部卽行籌撥。自七月初一日起。每月應領經費。並著預先發給。毋稍稽延。其大學堂及時務官報局。亟應迅速開辦。所需經費。如有不敷。准由孫家鼐一併隨時具奏。至大學堂借撥公所。迭經諭令內務府。尅日修葺移交。著趕緊督催。先將辦理情形。卽日覆奏。國家昌明政教。不惜多發帑金。該大臣等務當督飭在事人員。認真籌辦。務令經費綽有餘裕。庶幾茂矩宏規。推之彌廣。用副朝廷實事求是至意。欽此。二十日九日

上諭。現在變通科舉。業經准如張之洞陳寶箴所奏。更定新章。並據禮部詳議條目。頒行各省。一體改試策論。一洗從前浮靡空疏之習。殿試一場。爲士子通籍之始。典禮最重。朕臨軒發策。虛衷採納。自必遴取明體達用之才。嗣後一經殿試。卽可據爲授職之等差。其朝考一場。著卽行停止。朝廷造就人才。惟務振興實學。一切考試詩賦。概行停罷。亦不憑楷法取士。俾天下翕然向風。講求經濟。用備國家任使。朕實有厚望焉。欽此。七月初三日

上諭。孫家鼐奏。京員創辦學堂。請旨獎勵等語。戶部郎中王宗基等。於北城地面。集貲設立會文學堂。講求中西實學。洵屬留心時事。造就人材。著傳旨嘉獎。餘依議。欽此。初五日

上諭。總理各國事務衙門奏。遵議廖壽豐奏。請飭出使各國大臣。督同領事。各就寓洋華人。一體建立學

堂一摺。英美日本各埠。僑寓華民衆多。羣居錯處。不乏可造人材。亟應創立學堂。兼肄中西文字。以廣教育。著該大臣等。體察情形。妥爲勸辦。擬定章程。詳晰覆奏。另片奏。請由使館。繙譯外洋書籍等語。編譯泰西書籍。以考證政治得失。亦爲目前要圖。羅豐祿。慶常。伍廷芳。熟於英法文字。就近購譯。尤爲便捷。著卽選擇善本。詳加潤色。務令中西文義。融會貫通。陸續編譯成書。彙送由總理衙門呈覽。欽此。同日

上諭。總理各國事務衙門代奏。工部主事康有爲條陳。請興農殖民。以富國本一摺。訓農通商。爲立國大端。前經迭諭各省。整頓農務。工務商務。以冀開闢利源。各處辦理如何。現尙未據奏報。萬寶之源。皆出於地。地利日闢。則物產日阜。卽商務亦可日漸擴充。是訓農又爲通商惠工之本。中國向本重農。惟尙無專董其事者。以爲倡導。不足以鼓舞振興。著卽於京師。設立農工商總局。派直隸霸昌道端方。直隸候補道徐建寅。吳懋鼎。爲督理。端方著開去霸昌道缺。同徐建寅。吳懋鼎。均著賞給三品卿銜。一切事件。准其隨時具奏。其各省府州縣。皆立農務學堂。廣開農會。刊農報。購農器。由紳富之有田業者。試辦以爲表率。其工學商學各事宜。亦著一體認真舉辦。統歸督理農工商總局端方等。隨時考查。各直省。卽由該督撫。設立分局。遴派通達時務。公正廉明之紳士二三員。總司其事。所有各局開辦日期。及派出辦理之員。並著先行電奏。此事創辦之始。必須官民一氣。實力實心。方可漸收實效。端方等及各該督撫等。務當仰體朝

廷率作興事之意。考求新法。精益求精。庶幾農業興而生殖日蕃。商業盛而流通益廣。用以植富強之基。朕實有厚望焉。欽此。日同

上諭。前江西巡撫德馨著開復頭品頂戴花翎。賞給布政使銜。會同翰林院編修貴鐸。辦理奉天礦務。欽此。日同

上諭。文海奏遵旨嚴定瞻對約章。取具達賴確據。繕單呈覽一摺。瞻對地方。前經降旨賞還。諭令文海與達賴嚴定約章。宣布朝廷德意。茲據該大臣將約章復行刪定。辦理尙屬妥協。卽著恭壽迅派道員慶善前往交代。仍由該大臣咨行達賴。慎選番官。赴瞻戍守。毋致滋生事端。至章谷朱窩瞻對三處屯官。應卽一律撤去。用示開誠布公。撫綏藏衛至意。該衙門知道。欽此。日同

上諭。前經諭令各衙門刪定則例。並令各堂官督飭司員限期速辦。現在已將匝月。着各衙門將辦理情形。先行具奏。欽此。日同

上諭。整軍經武。爲國家自強要圖。現當參用西法。訓練各軍。尤宜及時校閱。以振戎行。茲擇于九月初五日。朕恭奉

慈禧端佑康頤昭豫莊誠壽恭欽獻崇熙皇太后慈輿。由西苑啟鑾。詣南苑舊宮駐蹕。初六日。由舊宮詣

中東戰紀本末

三編卷一 諭旨

二十五 廣學會校刊

新宮駐蹕。初七日。由新宮詣團河。駐蹕。初九日。閱視御前大臣等馬步箭。除奕劻晉祺毋庸預備外。御前
乾清門行走侍衛等。或步射。或馬箭。著先期自行報明。以備屆時閱看。初十日。閱視神機營全隊操演。十
一日。閱視武勝新隊操演。十五日。自團河啟鑾。御輪車。由鐵路詣天津行宮。駐蹕。二十五日。回鑾。其天津
應行預備各項操演。著俟駐蹕南苑時。聽候諭旨。所有應行事宜。著各該衙門。參酌成案。敬謹辦理。欽此。
同日

上諭。翰林院奏。編修陳鼎進呈校邠廬抗議別論四十八篇。據呈代奏一摺。該編修所著論說。其中有無
可採之處。著軍機大臣。會同總理衙門王大臣。悉心閱看。妥議具奏。欽此。初十日

上諭。孫家鼐奏。舉人梁啟超請設立繙譯學堂。准予學生出身。並書籍報紙。懇免納稅。據呈代奏一摺。該
舉人辦理譯書局事務。擬就上海。設立學堂。自為培養譯才起見。如果學業有成。考驗屬實。准其作為學
生出身。至書籍報紙。一律免稅。均著照所請行。該衙門知道。欽此。同日

上諭。近來朝廷整頓庶務。如學堂商務鐵路礦務等。一切新政。迭經諭令各將軍督撫。切實籌辦。並令將
辦理情形。先行具奏。該將軍督撫等。自應仰體朝廷孜孜求治之意。內外一心。迅速辦理。方為不負委任。
乃各省積習相沿。因循玩愒。雖經嚴旨敦迫。猶復意存觀望。卽如劉坤一譚鍾麟總督兩江兩廣地方。於

本年五六月間。諭令籌辦之事。並無一字覆奏。迨經電旨催問。劉坤一則藉口部文未到。一電塞責。譚鍾麟且並電旨未覆。置若罔聞。該督等皆受恩深重。久膺疆寄之人。泄沓如此。朕復何望。倘再藉詞宕延。定當予以懲處。直隸距京咫尺。榮祿於奉旨交辦各件。尤當上緊趕辦。陸續奏陳。其餘各省督撫。亦當振刷精神。一體從速籌辦。毋得延玩。致干咎戾。欽此。同日

上諭。朝廷振興庶政。凡交議交查各件。皆係當務之急。各督撫等。自當仰體朕懷。各就地方情形。認真妥辦。隨時具奏。乃本年六月以前。所有明降諭旨。及寄諭並電旨。飭辦各件。未經覆奏者尚多。總由疲玩因循。不知振作。著各該將軍督撫。即將以前飭令議奏之件。迅速具奏。以後奉諭交辦之事。尤當依限趕辦。尅日奏聞。毋得任意延緩。致煩降旨嚴催。嗣後。明降諭旨。均著由電報局電知各省。該督撫卽行遵照辦理。毋庸專候部文。以杜其藉詞延誤。欽此。十一日

上諭。御史王培佑奏。變法自強。當除蒙蔽痼習一摺。近因時事多艱。朝廷振興庶務。力圖自強。尤賴樞廷及各部院大臣。克篤斐忱。竭力匡贊。以期挽救頹風。庶事可漸臻治理。乃諸臣中。恪共官守者固亦有人。而徇於積習。不知振作者。尤難悉數。卽如部院官。本應常川進署。不得無故請假。議奏事件。不准延擱逾時。皆經再三訓誡。而猶陽奉陰違。似此蒙蔽因循。國事何所倚賴。用特重加申儆。嗣後。在廷大小臣工。務

當洗心革面。力任鉅艱。於應辦各事。明定期限。不得稍涉遲玩。倘仍畏難苟且。自便身圖。經朕覺察。定必嚴加懲處。毋謂寬典可屢邀也。欽此。同

上諭。徐致祥奏。歲科兩試。請照鄉會試新章。分場去取一摺。著禮部議奏。另片奏。請飭精選歷代及國朝四書五經講義。刊刻頒行等語。先儒講義各書。外省皆有刊行善本。著卽由各省學政。自行擇尤購選。頒發生童。俾有遵循。而資講習。欽此。同

上諭。陳寶箴奏。遵保人才。開單呈覽一摺。湖南候補道夏獻銘。選用道黃炳離。降調前內閣學士陳寶琛。內閣候補侍讀楊銳。禮部候補主事黃英采。刑部候補主事劉光第。廣東候補道楊樞。試用道王秉恩。江蘇試用道歐陽霖。江西試用道惲祖祁。杜俞。湖北候補道徐家幹。江蘇候補道柯逢時。湖北試用道薛華培。候選道左孝同。以上各員。在京者。著各該衙門傳知該員。預備召見。其餘均由各該督撫。飭知來京一體預備召見。欽此。十三日

上諭。少詹事王錫蕃奏。敬保通達時務人才一摺。福建興泉永道周蓮。業經電諭飭令來京。預備召見。現尙在籍之四川候補道沈翊清。北洋差委候選道嚴復。著邊寶泉榮祿。飭令該員等來京。預備召見。內閣候補中書林旭。著該衙門傳知該員。預備召見。欽此。同日

上諭。廣西會匪肇事。當經諭令黃槐森督率各營迅速剿辦。前據奏報屢獲勝仗。攻破賊巢。乃數月以來。尙未能殲厥渠魁。悉數撲滅。所稱迭有擒獲。難保無捏報邀功情弊。該撫因循坐視。實屬咎無可辭。黃槐森着卽摘去頂戴。迅督各營勒限一個月。將會匪一律掃盪。如再不知振作。任令蔓延日久。貽害地方。必當加以重譴。凜之欽此。同日

上諭。少詹事王錫蕃奏請飭各省設立商會。於上海設總商會等語。現在講求商務。業於京師設立農工商總局。並諭令劉坤一、張之洞先就上海漢口試辦商務局。擬定辦法奏聞。現尙未據奏到。商會卽商務之一端。著劉坤一等歸案迅速妥籌具奏。其沿江沿海商賈輻輳之區。應由各該督撫一體查明辦理。所有一切開辦事宜。並著總理各國事務王大臣咨商各督撫詳訂章程。妥爲籌辦。欽此。同日

上諭。國家設官分職。各有專司。京外大小各官。舊制相沿。不無冗濫。近日臣工條奏。每以裁汰冗員爲言。雖未必盡可准行。而參酌情理。實亦有亟當改革者。朕維授事命官。不外綜核名實。現值開創百度。需款孔多。度支歲入有常。豈能徒供無用之冗費。致碍當務之急需。如詹事府本屬閒曹。無事可辦。其通政司、光祿寺、鴻臚寺、太僕寺、大理寺等衙門。事務甚簡。半屬有名無實。均著卽行裁撤。歸併內閣及禮兵刑等部辦理。又外省如直隸、甘肅、四川等省。皆係總督兼管巡撫事。惟湖北、廣東、雲南三省督撫同城。原未劃

一現在東河在山東境內者。隸山東巡撫管理。河南河工。由河督專辦。彼此情形。多有不同。著將督撫同城之湖北廣東雲南三省巡撫。並東河總督。一併裁撤。其湖北廣東雲南三省。均著以總督兼管巡撫事。東河總督應辦事宜。卽歸併河南巡撫兼辦。至各省漕糧。多由海運。河運既屬無多。應征漕糧。亦多改折。淮鹽所行省分。亦各分設督銷。其各省不辦運務之糧道。向無鹽場。僅管疏銷之鹽道。亦均著裁撤。歸各藩司各巡道兼理。此外。如各省同通佐貳等官。有但兼水利鹽捕。並無地方之責者。均屬閒冗。卽著查明裁汰。除應裁之京外各官。本日已降諭旨。及裁缺之巡撫河督京卿等員。聽候另行錄用。其餘京外所有應裁文武各缺。及一切裁減歸併各事宜。均着交大學士六部。及各直省督撫。分別詳議。趕辦。仍將所議情形。迅速具奏。內外臣工。卽行遵照。切實辦理。不得藉口體制攸關。多方阻撓。並不得以無可再裁。敷衍了事。至各省設立辦公局。所名目煩多。無非爲位置閒員地步。薪水雜支。虛糜不可勝計。迭經諭令裁撤。乃竟置若罔聞。或任聽奸員劣幕舞文。一奏塞責。殊堪痛恨。着各督撫。凜遵前旨。將現有各局所中冗員。一律裁撤淨盡。並將候補分發捐納勞績等項人員。嚴加甄別。裁汰限一個月。辦竣覆奏。似此實力剔除。庶幾庫款漸裕。得以宏振新規。斷不准瞻徇情面。陽奉陰違。致干咎戾。當此國計艱難。朕宵旰焦勞。孜孜求治。詔書敦勉。動以至誠。爾在廷諸臣。及封疆大吏等。具有天良。尙其仰體朕懷。力矯疲玩積習。一心

一德共濟時艱。庶幾無負委任。若竟各挾私意。非自便身圖。卽見好僚屬。推諉因循。空言搪塞。必當予以重懲。決不寬貸。欽此。十四日

上諭。國子監奏。候補學正黃贊樞條陳時務。請爲代奏一摺。據稱。民生日感宜厚生計。蠹吏橫征。宜嚴考察等語。朝廷整理庶務。無日不以吏治民生爲念。重農之外。桑麻絲茶等項。均爲民間大利所在。全在官爲董勸。庶幾各治其業。成效可觀。著各直省督撫。督飭地方官。各就物土所宜。悉心勸辦。以開利源。親民之官。莫如牧令。近來仕途冗雜。非嚴加考查。不足以別貪廉。錢糧之浮收。胥吏之肆擾。種種殃民之事。該管上司。果能悉心考核。卽不肖官吏。亦斷不至無所忌憚。著各督撫。凜遵六月十五日諭旨。於所屬州縣認真查核。毋令賢否混淆。仍隨時秉公舉劾。以示懲勸。吏治清則民生自裕。此卽封疆大吏之責。無負朕再三申誡至意。欽此。同日

上諭。山東布政使著張人駿調補。岑春煊著補授廣東布政使。欽此。十五日

上諭。懷塔布等奏司員呈遞條陳。請旨辦理一摺。據稱。禮部主事王照條陳時務藉端挾制等語。朝廷廣開言路。本期明目達聰。邇言必察。前經降旨。部院司員有條陳事件者。著由各堂官代奏。毋得拘牽忌諱。稍有阻格。誠以是非得失。朕心自有權衡。無煩各堂官等。鰾鰾過慮也。若如該尙書等所奏。輒以語多偏

激抑不上聞。卽係狃於積習。致成壅蔽之一端。豈於前奉諭旨。毫無體會耶。懷塔布等均著交部議處。嗣後各衙門司員等條陳事件。呈請堂官代遞。卽由各該堂官將原封呈進。毋庸拆看。王照原呈著留覽。欽此。十六日

上諭吏部戶部奏遵旨刪訂則例具奏辦理情形各一摺。各衙門例案太煩。業經諭令趕速刪定。吏部銓選處分二項。頭緒紛紜。戶部收支款項。名目煩多。一切章程。難免歧異。著各該堂官督飭司員悉心刪訂。務極簡明。將核定例章。仿照史表。分門別類。創爲一表。俾閱者一目了然。吏胥無從舞文弄法。至各項底本。卽著該堂官公同核辦。戶部所請專派堂官一員勘定之處。應毋庸議。欽此。同日

諭旨詹事府通政司光祿寺鴻臚寺太僕寺大理寺等衙門。現已裁撤。所有各該衙門一切事宜。歸併內閣六部分辦。著大學士六部尙書侍郎。卽行分別迅速妥議。限五日內具奏。欽此。同日軍機大臣面奉

上諭。昨據吏部戶部奏刪定則例辦理情形。當經諭令將核定例章。仿照史表。分門別類。列爲一表。使人易曉。因思刪定則例。各衙門均當照此辦理。以歸劃一。著各堂官等督飭司員悉心編輯。毋稍紛歧。欽此。十七日

諭吏部奏遵議禮部尙書懷塔布等處分一摺。朕近來屢次降旨。誠諭羣臣。令其破除積習。共矢公忠。

並以部院司員及士民。有上書言事者。均不得稍有阻格。原期明目達聰。不妨芻蕘兼採。並藉此可覘中國人之才識。各部院大臣。均宜共體朕心。遵照辦理。乃不料禮部尙書懷塔布等。竟敢首先抗違。藉口於獻可替否。將該部主事王照條陳。一再駁斥。經該主事面斥其顯違詔旨。始不得已。勉強代奏。似此故違抑格。豈以朕之諭旨。爲不足遵耶。若不予以嚴懲。無以儆戒將來。禮部尙書懷塔布。許應騷。左侍郎堃。卹署左侍郎徐會澧。右侍郎溥頤。署右侍郎曾廣漢。均著卽行革職。至該主事王照。不畏強禦。勇猛可嘉。著賞給三品頂戴。以四品京堂候補。用昭激勸。特諭。欽此。十九日

上諭。禮部尙書著裕祿。李端棻。署理。禮部左侍郎著壽耆。王錫蕃。署理。禮部右侍郎著薩廉。徐致靖。署理。欽此。二十日

上諭。張蔭桓奏。請增修內政。宜戢民志一摺。國家振興庶務。尤以通達民隱爲先。各直省州縣。於聽訟一事。久不講求。往往於戶婚田土錢財細故。任意積壓。累月經年。書役門丁。因之藉端訛索。愚民受累無窮。亟應實力整頓。以除積弊。而恤民隱。前大學士直隸總督曾國藩。所撰清訟事宜。及清訟功過章程。於清釐積案之法。鉅細靡遺。曾經頒行各省。著各將軍督撫。重爲刊印。頒發各屬。並著照該侍郎所請。於原定功過章程外。增補道府功過章程。所屬州縣局員。有記大過三次以上者。道府記過一次。六起以上者。記

大過一次。記功者亦如之。其有徇隱在先。續經舉報。或揭參隱匿。提案清結者。除將州縣局員。分別輕重。參撤記過外。道府亦卽比例記功。凡實缺計典。候補委署。及年終密考。俱以清訟之功。過分別予奪優劣。該將軍督撫府尹等。務當認真考核。實力奉行。以期政平訟理。不准虛應故事。視同具文。並將遵辦情形。迅速具奏。欽此。同日

上諭。京師爲首善之區。現在道路泥濘。溝渠河道。壅塞不通。亟宜大加修理。以壯觀瞻。著工部會同管理。溝渠河道大臣步軍統領衙門五城御史暨街道廳。將京師內外河道溝渠。一律挑挖深通。並將各街巷道路修墊坦平。毋得遷就敷衍。仍將籌辦情形。及開工日期。迅速具奏。應需經費。著由戶部籌撥。欽此。同日

上諭。張蔭桓奏。請飭實行團練一摺。據稱。近來臣工屢有仿西法練民兵之請。若各省實行團練。卽以民團爲民兵。徐立更番替換之法。較諸遽練民兵。爲有把握等語。辦理團練。既可輔兵力之不足。亦卽爲舉辦民兵根本。實爲目前切要之圖。廣西會匪滋事。尤應迅速辦理。以收捍禦之功。著各省督撫。按照張蔭桓所奏。一律切實籌辦。各直省限三個月內。廣東廣西限一個月內。各將籌辦情形。先行覆奏。以副朕保衛閭閻至意。欽此。同日

上諭。翰林院侍讀學士徐致靖奏。冗官既裁。請酌置散卿。以廣登進一摺。著孫家鼐妥速議奏。欽此。同日

上諭。內閣候補侍讀楊銳。刑部候補主事劉光第。內閣候補中書林旭。江蘇候補知府譚嗣同。均著賞加四品卿銜。在軍機章京上行走。參預新政事宜。欽此。同日

上諭。親民之官。莫如牧令。自來循良著績。皆以養民教民爲先務。近來地方州縣。既有保護教民之事。又有培植學堂之舉。內政外交。責成尤關緊要。非得明體達用之能員。措置安能裕如。著各直省督撫。留心訪查所屬地方州縣官。如有通達時務。勤政愛民之員。著卽隨時保送引見。以備錄用。朕爲國爲民。殷殷求治。該督撫等。務當屏去私心。汲引善類。方不負大臣以人事君之義。欽此。二十日

上諭。裕祿著在總理各國事務衙門行走。欽此。同日

上諭。李鴻章。敬信。均著毋庸在總理各國事務衙門行走。欽此。同日

上諭。前據戶部奏辦昭信股票。原定章程。願借與否。聽民自便。不准苛派抑勒。嗣因地方官辦理不善。據御史黃桂鋆等。先後奏參四川山東等省。辦理昭信股票。苛派擾民。當諭令該部妥議具奏。茲據戶部奏稱。股票擾民。屢經指摘。近時收數無多。除京外各官。仍准隨時請領。並官民業經認定之款。照案收繳外。其紳商士民人等。請一概停止勸辦等語。朝廷軫念民依。原期因時制宜。與民休息。豈容不肖官吏。任意灑派。擾害閭閻。其民間現辦之昭信股票。著卽停止。以示體恤。而固民心。餘均照部議行。該部知道。欽此。

同日

上諭。現在裁撤各衙門。業經分別歸併。所有各該衙門裁缺各官。未便聽其閒散。現當振興庶務。規畫久遠。應於鐵路礦務總局。農工商務總局。酌設大小官員額缺。以備將來量才任使。著總理各國事務王大臣。會同吏部。妥速詳議具奏。欽此。二十三日

上諭。戶部奏。代遞主事甯述俞條陳一摺。廣興機器。爲製造貨物之權輿。現在開辦農工商總局。並飭各省。概設分局。振拓庶務。應用各項機器甚多。卽著各督撫。極力裁節冗費。籌備的款。妥議迅設局所。分別製造。以擴利源。而資民用。欽此。同日

上諭。戶部奏。代遞主事王鳳文請設立賑廠一摺。以工代賑。實救荒之良法。中國辦理荒政。舊有此條。而泰西推行尤廣。所有脩造工程。各項手藝。皆足爲養贍窮民之用。國家偶遇災荒。賑施動撥鉅款。而在事人員。辦理不善。侵漁冒領。弊端百出。災黎轉不得均沾實惠。若以工代賑。則弊杜而工業可興。近來江蘇。湖北。山東等省。偏災迭告。飢民轉徙流離。朕心深爲軫念。王鳳文所請。不無可采。著農工商務總局。端方等。妥議開辦章程。迅速具奏。欽此。同日

上諭。總理各國事務衙門奏。章京劉慶汾請仿照成法。印造銅幣。通飭各省籌辦。據呈代奏一摺。著總理

各國事務衙門。安定章程。奏明辦理。欽此。同日

上諭。河東河道總督一缺。前經降旨裁撤。所有舊管之山東運河。著歸山東巡撫就近兼管。以專責成。欽此。同日

此日同

上諭。孫家鼐奏。請設醫學堂等語。醫學一門。關係至重。亟應另設醫學堂。考求中西醫理。歸大學堂兼轄。以期醫學精進。卽著孫家鼐詳擬辦法具奏。欽此。二十四日

旨。近日各衙門呈遞封奏。有一日多至數十件者。嗣後凡有呈請代遞之件。隨到隨卽分日進呈。不必拘定值日之期。欽此。同日

上諭。孫家鼐奏。遵議翰林院侍讀學士徐致靖請酌置散卿一摺。古有侍從之臣。皆妙選才能。以議庶政。現當朝廷振興百度。自應博采衆論。廣益集思。以期有裨政治。著照所議。酌置三四五品卿。三四五六品學士各職。遇有對品卿缺。並翰林院衙門對品缺出。卽由吏部一體開單。請旨錄用以備獻納。仍著按品給予俸祿。應如何詳立條款。著爲定例。著該部妥議具奏。欽此。同日

上諭。前經降旨。裁撤詹事府等衙門。並諭令大學士六部及各直省督撫。將其餘京外應裁文武各缺。及一切裁減歸併各事宜。分別詳議籌辦。迅速具奏。現在已裁各衙門歸併事宜。業由各該衙門遵照辦理。

其餘各衙門。應裁文武各缺。尚未據將籌辦情形具奏。應再申諭該大學士六部尚書侍郎及各省督撫等。凜遵前旨。將在京各衙門閒冗員缺。何者應裁。何者應併。速即切實籌議。外省道員以及同通佐貳等官。暨候補分發捐納勞績等項人員。認真裁併。並嚴行甄別沙汰。其各局所冗員。一律裁撤淨盡。本日據戶部代遞主事吳錫嵩條陳。內稱。漕督所轄衛所各官。既係武職。並無管帶漕標之兵。名實殊不相符。所有軍田。可以撥歸府州縣徵糧等語。此項人員。本在應行裁併之列。即著該督撫等。妥速議辦。並漕督一缺。究竟是否應裁。亦著兩江總督江蘇巡撫。一併詳議具奏。至京外已裁實缺候補各員。應如何分別錄用及飭令回籍候缺。均著妥議條款。請旨辦理。該大學士尚書侍郎督撫等。務當從速籌辦。不准稍事遷延。尤須破除積習。毋得瞻徇情面。用副朝廷綜核名實之至意。將此通諭知之。欽此。二十

上諭。總理各國事務衙門代奏道員汪嘉棠條陳。內稱。水旱偏災。地方官宜軫念民困等語。國家勤恤民隱。每遇各省奏報偏災。無不立沛恩施。分別蠲緩。乃任事各員。不免假手吏胥。因緣爲利。民間不獲盡沾實惠。甚至蠲緩謄黃。遲之又久。始行張貼。以致經徵入官之數。無可稽查。種種弊端。實堪痛恨。以後辦理賑務。印委各員。如有侵吞浮冒情事。即行嚴定罪名。外其各督撫常年具奏蠲緩分數。並奉到諭旨。即日刊刻謄黃。徧行曉諭。不得藉口於部文未到。稍有延擱。致滋弊竇。將此通諭知之。欽此。同日

上諭。胡燏棻奏。請造京西運煤鐵路一摺。西山一帶。所產烟煤。專備京城炊爨之用。向用駝運。費重價昂。該府尹現擬將蘆溝橋鐵路。展造至門頭溝。路既非遙。需款亦不過鉅。卽著該府尹。督飭洋工程師。趕緊履勘估計。籌款興辦。餘著照所議辦理。欽此。同日

上諭。總理各國事務衙門奏。遵議四川礦務。並該省京官等呈。請派員前往會辦一摺。四川礦務。商務。經前派往之翰林院檢討宋育仁開辦。業已稍有頭緒。惟該省產礦處所甚多。商務亦極繁盛。非大加興辦。不足以拓利源。著卽派雲南補用道韓銑。記名道李徵庸。會同翰林院檢討宋育仁。妥籌辦理。並准於新設商務局外。添設礦務局。所有集款開辦一切章程。卽著韓銑等。報明總理各國事務衙門。暨鐵路礦務總局核定。切實妥辦。以專責成。欽此。同日

上諭。刑部奏。代遞主事蕭文昭條陳一摺。中國出口貨物。以絲茶爲大宗。自通商以來。洋貨進口日多。漏卮鉅萬。恃此二項。尙堪抵制。乃近年出口之數銳減。若非亟爲整頓。恐愈趨愈下。益無以保此利權。蕭文昭所請。設立茶務學堂。及蠶桑公院。不爲無見。著已開通商口岸。及出產絲茶省分。各督撫。迅速籌議開辦。以阜民生。而固利源。欽此。二十日

上諭。侍讀學士瑞洵奏。南漕改折。有益無損。請飭妥議施行。及每年預提折價。於津通一律購米。以實倉

庚。並將衛弁屯田裁併。改由地方官徵租。各摺片。著派奕劻、孫家鼐會同戶部妥議具奏。欽此。二十日

上諭。日講起居注官黃思永奏。籌款試辦速成學堂一摺。京師大小學堂。業經先後降旨。諭令孫家鼐及五城御史分別舉辦。茲據奏稱。小學堂收效尙緩。大學堂事屬創舉。開辦不易。欲速不能。請自行籌款。設立速成學堂。以期收效等語。用意殊屬可嘉。著卽准如所請。籌款試辦。以爲之倡。果有成效。再行擴充。並當予以獎勵。著俟開辦後。查看情形。隨時具奏。欽此。同日

上諭。都察院代奏。四川舉人陳天錫等敬陳管見一摺。所請將大挑教習謄錄各項人員。於會試薦卷中挑取。及科甲候補人員。准其一體考差等語。著吏部禮部會同妥議具奏。欽此。同日

上諭。中書祁永膺奏。請將各省教職。改爲中小學堂教習一摺。著孫家鼐妥議具奏。欽此。同日

上諭。瞿鴻禨奏。江陰南菁書院遵改學堂。並將沙田試辦農學一摺。江陰南菁書院。經前學政黃體芳創設。考課通省舉貢生監。現既改爲學堂。著准其照省會學堂之例。作爲高等學堂。以資鼓舞。該書院原有自管沙田一項。據稱擬多用西法。樹藝五穀果蔬棉麻等項。將未經墾熟之地。先行試辦。如有實效。再行推廣等語。學堂農會相輔而行。洵爲一舉兩得之道。該學政此奏。具見籌畫精詳。留心時務。卽著照所議。認真辦理。務收實效。毋託空言。欽此。同日

上諭。刑部奏。代遞主事顧厚焜呈。請京城郵政廣設分局。都察院奏。代遞優貢沈兆禕呈。請推廣郵政。裁撤驛站各等語。京師及各通商口岸。設立郵政局。商民既據稱便。亟應多設分局。以廣流通。至各省府州縣。若能一律舉辦。投遞文報。必無稽遲時日之弊。其向設驛站之處。自可酌量裁撤。著總理各國事務衙門。會同兵部。妥議具奏。欽此。同日

上諭。瑞洵奏。徧設報館。實力勸辦。一摺。報館之設。原期開風氣而擴見聞。該學士所稱。現在商約同志於京城創設報館。繙譯新報。爲上海官報之續等語。卽著瑞洵創辦。以爲之倡。此外官紳士民。並著順天府府尹五城御史。切實勸諭。以期一律舉行。欽此。同日

上諭。瑞洵奏。請考試司員等語。司員暨否。爲任職授事所關。曾經諭令各部院堂官考試。著卽凜遵諭旨。認真試以策論。秉公分別去取。筆帖式亦著一律考試。又編修錫麟奏。整頓部務。擬令司員逐日到署。辦事擬稿。藉覘司員優劣等語。所言尙屬核實。著各部院堂官。亟行認真整頓。欽此。同日

上諭。總理各國事務衙門會同兵部奏。遵議武場改制事宜一摺。朕詳加批覽。所擬章程。尙有未能詳備之處。著軍機大臣。會同總理各國事務衙門兵部。再行分別條款。詳議具奏。欽此。同日

上諭。國家振興庶政。兼采西法。誠以爲民立政。中西所同。而西人考究較勤。故可以補我所未及。今士大

夫昧於域外之觀者。幾若彼中全無條教。不知西國政治之學。千端萬緒。主於爲民開其智慧。裕其身家。其精乃能美人性質。延人壽命。凡生人應得之利益。務令推廣無遺。朕夙夜孜孜。改圖百度。豈爲崇尚新奇。乃眷懷赤子。皆

上天之所畀。

祖宗之所遺。非悉使之康樂和親。朕躬未爲盡職。加以各國環交迫伺。尤非取人之所長。不能全我之所。有朕用心之苦。而黎庶猶有未知。職由不肖官吏。與守舊之士大夫。不能廣宣朕意。乃反胥動浮言。彼小民搖惑驚恐。山谷扶杖之民。有不獲聞新政者。朕實爲歎恨。今將變法之意。布告天下。使百姓咸喻朕意。共知其君之可恃。上下同心。以成新政。以強中國。朕不勝厚望。著查照四月二十三日以後。所有關乎新政之諭旨。各省督撫。均迅速照錄。刊刻謄黃。切實開導。著各州縣教官。詳切宣講。務令家喻戶曉。各省藩臬道府。飭令上書言事。毋事隱默。顧忌其州縣官。應由督撫代遞者。卽由督撫將原封呈進。不得稍有阻格。總期民隱盡能上達。督撫無從營私作弊。爲要。此次諭旨。並著懸掛各省督撫衙門大堂。俾衆共觀。庶無壅格。欽此。

同日

上諭。岑春煊奏。徐海等處被災。嚴飭州縣。不准諱匿苛斂等語。各省小民。孰非朝廷赤子。遇有災祲。飢饉

流離朕一人耳目難周。全賴地方官撫綏賑濟。以蘇民困。若如所奏江南徐海等處上年水災。各州縣並未據寔詳報。仍將漕米苛收各節。如果屬實。不知該牧令是何肺腸。惟不肖官吏玩視民瘼。恐不止江蘇一省。著兩江總督確切查明。如有諱匿苛斂情事。卽行嚴參懲辦。並著各省督撫嚴飭各州縣等。如或徂於積習諱災不報。亦當隨時嚴參。以副朕痾癘在抱之至意。欽此。同日

上諭前因振興庶務。首在革除壅蔽。當經諭令各衙門代遞事件。毋得拘牽忌諱。嗣因禮部阻格司員王照條陳。當將懷塔布等予以重懲。復先後諭令都察院及各衙門隨到隨遞。不必拘定值日之期。誠以百度維新。必須明目達聰。始克收敷奏以言之效。第恐大小臣工。狃於積習。不能實力奉行。用再明白宣諭。以後各衙門有條陳事件者。次日卽當呈進。承辦司員稍有抑格。該部院堂官立卽嚴參懲辦。不得略予優容。所有六月十五日七月十六日諭旨。七月十九日硃諭。七月十七日及二十四日交片諭旨。均令各衙門錄寫一通。同此件諭旨一併懸掛大堂。俾其觸目警心。不致復萌故態。以示朕力除壅蔽之至意。欽此。同日

旨昨已明降諭旨。令各省藩臬道府均得上書言事。其州縣條陳事件。應由督撫將原書代遞。卽著各省督撫傳知藩臬道府。凡有條陳。均令其自行專摺具奏。毋庸代遞。其州縣等官言事。仍由督撫將原封呈

遞。至士民有欲上書言事者。卽徑由本省道府等。隨時代奏。均不准稍有抑格。如敢抗違。或別經發覺。定將該省地方官。嚴行懲處。仍將遵辦情形。迅速電奏。欽此。二十日

上諭。都察院代奏。舉人張如翰呈。請設農學科等語。著禮部會同孫家鼐。端方等議奏。欽此。同日

上諭。軍機大臣等。議覆袁昶條陳。請籌八旗生計等語。旗丁生齒日繁。徒以格於定例。不得在外省經商貿易。遂致生計日艱。從前富俊松筠沈桂芬等。均曾籌議及之。現當百度維新。允宜弛寬其禁。俾得各習四民之業。以資治生。著戶部詳查嘉慶道光年間。徙戶開屯計口授田成案。切實訂立新章。會同八旗都統。迅速奏明辦理。欽此。二十九日

上諭。軍機大臣等。議覆袁昶條陳。請清理屯田等語。屯衛之設。昉於明代。本所以養兵實邊。至國初屯軍次第裁汰。惟有漕運省分。仍隸衛所。乃專爲衛運之計。現在漕糧既歸海運。衛所半屬虛懸。若改衛爲屯。徵租充餉。於國用不無裨益。著兩江湖廣浙江各督撫。通飭所屬。澈底清查。各衛所屯田地畝。實在數目。詳定徵租章程。迅速奏明。請旨辦理。欽此。同日

上諭。翰林院奏。代遞庶吉士丁惟魯請將歲入歲出表。頒行天下一摺。戶部職掌度支。近年費用浩繁。左支右絀。現在力行新政。尤須寬籌經費。以備支用。朕惟古者。冢宰制國用。量入爲出。以審歲計之盈虛。近

來泰西各國皆有預籌用度之法。著戶部將每年出款入款分門別類列爲一表。按月刊報。俾天下咸曉。然於國家出入之大計。以期節用豐財。蔚成康阜。朕實有厚望焉。欽此。八月初一日

上諭戶部奏代遞主事蔡鎮藩請審官定職以成新政一摺。朕詳加披覽。除御史規復巡按舊制。各關監督改爲關道。兩節應無庸議外。其餘所陳各條。具有條理。深得綜核名實之意。可以見諸施行。著軍機大臣會同大學士各部院並翰林科道各官詳議具奏。欽此。同日

上諭現在練兵緊要。直隸按察使袁世凱辦事勤奮。校練認真。著開缺以侍郎候補。責成專辦練兵事務。所有應辦事宜。著隨時具奏。當此時局艱難。修整武備。實爲第一要義。袁世凱惟當勉益加勉。切實講求訓練。俾成勁旅。用副朝廷整飭戎行之至意。欽此。同日

上諭工部主事康有爲前命其督辦官報局。此時聞尙未出京。實堪詫異。朕深念時艱。思得通達時務之人。與商治法。聞康有爲素日講求。是以召見一次。令其督辦官報。誠以報館爲開民智之本。職任不爲不重。現已籌有的款。著康有爲迅速前往上海。毋得遷延觀望。欽此。初二日

上諭劉坤一奏遵保使才一摺。江蘇補用道錢德培。特用道阮祖棠。記名道羅嘉杰。試用道陶森甲。候補道沈敦和。安徽候補道張佩緒。著該督撫卽飭各該員來京預備召見。欽此。同日

上諭。劉坤一奏。遵保人才一摺。江蘇試用道劉思訓。江蘇候補知府袁樹勛。江蘇候補道丁葆元。江蘇候補知州章邦直。著該督撫。卽飭各該員。來京預備召見。另片奏保之河南候補道易順鼎。卽著劉坤一。傳知該員。一併來京預備召見。欽此。同日

上諭。吏部奏。遵議處分一摺。雲貴總督崧蕃。應得降二級調用處分。著加恩改爲革職留任。滇黔地屬巖疆。督臣責任綦重。現當振興庶務。該省開辦各礦。以及整頓武備。創設學堂。並農工商務諸大端。均係自強要策。現在雲南巡撫。業經裁併。該督責無旁貸。務當振刷精神。於用行政一切事宜。破除積習。俾有成效。可觀。方不負朝廷曲予成全之至意。欽此。初四日

上諭。孫家鼐等奏。順天擬設中學堂一摺。京師爲首善之區。允宜多設學堂。以繫四方觀聽。所擬就順天府屬州縣中。調取廩增附生。入堂肄業。考定額取四十名。又另設外省士子南額二十名。課以西國語言文字。以及藝政算學各書。所擬章程。尙屬切實。卽著照所議行。惟經費必須寬爲籌備。著於現解順屬湖南漕折備荒經費項下。撥銀八千五百兩。作爲學堂之用。以垂久遠。另片奏。請於地安門外兵將局。撥給官房等語。卽著內務府。將該處官房。撥給順天府。設立首善中學堂。用示作育人才之至意。該部知道。欽此。同日

上諭。孫家鼐奏。四川京官四品卿銜內閣候補侍讀楊銳等呈。請於京師設立蜀學堂。專教京員子弟及留京舉貢生監。據呈代奏一摺。川省地屬邊遠。學堂規模。誠未易遽臻美備。現經該省京員。就京師建立學堂。以開風氣。京員舉貢。學業有成。即可爲鄉里師資。所擬辦法。亦甚切實。楊銳等均著傳旨嘉獎。所有捐銀二萬兩之二品頂戴記名道李徵庸。關心時務。慨輸鉅款。洵屬好義急公。著賞給頭品頂戴。直隸津海關道李岷琛。捐銀二千兩。雲南候補道韓銑。兵部主事陳時利。各捐銀一千兩。著一併傳旨嘉獎。餘著照所議辦理。該部知道。欽此。同日

上諭。前經降旨。諭令總理各國事務衙門。編輯通商約章。頒行各衙門。以便遵守。茲據該衙門奏稱。編輯需時。請先將北洋原有條約彙纂一書。刷印頒行等語。卽著照所請行。仍著咨行各直省將軍督撫。先行派員。赴北洋請領。以便飭屬認真講求。遇事得有依據。仍俟該衙門編輯成書。再行補發。至此項通商約章。事事皆關交涉。該衙門務須遴選熟習條約之員。悉心考訂。以成善本。而免流弊。餘依議。欽此。同日

上諭。州縣爲親民之官。必須才守兼優。庶無愧父母斯民之任。近來督撫往往意存遷就。不復從嚴考核。甚至著名要缺。或以調劑私人。不思庸劣者濫厠仕途。賢能者轉多屈抑。殊非綜核名實之道。該督撫等受國重寄。必當以更治民生爲重。以後無論實缺署任。均須爲地擇人。不可爲人擇地。如有疲庸不肖之

員隨時甄別。務期仕途澄清。官方共飭。用副朝廷察吏安民之至意。欽此。初五日

上諭。現在國事艱難。庶務待理。朕勤勞宵旰。日綜萬幾。兢業之餘。時虞叢脞。恭溯同治年間以來。

慈禧端佑康頤昭豫莊誠壽恭欽獻崇熙皇太后兩次垂簾聽政。辦理朝政。宏濟時艱。無不盡美盡善。因

念宗

社爲重。再三籲懇

慈恩訓政。仰蒙

俯如所請。此乃天下臣民之福。由今日始。在便殿辦事。本月初八日。朕率諸王大臣。在勤政殿行禮。一切應行禮儀。著各該衙門。敬謹預備。欽此。初六日

上諭。朕躬自四月以來。屢有不適。調治日久。尙無大效。京外如有精通醫理之人。卽著內外臣工。切實保薦。候旨。其現在外省者。卽日馳送來京。弗稍延緩。欽此。初十日

機器製造貨物。懇緩加稅。並請免儲關棧疏

湖廣總督張之洞

奏爲兩湖商務風氣初開。華商用機器製造貨物。懇請從緩加稅。並請改定存儲關棧章程。以勸商業。而

裕民生。恭摺仰祈 聖鑒事。竊光緒二十二年五月總理各國事務衙門具奏機器製造貨物酌定稅則。奉 旨允准。續據總稅務司酌擬章程九條。經總署核定。由南北洋大臣通行各關在案。伏查光緒八年北洋大臣奏准上海織布局只完正稅一道。概免沿途稅釐。此後各省機器紡織皆援此例。此聖主愛養民生之深仁。而卽古來興國者通商惠工以致富強之至計。天地覆載感頌同聲。從此中華商務駸駸漸有生機矣。此次加稅之舉。在總署原意謂洋商得在中國設廠造貨。人工運費種種省便。利益甚優。故議酌加稅則。洋商既加。則凡華商用機器造貨亦應一律照加。以免洋商藉口。此總署謀國裕課統籌中外之深心。臣雖至愚亦能領解。特是詳察商情。知機造各貨加稅一層不免有損多益少之病。有不敢不爲我皇上陳之者。溯自馬關定約以後。臣在署南洋通商大臣任內。欽奉閏五月十三日電旨。飭令招商多設織布織綢等局。廣爲製造。臣當卽宣布德意。率屬勸諭招徠。中國商民知外人得來內地設廠造貨。莫不感慨奮發。思有以防內蠹外漏之患。而又深悉朝廷恤商輕稅之章。其議集股分圖占先著者頗不乏人。凡各處稟請購器造貨者。臣多從允准。目爲之籌備。廠地歸併釐稅計畫銷路曲意維持。江南江北系各廠更屢次奏明助給官本總冀厚集商力以挽外溢之利源。計數年以來江浙湖北等省陸續添設紡紗縲絲烘繭各廠約有三十餘家。此外機造之貨蘇滬江甯等處有購機製造洋酒

洋蠟火柴礪米自來水者。江西亦有用西法養蠶繅絲之請。陝西現已集股開設機器紡織局。先遣人來鄂。考求工作之法。四川則已購機創煉煤油。並議立洋燭公司。山西亦集股興辦煤鐵。開設商務公司。至於廣東海邦。十年以前。卽有土絲洋紙等機器製造之貨。近年新增必更不少。天津煙臺更可類推。湖北湖南兩省。已均有購機造火柴及榨棉油者。湖北現已考得機器製茶。機器造塞門。聽土之法。正在督飭稅務司。勸諭華商興辦。湖南諸紳現已設立寶善公司。集有多股。籌議各種機器製造土貨之法。規模頗盛。似此各省氣象日新。必且愈推愈廣。彼洋商雖亦聲稱集鉅資設大廠。而迄今造就者。只上海二三家。他處未之有也。無如華商智慮初開。行銷未廣。已成之廠獲利無多。未成之廠集資非易。洋商見我工商競用新法。深中其忌。百計阻抑。勒價停市。上年江浙湖北等省繅絲紡紗各廠。無不虧折。有歇業者。有推押與洋商者。以後華商有束手之危。洋商成獨攬之勢。商民延頸舉踵。正以寬恤保護之法望之。朝廷兩湖風氣初開。商力甚薄。尤爲惴惴。此近年來商務之實在情形也。臣愚以爲洋商在內地改造土貨。本於華商生計有妨。是以舊約懸爲厲禁。今迫於事勢不得已而允之。則又當就已成之局。而熟權利弊。庶免我華商民有累上加累之虞。竊謂今日各洋廠設否聽之。而華商機器製造之稅如故。洋商開一廠。則華工習一法。洋商創一貨。則華民曉一用。大抵華商性情憚於精思創物。而樂於摹仿爭利。華商用度較

儉土產戰熟足可與之相勝果使華商本輕利穩愈開愈多洋商見華廠已經充物利息愈分愈薄則續開者自少卽如湖北織布局一開而江漢關進口之洋布已歲少十餘萬匹可爲明徵目前華廠已將十倍於洋廠是機器製造之利洋商得其二華商得其八且就華洋各廠合計出貨自多稅額雖輕稅數必溢此有益於民生而仍有益於國計者也卽使洋廠因稅輕而爭開不已然洋廠所獲之優利亦華廠之所同沾其出貨之數分利之勢自足相敵且洋商所在其一切物料必取之中國工匠亦取之中國轉移閭民亦必資之中國彼洋商所得者商本盈餘之利而其本中之利留存於中國者仍復不少是華商之利雖去其半而中國農工畝漁之利仍得其全華民沾其利又曉其工則華商購機製造之廠必不能絕從古未有農工盛而商獨衰者此目前不求有益於國計而必無損於國計且尙不盡有損於民生者也至於華商鼓舞方見萌芽之時遽行加稅則華商困阻於內洋商抑勒於外數年之間已成者歇業未開者絕響是九州之地產物力萬國之巧法厚利盡爲洋商壟斷之資如謂明文則一體加稅暗中則曲予維持目前中華局勢外洋情形竊恐未能辦到且洋商之究肯加稅與否亦尙不知何時而華商則已先敝矣卽使洋商於華造者遵加而其來自外洋者仍不能加明知華商不能再開機廠則不造於中華而專造之於本國銷流日廣貨價日增徒存內地製造加稅之虛名而受華商阻塞利源之實害此

有損於民生而仍無益於國計者也。從來華民最樸不曉物宜。華工最拙不諳機器。華商最散不籌鉅本。是以拘守舊法坐棄萬物之菁華不究阜財之大用。今幸而鑒於鉅創。恍於強鄰。一旦幡然捐棄故智。爭購機器。暢土貨集公司之法。正是中華自振之機。若再從而扼之。以後更復何望。私愛過計不勝悚懼。近日與江蘇巡撫臣趙舒翹浙江巡撫臣廖壽豐往返電商均以暫緩加稅爲保護華商之至計。合無仰懇天恩。飭下總理衙門將機器造貨值百抽十之新章暫行緩辦一俟商務大盛而各國又一體允加進口稅之時再行舉辦。彼時洋貨價漲華貨即使加稅尙足相抵而目前無不能自立之患大局幸甚。又總稅務司所擬章程第二條凡有製造之貨均須一律存儲關棧候撥等語。在總稅務司之意只爲杜絕偷漏。然商民成貨待價而沽瞬息變易有失之須臾而盈虧迥判者。又如機器造軋機器碾米機器造水泥火泥此等笨重之物如何搬運如何封存。又如機器造煤油機器造火柴此等危險之物同棧之貨孰不畏其延累設有損失恐洋關賠不勝賠矣。大抵商情樂簡而惡繁喜活便而畏膠滯若一概存儲關棧交貨看貨動須報關即使不至留難而貨主既嫌經官之周折又不如本廠自存之放心種種窒礙必致紛紛歇業至洋商則仍出納自如此明力窒華商之生機而暗暢洋商之銷路矣。竊謂宜在運貨出口時切實查驗不在貨成後概予封藏。應請併飭稅務司重改章程方爲妥善此乃農工商民公共之

利害中外。貧富強弱之樞機。臣爲自強大局。力固根本。起見。反覆焦思。不敢不言。所有機器製造土貨。懇請暫緩加稅。並貨物免儲關棧各緣由。理合恭摺具呈。是否有當。伏乞 皇上聖鑒。謹 奏。

遵議機器製造土貨加徵值百抽十稅章暫可緩辦片

總理衙門王大臣

再。臣衙門於光緒二十三年正月二十八日。准軍機大臣抄交。司業黃思永片。稱。自有加收貨稅。值百抽十之議。商情瓦解。上海華商。有將自立紡紗繅絲等廠。售與洋人。免虧血本者。紗絲若此。餘可類推。近年仿用機器。改造土貨。原欲以華敵洋。收回利權。華商虧折太甚。勢必紛紛閉歇。低昂物價之權。盡歸洋商等語。奉 諭旨。著該衙門議奏。欽此。臣等查光緒二十二年五月二十一日。臣衙門奏。請酌定機器製造貨物稅章一摺。原因允准洋商製造土貨之後。不能指爲中國土貨。隨地征收稅釐。若不加重離廠稅課。則洋商改造土貨成本。既輕獲利必厚。中國土貨必致滯銷。是值百抽十之議。原所以抑洋商之利權。保華商之生計。嗣於光緒二十三年正月內。准浙江巡撫廖壽豐電稱。製造征稅新章。係爲洋商預立專案。但華商資本支絀。風氣尙未大開。若驟加征稅項。商務恐難振興。擬請暫緩開辦。以紓商力。俟洋商加稅時。然後一體征收等語。臣等以此項章程。原爲抵制馬關條約。准日本製造土貨起見。續與日本使臣林董定議。任聽中國征稅。惟不能較華商有所增益。是日本從前不允納正稅之說。業經爭回。此項征收華

商製造土貨章程暫可緩辦。當經電復浙江巡撫并電南洋大臣暨札行總稅務司在案。茲據該司業奏請從長計議。臣等詳加商酌。自應仍照臣衙門電復浙江巡撫緩征原案辦理。操縱可以自如。統俟洋商開辦機器廠時。華洋一體征稅。以免洋商藉口。謹附片覆陳。伏乞 聖鑒訓示。謹奏。

議准書院改章並准鄉會歲科各試兼考時務策論疏

管理禮部事務崑岡等

奏為遵 旨議奏事。光緒二十二年八月二十四日。軍機處片交本日。翰林院侍講學士秦綬章奏。請整頓各省書院。預儲人才一摺。軍機大臣面奉 諭旨。著禮部議奏。欽此。鈔錄原奏到部。查原奏內稱。國勢之強弱。視乎人才。人才之盛衰。關乎學校。欲補學校所不逮。而切實可行者。莫如整頓書院之一法。各省書院之設。每府州縣多或三四所。少亦一二所。其陶成後進為最多。其轉移風氣亦甚捷。整頓書院約有三端。一曰定課程。宋胡瑗教授湖州。以經義治事。分為兩齋。法最稱善。宜仿其意。分類為六。曰經學。經說講義。訓詁附焉。曰史學。時務附焉。曰掌故之學。洋務條約稅則附焉。曰輿地之學。測量圖繪附焉。曰算學。格致製造附焉。曰譯學。各國語言文字附焉。士之肄業者。或專攻一藝。或兼習數藝。各從其便。制藝試帖未能盡革。每處留一書院。課之已足。一曰重師道。書院山長必由公舉。不論爵位年歲。惟取品行端方。學問淵博。為眾望所推服者。其算學譯學目前或非山長所能兼。則公舉諸生中之通曉者各一人。立為齋

長以分課之。而仍秉成於山長。省會書院規模較廣。山長而下。兼設六齋之長。分廛列舍。與諸生講習其中。一曰覈經費。書院或田畝徵租。或公款生息。或官長捐廉。或紳富樂助。皆有常年經費。卽或僻陋之區。容有不足。就本地公款酌撥。亦屬爲費無多。此整頓書院之大概章程也。蓋經學爲綱常名教之防。史學爲古今得失之鑒。掌故之學。自以本朝會典律例爲大宗。而附以各國條約等類。則折衝樽俎。亦於是儲其選焉。輿地尤爲今日之急務。地球圖說。實綜大要。其次各府州縣。以土著之人。隨時考訂其邊界要隘。水道土宜。言之必能加詳。再授以計里開方之法。繪圖貼說。選成善本。尤能補官書所未備。算學一門。凡天文地理。格致製造。無不以此爲權輿。譯學不獨爲通事傳言。其平日並可繙譯西學書籍。以資考證。若夫武備水師機器礦務等學堂。則必於江海衝要之地。都會繁盛之區。統籌大局。以次振興。固非書院之所能賅。而其端實基於此等語。臣等查各省建立書院。本爲育才之地。本年山西巡撫胡聘之奏。請變通書院章程。併課天算格致等學。奉旨允准。經臣部通行各省在案。又刑部侍郎李端棻奏。請推廣學校。量加書院課程。亦經總理衙門議准有案。近日各省整頓書院。其見諸奏報者。如江西之酌裁友教書院童卷。移設算科。陝西之創設格致實學書院。均經議有章程。今該侍講學士所擬定課程。重師道。覈經費。各條亦爲實事求是起見。應請一併通行各省。督撫學政參酌。采取以擴舊規。而收實效。又原奏內稱。

學成必期於致用。設科尤貴乎得人。今擬於考試之中。略仿選舉之法。凡各屬書院肄業諸生。中有學業成就。超越等倫者。由山長會同府縣。咨送省會書院。甄別入院肄業。再於省會拔其尤。由山長咨送學政存記。其童生。卽由學政歲科酌量取進。貢監諸生。則於鄉試時。由學政造冊咨送監臨。於卷面編號外。另加標識。如經學史學等字樣。或經學兼某學等字樣。以待考官酌定取中。三場策問。經史而外。本得以掌故輿地爲問。可著爲定式。並略弛時務之禁。其算學譯學。由學政咨送總理各國事務衙門。予以正途進身之階。或別設專科等語。查光緒十三年。御史陳瑋奏。請將明習算學人員。量予科甲出身。經臣部會同總理各國事務衙門。議以試士之例。未容輕議變更。而求才之格。似可量爲推廣。擬令各省學臣。於歲科試時。生監中有報考算學者。除正場仍試以四書經文詩策外。其考試經古場內。另出算學題目。果能通曉算法。卽將原卷。咨送總理各國事務衙門。覆勘註冊。俟鄉試之年。按冊咨取。赴總理衙門。試以格物測算。及機器製造。水陸軍法。船礮水雷。或公法條約。各國史事諸題。其明通者。錄送順天鄉試。不分滿合貝皿等字號。如人數在二十名以上。統於卷面加印算學字樣。與通場士子一同試。以詩文策問。比照大省官卷定例。每二十名。於額外取中一名。但能文理清通。卽爲合式。卷數雖多。亦不得過三名。以示限制等因在案。乃自議准以後。祇十四年戊子科鄉試。報考算學者三十二人。照章取中舉人一名。此後。歷科

鄉試均以不滿二十名散入大號。推原其故。厥有二端。一以各省學堂之設。所肄習者。不過繙繹之事。製造測繪之能。而不讀詩書。未諳功令。雖觀光有志。終不免就試乏人。一以天姿英敏之人。制藝之外。力能兼通西學。一經編入算學。雖有佳文。反致限於額數。不能取中。遂各不願報考。現議整頓書院。采西學之長。而仍以中學爲根柢。體用兼備。洵足以儲遠大之材。惟如該侍講學士所奏。諸生中學業有成者。鄉試時。由學政造冊咨送監臨。於卷面另加標識。經學史學等字樣。待考官酌定取中等語。接之科場條例。殊多窒礙難行。至算學譯學。別設專科。尤非一時所能遽議。臣等公同商酌。擬仍查照光緒十三年會議成案。各省生監。有通曉算法及格致等學者。由學政考取。咨送總理各國事務衙門。覆加考驗。錄送順天鄉試。不分滿合貝皿等號。均編入算學字號。與通場士子一同試。以詩文策問。每二十名取中一名。如果人數衆多。文理優長。應請毋庸拘定三名限制。以廣其登進之路。至三場試策。一切時務。並無例禁。命題明文。嗣後鄉會試策問。應准考官兼問時務。除語涉譏刺。標榜仍屏斥不錄外。如有精通中外各學。而議論恢闊。實能自抒所見者。卽首次場文字稍平。亦准酌量取中。又學政經古場內。已有考試算學之例。並令兼試時務策論。錄取者。予以補廩入泮。其省會書院肄業各生。有學問淵通。材藝卓著者。准由山長隨時咨送學政存記。此外考選優生及選拔各場。亦以通經致用爲主。不得仍沿舊習。專於詩賦楷法中求。

材以上各節亦第就科舉成法量爲擴充而推行尙無流弊該督撫學政等果能留心培植甄拔真材風氣既開人才亦覺日出矣所有臣等遵議緣由是否有當伏乞 皇上聖鑒訓示遵行爲此謹 奏

遵議開辦京師學堂情形疏

總理官書局事務工部尙書孫家鼐

奏爲遵籌京師建立學堂大概情形懇 恩撥款開辦恭摺覆陳仰祈 聖鑒事光緒二十三年七月十三日准總理各國事務衙門咨開議覆刑部左侍郎李端棻奏請推廣學校以勵人才摺內京師建立大學堂一節係爲擴充官書局起見請 飭下管理書局大臣察度情形妥籌辦理等因奉 旨依議欽此欽遵咨行到局臣查本年正月總署原奏請立官書局本有建設學舍之說臣奉 命管理書局所奏開辦章程亦擬設立學堂延請教習是學堂一議本總署原奏所已言亦卽官書局分內應辦之事刻下開辦書局時近半年各處咨取書籍譯印報章草創規模粗有眉目惟苦於經費不足祇能略添儀器訂購鉛機蒐求有用之圖書採摭各邦之郵電俾都人士耳目見聞稍加開拓而已若云作育人才儲異日國家之大用則非添籌經費分科立學不爲功獨是中國京師建立學堂爲各國通商以來僅有之創舉苟僅援前此官學義學之例師徒授受以經義帖括獵取科名亦復何裨大局卽如總署同文館各省廣方言館之式斤斤於文字語言充其量不過得數十繙譯人才而止福建之船政學堂江南製造局學堂

及南北洋水師武備各學堂。皆囿於一材一藝。卽稍有成就。多不明大體。先厭華風。故辦理垂數十年。欲求一緩急可恃之才。而竟不可得者。所以教之之道。固有未盡也。此中國舊設之學堂。不能仿照辦理也。泰西各國。近今數十載。人才輩出。國勢驟興。學校徧於國中。威力行於海外。其都城所設之大學堂。規模閎整。經費充盈。教習以數百計。生徒以數萬計。其學有分四科者。五科者。六科者。仍廣立中學小學。以次遞升。暗與中國論秀書升之古制相合。遂以爭雄競長。凌抗中華。學羣才取之宮中。而皆備非僅恃船堅礮利爲也。當茲事變日多。需才孔亟。以蓄艾臥薪之意。爲懲前毖後之方。亟應參仿各國大學堂章程。變通辦理。以切時用。第各國分科立學。規制井然。而細繹其用心致力之端。終覺道器分形。略於體而詳於用。故雖勵精圖治。日進富強。而雜霸規爲。未能進於三代聖王之盛治者。亦其學限之耳。況外國學校經費充溢。千狐集腋。非一日所成。驟欲一蹴而幾安得有此財力。此外國大學堂之法。亦有不能全行仿辦者也。臣與在局諸臣。悉心籌議。深知此事定制之難。創始之不易。且中華堂堂大國立學。京師尤四海觀瞻之所繫。一或不慎。則徒招譏議。無補時艱。反不如不辦之爲愈矣。刻仍內外函商。周咨博訪。務求悉臻美善。以期仰副聖明。謹先將現在籌辦大概情形。臚爲六事。縷析爲我皇上陳之一曰。宗旨宜先定也。中國五千年來。聖神相繼。政教昌明。決不能如日本之舍己芸人。盡棄其學而學西法。今中國京師。

初立大學堂。自應以中學為主。西學爲輔。中學爲體。西學爲用。中學有未備者。以西學補之。中學有失傳者。以西學還之。以中學包羅西學。不能以西學凌駕中學。此是立學宗旨。日後分科設教。及推廣各省。一切均應抱定此意。于變萬化。語不離宗。至辦理章程。有必應變通。盡利者。亦不得拘泥跡象。局守成規。致失因時制宜之妙。二曰學堂宜豫造也。書局初開。爲節省經費起見。暫賃民房。一切已多不便。今學堂將建。則講堂齋舍。必須爽塏宜人。儀器圖書。亦必度藏合度。泰西各國使署。密邇中國。初立學校。亦將相率來游。若湫隘不堪。適貽外人笑柄。擬於京師適中之地。擇寬曠地。或購民房。初建學堂。以崇體制。先建大學堂一區。容大學生百人。四圍分建小學堂四所。每學容小學生三十人。堂之四周。仍多留隙地。種樹蒔花。以備日後擴充。建設藏書樓博物院之用。三曰學問宜分科也。京外同文方言各館。西學所教。亦有算學格致諸端。徒以志趣太卑。淺嘗輒止。歷年既久。成就甚稀。不立專門。終無心得也。今擬分立十科。一曰天學。科算學附焉。二曰地學。科礦學附焉。三曰道學。科各教源流附焉。四曰政學。科西國政治及律例附焉。五曰文學。科各國語言文字附焉。六曰武學。科水師附焉。七曰農學。科種植水利附焉。八曰工學。科製造格致各學附焉。九曰商學。科輪舟鐵路電報附焉。十曰醫學。科地產植物各化學附焉。總古今包中外。該體用貫精粗。理索於虛事徵諸實。立格以待奇傑。分院以度圖書風會。既開英才。自出所謂含宏光。

大振天網以賅之也。雖草創規模未能開拓而目張綱舉已爲萬國所無他日并包六合之機權與於是矣。四曰教習宜訪求也。大學堂內應延聘中西總教習各二人。中國教習應取品行純正學問淵深通達中外大勢者雖不通西文可也。外國教習須深通西學兼識華文方無扞格如實難其選則擬先聘一人修脯必豐禮敬必備中西教習一律從同此燕昭築黃金臺以待天下賢士之意也。四小學堂每堂延中西教習各一人亦須學正品端足爲師表者乃膺其選。西師所教先以英法方言如能兼習德俄尤便繙譯書籍應俟屆時察酌辦理。五曰生徒宜慎選也。大學堂學生年以二十五歲爲度以中學西學一律賅通者爲上等中學通而略通西學者次之。西文通而粗通中學者又次之。仍分三班發給薪水頭班月八金二班六金三班四金由同文方言各館調取內外各衙門咨送及舉貢生監曾學西文者自行取結投考惟中西各學均須切實考驗第其優劣分別去留仍須性行溫純身家清白方能入選。四小學之學生年以十五歲爲度便於習學語言。初辦時額數無多暫由滿漢各官員子弟中報名投考亦須中文粗通識字稍多者方能入選。不足再出示招考由鄉鄰具結確係讀書世家乃准與考。考取入學自備薪水不出束脩數年後中西各學俱通升入大學堂始給薪水以示鼓勵。六曰出身宜推廣也。學而不用養士何爲用違其才不如不用中國素重科目不寬予以出身之路終不能鼓舞人才擬參酌中西特闢三途以

資激勵一曰立科光緒甲申禮部議覆潘衍桐摺請立算學一科以二十名取中一名然屢屆人數均不滿額擬援此例立時務一科包算學在內鄉會試由大學堂咨送與考中式名數定額宜寬應俟學堂規模大定之時請旨辦理一曰派差學生應試不中者由學堂考驗仿西例獎給金牌文憑量其所長咨送總署派往中國使館充當繙譯隨員或分佈南北洋海軍陸軍船政製造各局幫辦一切以資閱歷三曰分教泰西各國有所謂師範學堂者專學爲師大學堂學生如不能應舉爲官考驗後仿泰西例獎給牌憑任爲教習各省立學之始皆先向京師大學堂咨取充當則師資有自俯仰無憂京外各學堂亦可聯爲一氣矣此大事者準今酌古原始要終實已兼包中外以後詳細辦法或應行推廣一切未盡事宜容當博采羣言隨時奏明請旨惟是開辦之始籌款爲先泰西各國學校歲需幾與官俸兵餉相等有多至華銀八千餘萬兩者英京大學堂歲支九百萬鎊故爾規模閎整俊彥雲興中國總署同文館歲費二十餘萬兩天津醫學堂歲費十萬兩各省同文方言各館水師武備各堂歲費十餘萬數萬兩不等大抵草率狹隘日久因循卒未聞成就一人足以上濟國家之急固緣辦理之未善亦苦於經費之不敷今京師勸立大學堂款太多則籌措維艱款太少則開銷不足思維再四所夕旁皇伏念學堂一事屢經臣工條奏明旨飭行良以時局多艱亡羊補牢非有人才不能自立今設學堂於輦轂之地耳目近接

稽察易周臣等仍當慎選真才力求核實以上副聖主寤寐求賢之至意內外諸臣受恩深重以人事君之素志具有同心豈宜惜此區區致撓盛舉應請旨飭下戶部飛咨南洋大臣無論何款按月各撥銀五千兩解交戶部作為京師學堂專款自奉旨之日為始由臣飭派局員按月領取俾得從容布置刻期一載當可告成此款比之泰西固屬泰山之毫末即較之各省學堂同文各館亦尚係酌中之數得半之閒而不敢斤斤於體制所存率請多撥者實以無徵不信初始維艱俟他日成效已彰人才漸出續行奏請添撥款項廣置生徒以漸推行於各省庶循名責實慎始圖終海宇傾風賢才輩出師師濟濟為國干城內治外交永不必借材異地此則皇上之洪福臣等之素心抑亦宗廟社稷之神靈所默為呵護者也所有籌議學堂大概情形及請撥銀款開辦緣由謹繕摺上陳伏乞皇上聖鑒訓示謹奏

議准考試策問引用 本朝人名書名疏

禮部

奏為遵旨議奏事光緒二十二年十二月十七日軍機處交出給事中褚成博奏考試策問請准引用本朝人名書名一片軍機大臣面奉諭旨禮部議奏欽此欽遵到部查原片內稱科場條例第三場不得以本朝臣子學問人品策問士子乃近來試官誤會例意竟將人名暨所著書名概禁引用以致

士子動多避忌。恆有引其言而匿其名者。請飭部申明例意。嗣後各項考試策問。凡本朝人名書名。悉聽引用。惟不准逞其臆見。妄肆褒議等語。臣等查鄉會試第三場策問。不准涉及本朝臣子人品學問。原以防黨同攻訐之風。惟溯我國家右文制治。代有名儒所著各書。非無援古證今。堪資博採者。若使概禁引用。則士子臨場避忌。轉不能剴切敷陳。臣等公同商酌。應如該給事中所奏。嗣後考試策問。但求學識淹通。卽本朝臣子人名書名。亦聽引用。惟不准逞其臆見。妄肆褒議。以符定制。所有臣等遵議緣由。是否有當。謹恭摺具奏。請旨。

遵議各省添設學堂切實辦法疏

總理各國事務衙門等

奏爲遵旨議奏事。光緒二十三年正月十二日。軍機處抄交。安徽巡撫鄧華熙奏。籌議添設學堂。酌擬切實辦法一摺。奉硃批。該衙門議奏。欽此。臣等查原奏內稱。今之講求西學。必須實事求是。若但於舊有書院。令其兼習。究虞造就難成。應請各省均於省城另設學堂。學生自十三歲至十五歲止。擇其讀過經書。略通文理。姿性聰穎。體質結實。身家清白者。核實考選。入堂肄業。堂設華文西學各正副教習。華文教習由本省延請。教以經書。朱子小學史鑑輿地略策論等學。西學教習由京滬大學堂揀派。教以語言文字。繙譯策學各國史鑑格致測量等學。是爲二等學堂。現在京師上海奏准設立大學堂。卽屬頭等學

堂各省議設二等學堂。所以開頭等之先路。擬請於各省正款內。每年撥銀一萬兩。或八千兩。以作束脩膏火各項之費。學生以四五十人爲額。四年之後。每年由各省將軍督撫會同學政面試一次。如果學業有成。卽取若干名。作爲生員。并擇其尤者。升送頭等學堂肄業。如係自行從師傳習。有志上進。准由地方官取結保送。一體與考。各教習四年之內。殷勤教授。實效可觀。由將軍督撫出具考語。分別保奏。或咨送總理衙門存記。遇有洋務差事。及出使隨員。酌量委派。各府州縣紳民等。自籌款項。另設學堂。其教習所教學生。有堪選送頭等學堂。暨取作生員。在十名以外者。亦與省城學堂教習一律請獎。若頭等學堂教習誘掖生徒。精益求精。三四年後。均成有用之才。應如何優以仕途。或再加考試。作爲舉人進士。由管理大學堂大臣議章奏辦。儼各省二等學堂。四年期滿。可造者多。該省自欲建頭等學堂。應俟屆時體察情形。另行議奏。等因。查該撫請於各省省城。另設二等學堂。講求西學。學成擇取尤者。升送頭等學堂肄業。各節。係遵照上年十一月初二日欽奉 上諭。切實辦理。與臣衙門同文館近年咨調各省學堂學生來館肄業之例。亦屬相符。與泛言設學者有別。自應准如所請。如蒙 俞允。卽由臣衙門咨行各省。一體照辦。其所請四年之後。每年由各省將軍督撫會同學政面試一次。如果學業有成。卽取若干名。作爲生員一節。查同治三年。廣東議設同文館。經臣衙門奏定。該同文館學生三年學成後。駐防滿洲旗人應准作

爲繙譯生員。准其應繙譯鄉試。并文鄉試。漢人世家子弟。准其作爲監生。一體鄉試。今該撫請卽取作生員。有妨學額。且與向章不符。應請嗣後。如有駐防省分。卽照廣東奏定章程。作爲繙譯生員。漢人作爲監生。各該省。均准一體鄉試。至所請各教習四年之內。殷勤教授。實效可觀。由將軍督撫出具考語。分別保奏一節。查光緒十八年。新疆設立俄文館。擬定章程。如教習三年期滿。著有成效。係有官職人員。准保加陞階一層。係無官職人員。比照同文館作爲繙譯官。再留三年。始終不懈。准以府經歷縣丞。歸部銓選。業經奏准遵行在案。該省延聘教習事。同一律。應卽照新疆奏准章程辦理。但論所教有成。無庸限定所教名數。以收實效。其西學教習。由京滬大學堂揀派一節。原可照辦。惟京滬大學堂未立以前。應由各省督撫咨由臣衙門。同文館揀派前往。各州縣學堂。亦稟由各督撫咨商揀派。以免懸宕。該教習六年差滿。無論有無保獎。仍可回同文館供差。至此項教習。由臣衙門存記。遇有洋務差事。及出使隨員。酌量派委一節。應由各出使大臣。隨時酌量奏調。至所稱如係自行從師傳習。有志上進。由地方官取結保送。一體與考。及各府州縣。自籌款項。另設學堂。其教習由本省大吏考驗派往各節。是否能歸畫一。應由各該省自行酌辦。至如所稱頭等學堂教習。誘掖生徒。精益求精。應如何優以仕途。或再加考試。作爲舉人進士各節。查臣衙門自設同文館以來。該館學生。每屆三年。大考一次。擇其學業精進。考取前列者。量予保獎。或

分部學習。或分發省分。或由出使大臣調充參贊繙譯等官。近且有徑請簡派出使大臣者。仕途不爲不優。卽在館肄習各徒。每值鄉會試。歷科中式舉人進士者。亦復不少。正不必再加考試。此可毋庸置議。其各省二等學堂。四年期滿。有欲自建頭等學堂者。當係成效漸著。應令屆時奏明辦理。以昭鄭重。至所請撥款一節。應由各該省妥定辦法。卽行奏明。請旨飭下戶部酌量指撥。所有遵旨議奏緣由。理合恭摺具陳。再此摺係總理衙門主稿。會同戶部禮部辦理。合併陳明。伏乞皇上聖鑒訓示。謹奏。

請裁汰冗兵疏

戶部各堂官公奏

奏爲冗兵耗財過鉅。亟宜大加裁汰。以紓餉力。而濟時艱。恭摺仰祈聖鑒事。竊方今之計。莫急於理財。理財之計。莫急於節用。節用之計。莫急於去冗兵。是以近年。臣部因需款緊要。先後奏請裁減綠營七成。勇營三成。騰出餉銀。聽候撥用。均奉諭旨允行。上年軍機大臣總理各國事務衙門會同臣部。議復盛宣懷條陳自強大計摺內。亦請飭催各直省。將裁減兵數。及切實辦法。速行奏明。毋得含混延宕。並聲明內外軍務。均已平定。如江南之榆關。撤回各營。陝西之善後防軍。固應一律盡裁。卽直隸之練軍。旅順之毅軍。長江之內河水師。亦應分別核實裁減。以節虛糜。奉 上諭。練兵一事。爲各省將軍督撫專責。不論綠營勇營。當此餉項支絀。均應大加裁汰。該將軍督撫等。奉到此旨。務須腳踏實地。見諸施行。毋得粉

飾因循。一奏塞責。欽此。是裁減兵勇一事。朝廷本期必行。乃自臣部行知各省以來。惟山東巡撫李秉衡。請將山東制兵。分限五年。裁減五成。又請裁減防勇一萬六千餘人。練軍一千九百餘人。最爲認真辦理。其餘各省綠營。除同治年間裁減兵數。毋庸併計。及近時湖廣總督奏請酌量裁減。尙無成數可計外。四川則裁減一成。廣東廣西則裁減二成。江蘇江西安徽河南則裁減三成。各省勇營。除東洋事定。撤還各營。及近日旅順毅軍裁減綠營不計外。四川則裁減一百二十餘名。江蘇則裁減四百八十餘名。安徽則裁減一千八百餘名。湖北福建各裁減三千餘名。此各省裁減兵勇之大略也。查各省兵勇約共八十八萬。人歲需餉銀約共三千餘萬兩。而裁減兵數。勇數。僅止如此。此亦奚濟於事哉。夫各省之所以不肯裁減兵勇。與夫稱爲裁減。而不肯大爲裁減者。在腹地則曰。伏莽堪虞。在邊陲則曰。外侮可慮耳。然如山東一省。西接河南。則腹地也。東濱大海。則邊陲也。二者蓋兼而有之。山東兵勇。旣可大爲裁減。他省獨不可大爲裁減乎。自古兵愈多者。國愈弱。史策所書。不可枚舉。我朝定鼎中原。當時所用。僅止八旗勁旅而已。無敵於天下。其後額設綠營。制兵多或六十餘萬。少亦五十餘萬。較之八旗。不啻倍蓰。乃粵匪捻匪。川匪回匪之亂。制兵竟不足恃。於是加餉挑練。而有練軍招募勇丁。而有湘軍楚軍淮軍毅軍。及日本之役。練兵練勇。又不足恃。於是仿照西法。添設新軍。而有袁世凱聶士成兩軍。及湖北之洋操隊。江南之自

強軍夫明知制兵不足恃而終不肯大爲裁減明知練兵練勇不足恃而亦不肯大爲裁減豈非甘棄有用之餉空養無用之軍乎且招募之勇丁以有事而來卽當以無事而罷此亦古今之通義乃昔之日因粵匪捻匪川匪回匪而招募者今粵匪捻匪川匪回匪事定垂三十年而勇營猶未盡去也昔之日因越南構爭日本開釁而招募者今越南罷戰已逾一紀日本講和將及兩載而勇營亦未盡去也無事而於綠營制兵數十萬人之外又養此數十萬招募之勇丁歲費帑金二千餘萬兩庫款幾何民力幾何豈能堪此在昔乾隆年間增兵六萬餘名增餉二百餘萬兩當時大學士阿桂已言後難爲繼及嘉慶十九年阿桂之言果驗仁宗睿皇帝乃特降諭旨令廷臣會議裁汰嘉慶二十五年宣宗成皇帝御極之初復諭令各督撫核實抽裁夫國家當全盛之時增兵六萬餘名增餉二百餘萬兩似於庫儲尙無大礙而三十年後竟以帑藏不支一再議裁況今日之增勇數十餘萬人增餉二千餘萬兩而可聽其長年耗蠹竟無已時乎現在中外相交兵事利鈍已可概見謀國者祇當以先籌償款爲急務各省兵勇但取足爲鎮撫之用而止誠不宜因仍舊習耗鉅費而擁多營以致借無可借抵無可抵民生日感而國計因之愈窮擬請飭下各省將軍督撫等恪遵上年十一月初二日諭旨腳踏實地不論勇營綠營迅速大加裁汰其直隸之練軍淮軍旅順之毅軍長江之內河水師亦卽切實裁減他如江南之榆關撤

回各營浙江河南之新募各營陝西之善後防軍尤應一律盡裁毋得藉詞推宕至裁減勇丁或應分別遠近酌給一兩月遣餉以資旅費裁減制兵或應體卹貧苦酌給半年一年餉銀餉米以資生計均聽各該將軍督撫體察情形奏明辦理其裁減兵數勇數及節省餉銀統限文到一月內切實復奏各將軍督撫素著公忠當不致瞻徇情面意存見好而不念冗兵之弊不顧公家之急也除將直隸練營練軍留防淮軍南洋防軍河南浙江各防營專案奏明辦理外所有臣等請催各省切實裁減兵勇緣由理合恭摺具陳伏乞 皇上聖鑒謹 奏

救時揭要疏

甘肅新疆巡撫陶模

奏爲遵 旨覆奏恭摺馳陳仰祈 聖鑒事竊臣於光緒二十一年七月十五日承准軍機大臣字寄光緒二十一年閏五月二十七日欽奉 上諭自來求治之道必當因時制宜況當國事艱難尤應上下一心圖自強而弭隱患朕宵旰憂勤懲前毖後惟以蠲除痼習力行實政爲先疊據中外臣工條陳時務詳加披覽採擇施行如修鐵路鑄錢幣造機器開礦產折南漕減兵額創郵政練陸軍整海軍立學堂大抵以籌餉練兵爲急務以恤商惠工爲本源皆應及時舉辦至整頓釐金嚴覈關稅稽察荒田汰除冗員各節但能破除情面實力講求必於國計民生兩有裨益著各直省將軍督撫將以上諸條各就本省情形

與藩臬兩司暨各地方官悉心籌畫酌度辦法限文到一月內分晰覆奏當此創鉅痛深之日正我君臣臥薪嘗膽之時各將軍督撫受恩深重具有天良諒不至畏難苟安空言塞責原摺片均著鈔給閱看將此由四百里各諭令知之欽此等因伏念臣以菲材受恩最渥值此時事艱虞曷敢不殫竭愚忱以冀涓埃之裨補惟新疆情形與內地不同戈壁荒寒無多物產俄商既未權稅如僅權華商則影射生端徒滋輻輳是以臣於光緒十八年奏准將土貨釐金概行裁免是新疆並無釐金可徵營制雖改防爲標而一切章程仍照勇營辦法新疆孤懸塞外幅員萬里平日已不敷分布近因甘回叛亂調兵分防哈密安西肅州等處不得不暫時添募應俟回匪平定後酌量裁減是新疆目前尙無可裁之兵夫議裁綠營亦以其狃於積習耳自光緒十九年調派洋操教習西來臣督飭各營依次習練雖未能悉改舊章而運用槍礮諸法弁勇間有領悟惟火器不能一律亦勢使之然向來綠營參用鳥槍不多近來湘楚各軍火器不過三四成耗費已增於舊若概用後膛新械固將弁所甚願惟操演槍礮所需藥彈及修理各費又將倍蓰平日限於財力臨時安得不拉雜購用艱難情形不獨新疆爲然也和闐金鑛暨迪化溫宿銅鐵諸鑛前撫臣及臣先後勘探祇因鑛學乏人沙漠長途轉運薪糧所費尤鉅歷年虧累無從報銷光緒十九年十二月奉上諭開辦和闐金鑛遵卽會同陝甘督臣楊昌濬札委嘉峪關洋弁比利時國人游擊銜

林輔臣候選巡檢施甫萌。裹糧往勘。惟從羅布淖爾以南縱橫二千餘里。曠無人煙。山谷幽邃。察看稽遲。疊據稟報。尙無端緒。客俟該委員等回省詳詢情形。再行覆奏。新疆屯墾。自安插遣犯。招徠流氓以來。厚給牛隻籽種。爲款頗鉅。乃旋墾旋逃。迄無成效。良由農事最苦。非退卒游兵所樂爲。嗣後惟有責成地方官。加意撫循。招來土戶。逐漸墾闢。寬定升科年限。務期歲有增加。惟地曠人稀。非尅期所能奏效。臣復詳聞大學士徐桐廣西按察使胡燏棻等各條奏。或意在剔除時弊。或意在步武泰西。言之極爲懇切。世變日棘。非更法無以自強。臣於本年五月十一日具奏培養人材。勉圖補救一摺。意亦同此。第更法非難。更法而無弊爲難。今日帑藏空竭。豈容以羅掘之餘。輕率從事。夫不知我之所以失者不足。語於彼之所以得也不懲。既往之弊者不足。與於將來之利也。臣謹就諸臣所奏各條。推廣其意。約舉四端。一曰核實用財。伏讀上諭。臥薪嘗膽等語。凡在臣下。敢不激發天良。於艱難困苦中。屏絕浮華。力行實政。以仰副我皇上宵旰憂勤至意。臣聞西人豐於實事。儉於浮文。華人辦理洋務。他無所得。而侈靡先之。各局總辦提調委員。或要津囑託。或親故攀援。虛領薪貲。徒滋弊竇。目前如諸臣所奏。將鐵路開礦諸政。一一舉行。恐閒員浮士。濫廁其間。更不知伊於胡底。自後各項人員。應先行考核。事非素習。毋許濫竽。浮冒開支。概行刪汰。庶費不虛擲。效可漸收。矣。一曰破格儲才。算藝取士。應加額分科。水陸學生。必兼通文武。出洋人

員宜如何端品而矢忠愛之忱奉使大臣宜如何稽察而任考試之責不拘文武惟視所能臣前摺亦經詳細陳明曩時出洋學生可用者亦多祇以拘於資格令素未諳習之員駕乎其全局因之不振嗣後水陸將弁不諳各國兵法者各局所監督委員不諳製造各學者皆當逐漸更易卽以優等學生充之舊例武科無裨軍事徒害鄉閭急當罷行斷不可改習火器致滋流弊西人弁兵之長在明於用器制器之理及兵法輿地各書必須入學肄業師友觀摩並非但知施放槍礮已也草野武夫既乏新書奇器又不便聚徒講貫性情惟魯難習韜鈴今議者欲改試槍礮勢必家置火器後患更難設想應於沿江沿海設立武備水師學堂卽以此爲武學秀才舉人於此拔之都守干把於此取之果能實力栽培分布各處足數千城之用至於各項武備工藝考試優劣苦無深通此事之大臣以爲試官閤進士康有爲所陳近支王公妙年英邁者宜令入學堂學習洵爲儲材要計臣以爲既學洋務在華不若出洋地遠誼疏則瞻徇少見多識廣則學業精此卽各國致強之本應卽請旨辦理以爲士民表率一曰推行宜漸論時事者急求富強然理財當靜不當擾農商二業疲困已極取民之數無可再增臣生長江浙之間釐金最旺之地日擊商民由富而貧由貧以至於赤貧皆由釐金累之委員司巡稍不如意卽指爲偷漏勒罰十倍至二三十倍不等若輩囊橐得自侵匿者多得自勒索者亦不少今議者欲盡括此數爲公家應得之款並

以收數最鉅之年爲定額。抑知正項既增，委員司巡之私入能盡禁乎？立法從寬，尚流於刻；如此不留餘地名爲惠商，實則病商。議者又欲以比較數目按月報部，不知吏胥以報部爲良法，外官視報部爲弊政。往年戶部所定錢糧徵信冊之類，汗牛充棟，孰能檢閱？外官慮受駁斥，或賄吏胥以求省事。前大學士閻敬銘致仕還家，深知其非釐金繁瑣若亦如此辦理，徒爲吏胥增一宗利，數爲小民加一番剝削耳。天下合例之案，卷日多，天下守法之廉吏日少，其弊可以想見。夫良民孰不畏官，但願無留難需索，本自樂輸商人，每業皆有首領，市塵每歲出納貨物成本若干，應稅若干，人所共知，或令公舉一二正人在會館包繳釐金，一切局卡委員浮費叢弊似可悉除。惟各處情形不同，應由地方官斟酌辦理。至於開墾荒地，亦難急切，民果見利無勞，督促廢地不墾，自有苦衷。如江蘇之吳江、震澤，往往富人視田爲累，甘心送人他處，更可類推。經理墾荒有司之責，若考成太嚴，猾者必借此邀功，以荒報熟。曩年陝西延安綏德鄜州各屬曾有此弊，累民殊甚。要之事不通籌動多窒礙，司農歲入較之於古未嘗不富，然民氣漸凋，度支日絀。嘉慶道光年間已有銀荒之患，各國通商後，每歲漏卮數千萬，中國銀根已竭，無論如何整頓，擴充斷未能一時復原。紛紛立法謀利，愈急累民愈多，欲無累民，舍開礦無他術。然自辦則虧折立見，延洋員則駕馭殊難，急宜於京師及濱臨江海之區創立礦務學堂，加意講求。礦學旣明，派赴各國礦廠閱歷，考證然。

後還勘各省五金諸礦一一開採庶有實效且人知寶藏自在不藉搜括民心自可稍安人才得地利而興方有成本以行鈔鑄幣方可自設製造各廠能自製造方可將兵器歸於一律方可令鐵軌鋼艦左宜右有若不按次序雜然並興果有富人承辦固善否則專恃借貸勢必利歸人而害仍在已不可不深長思也一曰根本宜急臣按大學先論本末後言生財終斥務財用之非孟子先仁義而後利使孔孟再生必議變法必不專言富強夫有弊當革有利當興不求富強而富強自致是謂王道急欲富強而競謀功利是謂雜霸朝野上下堂堂言利北宋之覆轍宜懲憂貧而勤繭絲同舟且成敵國遑論海外臣非阻撓洋務者也竊意更張不可少緩而根本則宜先治根本莫要於取士用人才之所以不振皆由考試太濫捐納太廣保舉太多名成年長境窮志汚教無可教効不勝効日日言破除情面而終無由破除日日言實事求是而終不得實效此病根之所在也不治病根但學西法聚鬬茸嗜利之輩以期富強祇於舊法外增一法不得謂之變法且於積習外增一積習不得謂之祛積習夫東西洋各國之所以自立者在法亦在人試令各國亦學我之取士用人則彼所謂富強不過四五年而衰弱矣又試令島族納土歸誠取其已富之財已強之兵令吾鬬茸嗜利之輩往治之不過一二年而弊端百出矣今日之敗釀之甚久癰瘍已發難治更危當靜察其病所由來而求對病之藥庶可療根解毒而徐收其效我皇上懲前毖

後以蠲除瘡習力行實政爲先誠大有爲之機也。臣竊謂天下有漢以來之瘡習納貲得官是也有唐以來之瘡習詩賦取士是也。昔程子以館閣清選爲名實未正以增設解額爲利誘之法。朱子論科舉之弊其說尤多。甚至謂若要恢復須罷三十年科舉。蓋庠序之教宜廣而選舉之制貴嚴。今濫取濫保名爲得士實則害政捐班則況而愈下。捐至於武職更無論矣。今年不能停止則明年明年不能則後年捐班之弊實輟洋債爲重各省匪類日滋甚或猖狂叛逆豈盡民之無良大半由官吏激成之官吏豈樂爲不肖大都由學術未正仕途擁擠釀成之多。取一游士卽多傷一分元氣。每年收百餘萬之捐貲將來卽償以千百萬之脂膏興言及此能勿寒心急宜抑其浮囂歸之農畝停止分發一二十年官少政清得良有司以撫民則黎庶悉敦本業得良有司以弭盜則營勇亦可議裁。至於農桑諸務西人皆設學講求而華人概從鹵莽此亦根本所當急者也。臣反覆籌思竊以爲欲求富強必以崇節儉廣教化恤農商爲先。欲新政治必以變士習減中額汰內外冗員爲先。伏乞皇上宸衷獨斷於根本之病先行清理然後安內攘外之策綱舉目張矣。微臣迂謬之識非敢故爲高論誠恐急功近利效未見而害更大因與布政使臣饒應祺鎮道兼按察使銜臣丁振鐸再三商榷意見相同謹恭摺覆奏。是否有當伏乞皇上聖鑒訓示謹奏

請免加徵土藥稅釐疏

山東巡撫李秉衡

奏爲部議總稅務司所籌征收土藥稅釐辦法窒礙多端流弊甚大籲懇天恩飭部照舊稽征無庸改議以存政體而卹商民恭摺瀝陳仰祈聖鑒事竊臣准戶部咨稱據總稅務司赫德開呈手摺按近年土藥出產各省總計三十三萬四千擔若釐稅並征每擔六十兩歲可得銀二千萬兩通行各直省試辦受定詳細章程專案奏報等因奉旨依議欽此欽遵咨行到臣在部臣以籌款維艱無可設法欲借此以擴利源自是救時之意然臣就赫德所定之數反覆參稽實見有窒礙難行及行之而其利未收其害先見者敢爲我皇上敬陳之鴛粟一物非肥沃地畝不能繁茂愚民貪圖重利將宜穀膏腴之士栽種鴛粟馴至糧價日昂浸爲民患故從前久懸爲厲禁嗣因利之所在種植日多光緒十六年總理各國事務衙門會同戶部奏請加征稅釐欽奉上諭果能設法稽征認真辦理既可裨益餉需並可以征爲禁隱寓崇本抑末之意等因欽此聖謨洋洋洵正俗坊民之要道也今若明定數目某省擔以萬計某省擔以千計將使九州之上腴盡棄嘉禾而植惡卉必致畝無棲糧家無儲粟樂歲既少蓋藏凶年更坐以待斃往者秦晉大祲餓殍載道其禍實中於此以害稼賊民之事爲損下益上之謀我國家愛育黎元重農貴粟不宜有此政體也且夫謀國計者計事理之是非尤當權利害之輕重果其此令一下而二千

萬之款。卽能歲輸於司農。則謂見其利而遺其害。猶可言也。然今天下民力竭矣。卽朝廷維正之供。綜計地丁漕項雜賦等款。額征銀三千六百萬兩。有奇。近年各省實征。不過七成。約短征銀一千一百萬兩。有奇。乃土藥之稅。與則壤成賦之正。供相提而並論。此必不可得之數也。臣請以山東言之。山東土藥所產。多在省城西南。兗沂曹濟各屬。光緒十六年前。撫臣張曜遵奉諭旨。籌辦土藥稅釐。在省城專設總局。於產土地方。派定經紀。開設行棧。俾便稽查。復派印委各員。會同管理。查東省土藥。每擔約值銀二百餘兩。每值銀一百兩。征落地稅銀八兩。釐金銀八兩。如由各海關出口。則加收關稅銀八兩。計每擔共收銀四十八兩。自十七年奏辦以來。多者不過七萬餘兩。少則四五六萬餘兩不等。今赫德所議。山東土藥一萬擔。以每擔六十兩計之。應征銀六十萬兩。較從前數且十倍。是卽於向所不產之處。教之樹藝。多方搜括。猶未必能盈其數。揆之事理。既有所不可。微臣愚拙之性。亦實力有所不能。復查赫德所開。自山東而外。如山陝直豫江皖閩浙等省。姑不具論。他如四川十二萬擔。應征七百二十萬兩。雲南八萬擔。應征四百八十萬兩。貴州四萬擔。應征二百四十萬兩。吉林六千擔。應征三十六萬兩。甘肅一萬擔。應征六十萬兩。此五省中。以四川爲最富庶。而額征地丁雜稅。不過六七十萬兩。今所議土藥稅。多至十餘倍。恐竭全省之財。方亦有未逮。至雲南貴州吉林甘肅四省。皆所入不敷。所出全賴部撥。鄰省爲之協濟。上年戶

部攤還俄法英德借款。此四省中除雲南蒙自關外其餘皆未指撥。蓋以該四省本係缺額之區無可籌措也。今如赫德所議以邊陲瘠薄之地而責以數百萬數十萬之土稅恐難以劉晏之才商榷之法亦不能強無而爲有矣。當茲庫藏奇絀債負疊疊部臣持籌之苦衷疆臣亦當共喻使能歲獲鉅款如原奏所稱不加稅而稅裕固所樂聞然此栽種土藥之地畝固卽國家已有正供之地畝也。我朝列聖相承深仁厚澤蠲租減賦史不絕書二百五十餘年官吏恪守定章罔敢苛斂土藥雖獲利稍厚征稅以示裁抑其亦可矣。乃於地畝正賦之外復浮計其出產加征至或相倍蓰或相什伯之多卽令如數取盈已非聖朝寬大之政況財者國之脈民之命竭地利之所出不能饜其誅求必至商賈裹足怨讟繁興現在蜀滇黔粵正強敵環伺之秋倘使民不堪命勢必包藏禍心迭起事變患且不可勝言利於何有是二千萬之數斷不可得何必虛懸誥令爲此得不償失之謀哉。欽惟我皇上聖德如天愛民如子籲懇收回成命。敕下戶部暨總理各國事務衙門仍照現辦土藥釐稅章程通飭各省實力稽征毋任隱匿中飽以期上可裕國下不病民至攤還洋債上年經戶部分別派定凡常年應解之款無論如何爲難臣當督同司道各員設法騰挪如期清解各直省疆臣均受恩深重當能各清各款上紓宵旰之憂正不必另議新章洋款已不至無著。臣尤伏願皇上聖敬日躋恭儉爲德念損上方能益下竭澤必

至無魚常存撙節愛養之心。力屏土木遊觀之樂。其在易曰。節以制度。不傷財。不害民。大學言用之者。舒則財恆足。果能取之有制。用之有經。則小民蒙浩蕩之恩。聖祚有無疆之慶矣。臣仰沐恩慈。獨厚未能少報。涓埃管窺之愚。不敢緘默。伏冀聖明採納。臣不勝悚懼屏營之至。謹恭摺具奏。伏乞皇上聖鑒訓示。謹奏。

遵議京撫請免加土藥稅釐事宜疏

管理戶部大學士麟書等

奏爲議奏事。山東巡撫李秉衡奏。部議總稅務司所籌征收土藥稅釐辦法。窒礙多端。懇恩飭部照舊稽征。無庸改議一摺。光緒二十三年六月初十日奉硃批。該衙門議奏。欽此。欽遵由軍機處抄交到部。據原奏內稱。山東土藥所產云云。臣等伏查前因洋債過巨。籌款維艱。不得已議將土藥稅釐另行設法整頓。隨據總稅務司赫德開呈手摺。擬改由奉天之山海江蘇之鎮江四川之重慶雲南之蒙自各關試辦征收。當經臣部商酌。歸各省征收。則責成督撫。歸四關征收。則責成稅司。土藥爲中國出產。釐金係地方專責。斷無不信督撫而委任稅司之理。是以就赫德所開土藥擔數。每擔擬收銀六十兩。奏准通行各省。設立總局。試辦稅釐並征。各省接到此次部議。自應該省土藥實在出產數目。妥定征收章程。專案詳細奏報。方爲切實辦公之道。若專持己見。輒以窒礙難行爲詞。於土藥一切利弊。仍舊未能興革。不惟

使好議論者專以土藥不歸洋關征收爲失計。將來續借洋款無可籌還。致失信於外人。屆時又誰執其咎哉。卽如山東土藥一萬擔。該撫稱多方搜括。未必能盈其數。查赫德手摺內開甘肅陝西山東山西河南直隸六萬擔。原就各省多寡之數。籠統合計。並非指定山東一萬擔。且山東縱不及一萬擔之數。究竟各屬出產若干。該撫亦未能確切指出。至征收土藥稅釐。該省每擔共銀四十八兩。係按分次交納之數。先後並計。非一時征足。然征落地稅以後。未至局卡以前。私售偷漏者已多矣。既納釐金以後。未至各海關以前。私售偷漏者又多矣。名爲每擔征銀四十八兩。實則不知若干擔。方始征收足數。似不如就土藥繁盛處所。設立總局。一次征足。不再重征。庶免挂漏。復查部議土藥一疏。現惟山東登覆其餘各省。尙未奏報。乃該撫於山東以外。論及四川。而謂其財力不逮。兼論及雲南貴州吉林甘肅。而謂其入不敷出。並念蜀滇黔粵。強敵環伺。恐至商賈裹足。怨譟繁興。包藏禍心。迭起事變。洵爲通籌全局起見。然四川等省土藥固不能強無而爲。有未嘗不可化私而爲公。究應如何征收。須俟各省覆奏到日。再行酌核。未便預爲擬議。若謂以加重稅釐之故。商賈不獲厚利。未免動以浮言。則是觀望者。不過運銷土藥之人。而各項商販自若也。怨譟者。亦祇吸食土藥之人。而各項農民自若也。何至包藏禍心。迭起事變。總之土藥本害人之物。愚民貪利忘害。以致種植日多。因其種植之多。而酌加稅釐。嚴查私販。正與光緒十六年諭旨

以征爲禁。隱寓崇本抑末之意。相符該撫所稱九州上腴。盡棄嘉禾而植惡卉。亦可謂必無之事矣。抑臣部有難已於言者。上年攤還洋債。分別派定。該撫聲稱。無論如何爲難。當設法騰挪。如期清解。自是公忠體國之意。惟是日本償款。除已付一萬萬外。尚有未付一萬萬。勢必續借洋債。方能清償。既續借洋債。以後仍須分攤各省。方可籌還。而各省同一拮据。此盈千累萬之巨款。究由何項指撥。臣等日夜紆籌。萬分焦灼。亟思就已有之利。剔釐積弊。爲得尺得寸之謀。終慮多寡懸殊。不能補苴萬一。倘各省疆臣。果如山東撫臣所奏。各清各款。上紓宵旰之憂。不必另議新章。洋款不至無著。則臣部幸甚。大局幸甚。所有議奏緣由。理合恭摺具陳。伏乞 皇上聖鑒。謹奏。

議覆變通土藥稅章片

戶部

再光緒二十三年四月十二日。御史張兆蘭奏。各省土藥行銷日盛。請變通收稅章程一摺。軍機大臣面奉諭旨。戶部議奏。欽此。欽遵鈔交到部。據原奏內稱。土藥爲籌款大宗。擬令各省查明實在出產數目。專案報部。一律改捐落地正稅。蓋就地徵收。較關卡易於查察。自收落地稅後。任其運銷別省。概不重徵。商民知不重徵。亦必樂於從事。並擬請由戶部發給印花。領新繳舊收稅後。卽准黏貼印花。所過關卡。隨時查驗。有印花者放行。無印花者罰扣。並請裁撤各局委員。以省浮費。專歸地方官經理。接結詳報。如能

收稅足額。由該管上司。比照徵收錢糧之例。酌加獎敘。設有隱匿。一經查出。卽行嚴參等語。臣等伏查各省土藥。臣部已另籌徵收之法。定議具奏。正繕摺間。據御史張兆蘭奏請前因。查該御史請徵收落地稅一節。與臣部所擬在出產土藥繁盛之處。就近每百斤繳足六十兩。概不重徵。大致尙屬相符。惟所請裁撤各局委員。專歸地方官經理。雖爲節省浮費起見。第恐地方官公事繁多。未能常川稽查。似不如設立總局。派委委員。就近徵收。較爲得力。至印花請由戶部發給。邊遠省分。赴京具領。未免有稽。時日且易開需。索留難之弊。應由各省將軍督撫自行妥酌。議定應用。何項印信。迅卽奏明開辦。以免遲延。所有遵議緣由。理合附片具陳。伏乞 聖鑒。謹 奏。

臣康曰。戶部於加徵土藥稅釐一事。志在必行。雖有東撫李鑑堂中丞之抗疏力爭。及至載誦右篇。指摘仍不遺餘力。要其各執一理。各衷一是。屬在草莽。未敢妄判短長。且默揆計臣仰屋之苦衷實亦未敢謂重科土藥稅釐之不合。特區區愚見。有不覺惋惜彌襟者。則以理財之大臣。枋鈞之宰輔。知分利而不知生利。能防弊而不能除弊也。生利分利之別。廣學會譯有專書。未蒙俯采。芻蕘輒復損下以益上。此一惜也。若夫中國之大弊。首在書吏之軌法。舞文向營。疑養尊處優者。誠苦於不知耳。今張曉九侍御以頒發印花爲請。戶部遽以易開需索留難之弊。却之一若書吏之權侔於人主。非滿漢堂官六

七輩敢攫龍鱗而捋虎鬚者此真草野之迂儒百思而不得其故大惑而終身不可解者也又一惜也康曩作一論言天下有一利必有一弊此理之常無足怪者大臣身枋國鈞但期利之大與不必慮弊之隱伏甚至利未見而弊先起亦但當求除弊之道而不可阻興利之心猥蒙通權達變之鉅公援筆密圖此數語傳示僚屬擊節嘆賞附識於此以質知言

酌定寶星式樣疏

總理衙門

奏為酌定寶星式樣請 旨遵行恭摺仰祈 聖鑒事竊臣衙門於光緒七年十二月十二日奏定寶星章程奉 旨依議欽此歷屆欽遵辦理嗣於二十二年三月二十一日復奏請將頭等第二第三寶星頒給限制立案聲明奉 硃批依議欽此近日邦交益密往來贈答事類繁多上而列國君主之周旋下及貴戚臣工之頒賜典儀所在義貴精詳寶星取象列星外國製造多為光芒森射之形以顯昭明而彰華貴中國寶星舊式形方且重與內地功牌相近外人往往艱於佩用似無以達嚮風拜寵之忱臣鴻章奉使歐洲於請 旨頒給洋員寶星案內曾將應行釐定情形附片陳明在案現臣等公同酌議嗣後寶星式樣應請量與變通參酌歐洲各大國通行式樣加以星芒改定形模精工鑄造藉示 恩榮其名目藻飾鑿刻一切均照舊章其鑄造事宜擬選募津滬良工範以銀模俾臻精美其大小佩帶均無庸加繡龍形似此斟酌變通其於樽俎雍容頗為宜稱亦慎固邦交之一道也謹將新擬寶星式樣繪圖恭呈 御

覽如蒙 俞允卽由臣衙門遵照改定。照會各國使臣暨知照南北洋大臣各省督撫出使大臣一體遵照辦理。是否有當。伏候 聖鑒訓示遵行。謹 奏。

遵議開設經濟特科疏

總理各國事務和碩恭親王等

奏爲遵 旨議奏事。光緒二十三年十一月二十三日。軍機處鈔交。貴州學政嚴修奏。請設特科。以收實用。一摺。軍機大臣面奉 諭旨。著總理各國事務衙門會同禮部妥議具奏。欽此。臣等查該編修原奏。所陳各節。大抵以近世士夫頗多。講求實學。然書院學堂之設。所成就者。僅及於少年新進。而耆儒宿學。及已經通籍之輩。不入院堂肄業。轉無由邀 朝廷特達之知。因請設經濟特科。仿照從前博學鴻詞之例。由京官四品以上。外官三品以上。以及各省學政核實保送。不限京官外官未仕已仕一體考試。分別錄用。其所擬科立專名。不限額數。試憑保送。嚴責成。破資格。籌經費。六條辦法。籌畫亦頗周密。方今時事多艱。需材孔亟。誠非有破格非常之舉。不足以聳外人之視聽。而鼓舞海內之人心。第原奏請設特科。又請設立年限。揆之事理。竊恐難行。夫旣曰特科。事固不能歲舉。而歲舉之例行之科目。亦斷不能概加超擢。與以破格之遷除。朝廷立賢無方。議法必通。而後久。非特科無以動一時之耳目。非歲舉無以供歷久之取求。二者兼資。可分辦而不宜合辦。查 國朝康熙乾隆年間。兩舉博學鴻詞。本依據唐人銓目。以網

羅海內人材。唐制舉博學鴻詞者。大抵皆明經進士律算諸科有出身人。復經朝官薦送。試之吏部優等。或竟除給舍。若陸贄韓愈等。皆由此以登清要。當時號爲得人。宋沿唐制。所薦送者。亦皆已由科目出身。若洪邁王應麟諸人。皆以進士召舉。非布衣所能與。康熙乾隆年間。意在訪求遺逸。故不限布衣。與朝官外職。一皆薦送。而一時剡牘山林之數。倍於搢紳立法。因時各收宏效。其在於今。則宜倣康熙乾隆年間特科舊制。以甄錄學堂書院外之人材。准現今科目階級。以登進學堂書院中之髦俊。一爲歲舉。一爲特科。先舉特科。次行歲舉。庶幾楨幹不遺。亦且施行有序。臣等公同商議。其特科擬略宗宋臣司馬光十科。朱子七科之例。以六事合爲一科。一曰內政。凡考求方輿險要。郡國利病。民情風俗。諸學者。隸之二曰外交。凡考求各國政事條約。公法律例。章程諸學者。隸之三曰理財。凡考求稅則。礦產。農功。商務諸學者。隸之四曰經武。凡考求行軍布陣。駕駛測量諸學者。隸之五曰格物。凡考求中西算術。聲光化電諸學者。隸之六曰考工。凡考求名物象數製造工程諸學者。隸之。其保送官。應請如該編修所奏。飭下京官三品以上。外官督撫學政。各舉所知。無限疆域。無論人數。悉填姓名籍貫。已仕未仕。並其人何所專長。咨送總理衙門。定期考試。由臣衙門會同禮部奏請試期。欽命題目。簡派閱卷大臣。在保和殿試。以策論。差次優劣。分別去留。錄取者。再請。殿廷覆試一場。另請。簡派閱卷大臣。詳定等第。以昭慎重。覆試後。

由臣衙門會同禮部帶領引見。應如何量材擢用。或悉照鴻博成案。略與變通。權衡鼓舞。出自聖裁。非臣等所敢擅擬。應臨時由軍機大臣請旨辦理。此爲特科。或十年而一舉。或二十年而一舉。統俟特旨。不爲常例。此特科議辦之大略也。若設爲年限之科。則卽以新增講求算藝各書院學堂爲造端之始。每屆鄉試年。分由各省學臣調取各書院各學堂高等生監鄉會試。皆以策問試之初場。試專門題。次場試時務題三場。仍試四書文。以端趨向。中式者。另爲一榜。名曰經濟正科舉人貢士。其覆試殿試朝考。仍與尋常舉人貢士合爲一場。同試一題。第於卷面另編字號。不責以楷法。不苛其訛脫。一以學問爲高下。自不至屈抑真材。而亦可免諸生之歧視。此爲常科。三歲一舉。此臣等就該編修所請考試年限酌與變通之議。辦大略也。臣等竊維學問以磨勵而後成人材。以激揚而愈重。察看近來風尚上之所求與下之所學精神。所注未嘗不並出一途。徒以科舉未開。故相需殷而相遇疏。當官每歎乏才。而處士恆嗟不過。誠使丕煥綸音。廣開賢路。風聲所樹。羣士響應。因風尚以激揚。較之藉激揚以開風尚者。其勢彌順。其程效亦當彌捷。拔十得五。理可預期。惟其間詳細章程。或需咨商外省。或需參考舊章。斟酌施行。茲先將大槩辦法恭摺具陳。如蒙特旨俞允。恭候命下之日。再由臣等分別咨商。擬定詳細章程。開列清單進呈御覽。請旨定奪。所有遵議開設經濟特科緣由。理合恭摺具陳。伏候皇上聖鑒訓示。

百萬兩內提出使經費各關經費船鈔等項并提還以前借款本息所餘無多不敷抵借至於鹽課地丁雖皆有著之款然均係每歲正供不宜作抵且所收數目洋商無從周知若准令照看更碍於俄法借款一體均霑之條益恐別生枝節臣等通盤籌畫擬將蘇州貨釐松滬貨釐九江貨釐浙東貨釐宜昌鹽釐鄂岸鹽釐等項酌照廣東六廠辦法札派總稅務司赫德代徵以便按期撥付本息不致遲誤此項貨釐鹽釐每年約徵銀五百萬兩抵償借款當可取信洋商而他國不致有所藉口當將此意面告赫德令向英德銀行商辦經赫德與該行往復商論訂期續借英金一千六百萬鎊仍合庫平銀一萬萬兩開具草合同呈送前來臣等查合同所開周息四釐五毫八三折扣四十五年還清每四百鎊用費一鎊雖較前次英德借款折扣較重然前項周息五釐三十六年還清現款周息四釐五毫四十五年還清每年少還本息銀十三萬一千七百二十餘鎊亦可稍紓財力其餘各款與前次合同不甚參差較諸俄英兩國同時商借之款利害相懸甚遠既無誤日本償款之期亦免諸多要挾臣等公同商酌自可照此定議謹抄錄合同底稿恭呈御覽臣等即一面照案飭令總辦章京戶部司員與該銀行董事畫押訂明如期交款一面札行總稅務司並咨行江蘇江西湖北安徽等省督撫欽遵辦理所有續借英德商款緣由理合恭摺具陳伏乞皇上聖鑒訓示再此摺係總理各國事務衙門主稿會同戶部具奏合併陳明謹奏

遵議改定武試新章疏

軍機大臣和碩恭親王等

奏爲遵旨會議具奏仰祈聖鑒事。光緒二十三年十二月二十五日內閣奉。上諭。榮祿奏請設武備特科。參酌中外兵制。造就人材等語。著軍機大臣會同兵部議奏。欽此。光緒二十四年正月初六日內閣奉。上諭。給事中高燾曾奏請設武備特科一摺。著軍機大臣會同兵部歸入榮祿奏請參酌中外兵制。特設武科片內一併議奏。欽此。欽遵先後將原奏二件抄出。臣等伏查榮祿所奏請設武備特科。分列格致諸學。槍礮諸科。以爲之目。舊制之武鄉會試。姑仍其舊。其應特科之人。由武童層遞作爲武舉。武進士。每次限以三年。略取九年大成之意。不必與舊科同歲舉行。止須將原有中額之半撥入特科。試之有效。再將舊制全停。自係爲轉移風氣。造就人材起見。臣等伏維武科定制。沿自有明。從前火器尙未盛行。卽泰西各國亦迥不如今日之精。我朝龍興遼瀋。八旗勁旅。騎射絕人。因而武科亦沿用馬步箭弓刀石各項技藝。在當日原屬制勝之具。今則製造槍礮。考校準頭。精益求精。西人謂之藥彈世界。弧矢誠不足以威天下。習非所用。與制藝取士流弊正同。改絃更張。自宜首議及此。惟是變法之始。貴乎耳目一新。使天下曉然知上意之所在。無不踴躍奔赴。始足以振作士氣。鼓舞人才。故舉行之年限可稍遲。而中額不宜分撥應用之槍礮。必畫一而流弊亦宜豫防。當茲時勢多艱。辦事務求核實。無取鋪張。亦不必有

特科名目。臣等謹按照原奏各條細心紬繹。擇其輕而易舉。簡而可行者。爲我皇上縷析陳之。查武場改試槍礮。係屬創舉。武童初學。必用教習。多則經費難籌。且精於操練。兼通西法者。一時亦難數覯。少則又苦不敷分布。即使一省之中。各就府廳直隸州。酌爲延聘。而武童各安土著。距所屬本府州廳。遠者或至數百里。平時院府兩試。已苦跋涉之艱。若令就地教練。充役三年。始准作爲武生。誠恐資斧不繼。閱時過久。轉致半途而廢。臣維國家功令之設。不過懸的以招。至於儲材待售。則視其人之自爲。但使明定章程。通行各省。立定年限。自某科爲始。廢馬步箭弓刀石。不用所有武場。一律改試槍礮。其向應武試者。決不至因此輟業。自必購求利器。磨厲以須。猶制科之詩賦策論。八股屢易其體。士人無不爭自濯磨。所謂利祿之途。使然。初不煩官爲督責也。章程既定。屆時武童應考。仍由各該省學政。按臨考試。合格者。照額取中武生。則進取有資。人思自奮矣。取中武生之後。人數較武童爲少。而且發軔伊始。已有上進之階。應請卽如原奏所擬。由地方官酌量設法。每省籌立武備學堂一區。擇武生之才識聰穎者。或年力富強。有志觀光。自願入堂肄業者。酌照省分大小。核定人數。按名挑入學習。重學化學格致輿地諸學。分馬步礮隊槍隊工程隊諸科。派定總分教習督同訓練。其挑選教習之法。如南北洋湖北等省。先經設有武備學堂。止須酌添教習員數。他如直隸之新建陸軍。江南之自強軍。以及各省所練之洋槍礮隊。熟於以上

諸法堪勝教習之任者自不乏人。擬請無論官弁勇丁一體就近酌量派充。其餘各省由該督撫籌定款項自行延聘學堂功課聽總教習按照人數勻撥。教練官中派員認真稽查。其未經挑入之武生仍令回籍自行學習。鄉試屆期合一省之武生無論堂內堂外一律由該督撫用改試槍礮新章詳加考驗。列入優等者照額取中武舉。其內場默寫武經原屬具文且易滋弊竇。應請卽行裁去。新武舉咨送會試。卽將本屆新武生挑選換入學習。嗣後按照科分挨次輪換風氣一開互相傳習。挽強蹶張者廢然思返。不必仍留舊額之半亦不患應試乏人矣。各省既設武備學堂整齊畫一新中武舉人數裒然可觀。京師首善之區自應設立武備大學堂以蓄衆材而光盛典。惟大學堂規模較之各省尤爲繁重。一切應訂章程應用器具亦非倉猝所能集事。且各行省既經遍設學校如林其八旗順天武生或由該管地方官先行設立尋常學堂或就近往天津學堂學習均無不可。京師大學堂之設似可稍緩。各省武舉亦毋庸再限三年在京肄業。擬請每屆武會試之年先期由各省督撫將此項武舉咨送兵部由部奏請欽派王大臣考試。仍照鄉試之例以槍礮中靶之數爲斷擇其優者取中武進士名數與當年中額相同。其殿試兩場尙有應行略爲變通之處擬請先期由兵部奏明請旨辦理。至給事中高燾會所奏專爲求將帥之材備教習之選先設京師武備學堂然後遍及各行省所陳五事除練身體習槍礮二條外餘三條皆專

門名家所難。倘責令武生武舉等。躡等而進。必至有名無實。徒滋繁費。餘與榮祿所奏。大致略同。應請毋庸置議。以上各節。臣等悉心核議。參酌中外。擇善而從。寓營制於科舉之中。陰以兵法部勒之。與泰西豫備兵留後兵之意。相合各疆吏。誠能認真舉行。需以歲月。有勇知方之士。必有脫穎而出者。卽綠營練勇亦可收互相觀摩之益矣。其未盡事宜。及應駁改緣由。摺內未及詳敘者。另列簡明章程十條。章程錄入第三卷

御覽抑臣等更有請者

國朝軍政自提鎮以下一切武職。本以行伍爲正途。其武舉武進

士。原不過聊備一格。道光以前。姑不具論。卽如咸豐同治以來。蕩平粵捻。在事將帥。滿洲如多隆阿。塔齊布。漢人如鮑超。劉松山。皆係行伍出身。蔚爲名將。武科所得。率多偏僻奔走之材。斷不能與文場鄉會相提並論。卽歐美各國。講求武備。如英國。德國之水陸軍大書院。美國之委士盤大書院。皆情願入伍之人。始准入堂學習。學成之後。卽令分隸各營充當士卒。並無所謂武科也。今欲建威銷萌。折衝樽俎。宜就各省營勇。認真挑選。厚其贍養。嚴其功課。腹心干城之寄。在彼不在此。至於武科改制。臣等今日所議。業已得其大概。宋臣蘇軾所謂取士之法。不過如此。不得以區區一科。遂足盡天下之人材也。所有臣等遵旨會議緣由。謹恭摺具陳。伏乞皇上聖鑒。再此摺係軍機大臣主稿。會同兵部辦理。協辦大學士兵部尚書榮祿。因係原奏大臣。應行迴避。未經列銜。合併聲明。謹奏請旨。

議駁順天府尹請改武科章程片

軍機大臣等

再。正在繕摺間。欽奉正月二十六日。上諭。胡燏棻奏。酌設武科章程等語。著軍機大臣。會同兵部。歸入榮祿等前奏內。一併議奏。欽此。查該府尹所奏。亦主改試槍礮。與榮祿等原奏。大致略同。其所請以馬二礮。二步六。分成取中。先由兵部核定額數一節。窒碍良多。如以人數分別馬步礮。則武場非營陣可比。無所謂馬隊礮隊步隊也。如就一人所試各項分別成數。卽如該府尹所擬首場。仍試騎射。次地毬。改爲步手法。次弓刀石。改爲槍礮。亦難強分爲三六成。原奏聲敘既未明晰。兵部亦無從核定額數。應請毋庸置議。至各省會設大學堂。各府廳設中學堂。各州縣設小學堂。似乎章程明備。然現在各省議設各種學堂。已非易易。若專爲武備一項。安得如許物力。廣爲分設。且武舉生童等風氣甫開。自不如久經訓練之勇丁。較爲得力。勇丁且未能多設學堂。何論武科。又如默寫武經一場。改試策論。取其熟悉韜略。並洞明行軍之法。方爲中選等語。查武科內場。從前本試策論。嗣後默寫武經。誠以韜略精微。非粗通文字之武人所能猝辦。若仍改策論。徒屬具文。亦毋庸議。他如槍礮中靶之成數。教習之功課。考選之多寡。事關變法。必應逐細講求。或待臨時斟酌。皆非臣等所能懸擬。大抵國家定制。貴在簡明。若節目太繁。必有不能推行。盡利者。該府尹所奏各節。業經臣等於議覆榮祿等摺內。分別准駁。其詳細章程。應由兵部隨時會

同京外承辦各衙門斟酌妥議分別奏咨辦理謹附片具陳伏乞 聖鑒謹 奏

請准辦津鎮鐵路疏

總理衙門王大臣

奏爲道員容閱請辦津鎮鐵路以廣商務恭摺仰祈 聖鑒事竊光緒二十三年十二月二十六日江蘇補用道容閱呈稱由天津經山東德州至江蘇之鎮江府爲南北往來孔道必宜專築一路以爲便民興利之圖現值德人藉口教案欲修軌道直達濟南倘我先造南北幹路則德人修路至濟南後令其就近與我幹路聯接使不能再加展拓最爲要著是自修津鎮鐵路實爲抵制之方利權固在所必爭大局尤刻不容緩擬開糾合富商巨賈集成巨款興築由天津達鎮江幹路呈請奏明准照光緒二十一年十月間諭旨由該道自行設立公司假以事權俾得從速集資開辦以廣利源並附呈章程二十二條等因章程另錄臣等查鐵路之設無事用以通商有事用以轉運歐西各國鐵路縱橫四達密如蛛網用收富國強兵之效中國蘆漢鐵路經大理寺少卿盛宣懷遵 旨籌辦勘路籌款漸有端倪若照該道容閱所請再築津鎮幹路一枝則展拓愈廣實足與蘆漢幹路相輔而行且可預杜外人覬覦之漸所呈章程二十二條臣等詳加酌覈亦均妥協惟所稱招集洋股一節應令改爲籌借洋款仍聲明商借商還以符歷屆奏案如蒙 俞允卽由臣等札飭該道建立公司妥籌開辦仍將勘路事宜隨時呈明臣衙門及經過各省

督撫酌覈飭辦以期詳慎。所有道員容閱請辦津鎮鐵路緣由。理合恭摺具陳。伏乞 皇上聖鑒訓示。遵行。謹 奏。

遵議各省自闢利源事宜疏

戶部尚書敬信等

奏爲遵 旨議奏恭摺仰祈 聖鑒事。工部尚書淞桂等代奏。工部候補郎中唐浩鎮請令各省自闢利源以贍 國用一摺。光緒二十四年三月三十日。欽奉 諭旨。戶部議奏。欽此。欽遵。由軍機處抄交到部。據原呈內稱。富國之本。首在足民。生物之功。資乎因地。今者世變益亟。財用內匱。各直省官員。未聞以何地可興何項利益。何處可植何種樹木。詳籌以增 國課。中國膏腴至廣。生產最繁。誠量各省土性之所宜。廣植物產。其已備者。擴而充之。未備者。購種給之。務使無曠土游民而止。一曰蠶桑。中國產絲之區。以江浙爲最。江浙以近太湖者爲最。蓋湖水澄清。性肥而暖。故以水灌桑。則葉茂。以桑飼蠶。則絲靱。以太湖例之鄱陽。巢湖。洞庭。大明。金明。溟池。昆明。各省之湖。誠能推廣此意。徧植蠶桑。則所出絲繭。皆能光白柔靱。遠勝於日本。義大利諸邦。而收大利。二曰葡萄。外國葡萄酒爲貨物之大宗。其酒稅爲國課之大宗。考察奉天。吉林土性。皆宜葡萄。苟能廣種。購機以釀酒。復能推而行之。直隸。西山。北山。山西。太行。陝西。華山。山東。泰山。河南。嵩山。泉甘土沃之區。則酒產日豐。酒銷日旺。而酒稅大贍國用矣。三曰木棉。中國棉花向

中東戰紀本末

三編卷一 遵議各省自闢利源事宜疏

六十一 廣學會校刊

推順天平谷。絲長色白。足與美國南海島種相匹。洋棉價貴。每百斤需洋銀三十三圓。華棉價賤。祇十七圓。故華棉行銷外洋。以之紡紗織布。轉運中國銷售。尚有巨利。今江蘇兩湖產棉亦旺。苟令各省。凡土脉鬆厚。山陸高燥之地。廣爲播種。歲入不可勝計。四曰甘蔗。甘蔗爲中國獨有之利。西人試種於愛爾蘭之地。而不合土宜。且枯瘦無糖。故中國絲茶而外。蔗糖爲西人最嗜。雖法人之羅葡糖。美國之楓脂糖。不足比也。惟不用機器提製。色味不潔。若令江西浙江江蘇安徽。素常種蔗之地。廣植豐收。購機製造。則歲增之利無算。五曰種竹。竹之爲物。可製器。可造紙。獲利較他產尤速。中國除直隸山陝諸省。不能豐植外。餘皆可種。產紙之區。向以浙江之紹興安徽之宣城甯國爲最。惟春煮烘焙。仍嫌錘鍊未精。若用洋機製造。和以苧麻。加其堅韌。則成紙速而銷場廣。每年洋紙數百萬之利。可以抵制。而竹竿竹器出口之價。亦可歲增。六曰種樟。樟腦爲製炸藥所必需。其漲力可增至五千倍。日本與臺灣所產最旺。中國江西南湖安徽廣西等省。苟能廣植。十數年間。即可熬腦。每十斤。可值洋銀五圓。其利什伯於他產。七曰種橡。西人歲剝橡樹皮。熬膠以製器物。續剝續長。獲利無窮。以之爲物。廣狹屈伸。各適於用。中國各省有之。雲南最多。西人名曰膠樹。今宜專收橡子。任民播種。數年。即可剝膠。行銷外洋。足奪義大利及舊金山所產之利。八曰種煙。與加非。煙性能滌穢化痰。中國關東煙葉。味較芳厚。第不善收儲。又不知卷成紙煙。致巨利爲

人所侵。如令直隸奉天擇其隙地廣種煙子。收儲地中。一二年後退其火性。購機卷製。即可行銷外洋。加非一物。始於斐洲。西人日用必需。銷路大廣。故各國市肆俱設加非之館。近來通商口岸。華人俱嗜。與紙煙同。如令各直省添種加非之樹。其利較種茶尤厚。凡此八利。如蒙諭旨。飭令直省各督撫詳查地宜。購種發給。以郡守牧令總其成。以同知通判縣丞等任其事。各州縣能勸種樹木三十萬株以上。農利三百畝以上。考核得寔。立與擢用。奉行故事者。罷黜之。地方官吏亦視種植之繁簡爲考成。按圖立冊。就地課稅。產既加多。稅自益旺。足國之道。權輿於此。各等語。臣等竊維樹藝與耕耘並重。本天地自然之利。爲農民切要之圖。值此時局艱難。度支奇絀。各省地方有司尤當審量土宜。廣開利源。藉紓國用。迭經欽奉諭旨。飭令各省考核錢糧。稽核荒田。開辦蠶桑。振興商務。並行令各省督撫就地籌款。如有可興之利。隨時陳奏。以應急需。上年九月。御史華輝奏。令各省講求種植水利。亦由工部會同臣部通行在案。復據都察院左都御史徐樹銘奏。請舉行蠶桑。並護理陝西巡撫張汝梅奏。請通行各屬。如蠶桑種植等項。凡有裨生計者。飭令興辦。亦已奉准咨行。臣部郎中陳熾復編輯續富國策一書。內詳載種樹富民。種桑育蠶。葡萄造酒。種竹造紙。種樟熬腦。種木成材。種橡製膠。種茶製茗。種棉軋花。種蔗製糖。種煙及加非以供食用。各說業由坊間刊行。臣等職司農政。凡內外臣工條奏興利摺件。無不行令各省設法振興。無

如各省於種植一事迄未舉行。或土性實有所不宜。抑民情有難以相強。現據該郎中所陳蠶桑葡萄種棉種蔗種竹種樟種橡種煙八利。實皆臣部郎中陳熾所輯續富國策中之言。臣等反覆推勘。亦知地利之可興。惟風土異宜。難必成效之可觀。卽如蠶桑一事。前據廣西巡撫馬丕瑤奏稱。興辦有收。未及兩載而桑秧蠶子靡有子遺。又如葡萄酒。前據山東巡撫奏稱。東海關道盛宣懷稟。仿照洋法製造。價廉味美。准該商專利十五年。又據山西巡撫奏稱。文水一帶所產葡萄最佳。誠宜設局開辦。現在是否確能釀造。能否行銷出洋。未據該撫等奏咨到部。此外如軋花製糖造紙熬腦製膠卷煙各事。非購買外洋機器。則貨物不精。非熟習商務情形。則獲利不厚。且未察物產之多寡。銷路之暢滯。更不請求製造諸法。亦恐未必有益。應請旨飭下各直省將軍督撫。各就地方情形。詳加考察。認真舉辦。如樹藝有合土宜製造有可抵制外洋之處。應如何定章勸懲。卽行奏咨立案。以重國課而開利源。所有臣等遵旨議奏各緣由。理合恭摺具陳。伏乞皇上聖鑒。謹奏。

晉省籌辦礦務擬先修鐵路疏

山西巡撫胡聘之

奏爲晉省籌辦礦務擬先修鐵路以通運道而擴利源恭摺仰祈聖鑒事。竊維晉省煤鐵之利。甲於天下。潞澤平孟等處所產最旺。而質亦最佳。誠宜及時開採。以興礦務而佐國用。臣到任後。迭奉諭旨。

飭辦卽經詳加體察。妥爲籌議。並將派員查驗礦苗。總核運費。俟確有把握。再行集資試辦。各情形奏明。在案。嗣各屬呈送礦質。復經分寄津滬各廠化驗。據云。煤較開平。鐵較大冶。均有過而無不及。其鐵質之最精者。並可敵外洋紅色棕色等礦。若能仿照西法購機設廠。鑄鐵煉鋼。獲利必倍。徒以太行艱險。不能遠道運售。欲圖暢銷。非修鐵路不可。節經調派洋工程司。分赴潞安平定等處。詳細測勘。據言。東陽關及四。天。門。兩路皆可設法興修。惟出。境。後。仍須由水路運津。而直省河道淺狹。節節阻滯。所費不貲。以致迄未定議。現幸蘆漢鐵路不日動工。晉省祇需趕築支路。或由潞安至邯鄲。或由平定至正定。與之相接。卽可暢行無阻。且與海軍衙門核覆張之洞原奏亦屬相符。誠以鐵路爲自強之本。必須支幹相連。方能合成。西北大勢。又不僅爲晉省礦務計也。惟所需經費過巨。專恃本省集股。斷難有成。計惟有由外省殷商包辦。可期迅速。現據京師皖粵各紳商情願自行籌借洋款。由商務局呈請。來晉設立公司。攬辦礦務。鐵路並聲明所貸之款。概歸商借商還。無庸國家作保。臣康按丁酉冬間業已借定俄華銀行銀六百四十萬兩。專充山西鐵路之用。疊經晉撫奏報有案。每年所得餘利。仍酌提十分之二歸公。作爲報効。遇有軍需賑務。調兵運糧。均照常價酌減等語。查核所擬辦法。尙屬周妥。且借洋款究與集洋股有別。與總理衙門通行案牘亦不相悖。擬卽歸該商等承辦。冀可大興礦利。有裨時局。如蒙俞允。臣仍當調驗合同。察其款項是否屬實。辦法有無流弊。再行發給憑

單以昭慎重。其一切詳細章程。屆時再行飭議。由臣核定後。分別奏咨辦理。所有擬修晉省鐵路。以興礦利。緣由。理合恭摺具陳。伏乞 皇上聖鑒訓示。謹奏。

請斟酌舊制釐正文體疏

山東道監察御史楊深秀

奏爲奏請斟酌列代舊制。正定四書文體。以勵實學。而取真才。恭摺仰祈 聖鑒事。竊自取士之法。未善。用非所學。學非所用。制藝帖括。消磨人才。因有建議。欲變科舉。廢四書文者。臣竊維制藝之科。行之已數百年。沿襲至今。適承其敝。若不思變計。固無以得人才。若驟更成法。亦復猝無善策。竊嘗統籌利弊。熟計重輕。以爲非立法不善之爲害。而實文體不正之爲害也。故欲求真才。必自釐訂文體始。查經義之體。肇自宋代。因文見道。意美法良。宋人之文。傳於今日者。如王安石、蘇洵、蘇轍、陸九淵、陳傳良、文天祥諸大家。類皆發明經意。自據偉論。初無代古人語氣之謬說。無一定格式之陋習。故觀其說理。可以知其行誼。觀其發論。可以知其經濟。有本有文。體最善矣。明世沿習既久。防弊日周。於是創爲代聖立言之說。謂不得用秦漢以後之書。并禁述當世之事。奪微言大義之統。爲衣冠優孟之容。誣己說爲古言。侮聖人而不顧。於是史書不觀。爭爲謬陋。文體風俗之壞。實自茲始。中葉以後。更盛行四股六股八股。破承起講之格。雖名爲說經之文。實則本唐代詩賦專講排偶聲調。如宋元詞曲。但求聲調。填詞而屬詞。詞畢而拈枝。指又

加甚焉。以經意論則無所發明。以文體論則毫無取義。格式既定。務使千篇一律。稍有出入。卽謂之不入格。是以習舉業者。陳陳相因。塗塗遞附。黃茅白草。一望皆同。限以三百七十字數。拘以連上犯下之手。法雖胸有萬卷。學貫三才者。亦必俯就格式。不許以一字入文。其未嘗學問者。亦能揣摩聲調。敷衍講章。弋獲巍科。坐致高位。是使天下之人。相率於不學也。今夫國家設科舉之意。有二。一以鼓勵天下之人。使之向學。以成其才也。一以試學者之才。不才擇而用之也。今用此種庸濫文體。既使天下相率於不學。而人才之消磨。已十之八九矣。苟有一二自拔流俗者。其才華學識。不能發見於場屋文字之中。偶或發見。則以不合格黜之。然則使衡文者。究何所憑藉。以別擇其才。不才哉。故用今日之文體。其弊亦有二。能使天下無人才。一也。卽有人才。而皇上無從知之。無從用之。二也。更有甚者。如歲科童試。縣考府考。院考多出截上截下。無情巧搭等題。割裂經文。瀆侮聖言。律以祖制。咎有應得。而各省沿用。毫不爲怪。此種文體。惟講手法。不顧經意。起承轉收。擒鈞渡挽。其法視文網爲尤密。其例視刑律爲尤嚴。遂使天下百千萬億之生童。日消磨精力於此等手法之中。舍纖仄機械之外。無所用其心。恐有旁鶩。而法因以疏也。舍串珠類腋之外。無所用其學。恐有博涉而文體因以雜也。夫天下之士子。莫多於生童也。盈廷之公卿。皆起自生童也。而其用心及其所學如此。驅天下有用之才而入於無用之地。一旦而欲舉以任天下之

事當萬國之衝。其可得乎。今夫四書文之所以足貴者。將使人讀書以明理。窮經以尊聖也。今截搭枯窘。割裂破碎之題。非以通經。乃以侮聖。故臣謂非立法不善之爲害。而文體不正之爲害也。請特下明詔。斟酌宋元明舊制。釐正四書文體。凡各試官命題。必須一章一節一句。語氣完足者。其制藝體裁。一仿宋人經義明人大結之意。先疏證傳記以釋經旨。次博引子史以徵蘊蓄。次發揮時事以覘學識。不拘格式。不限字數。其有仍用八股膚濫之格。講章陳腐之言者。擯勿錄。其有仍八股口氣。徂於代聖立言之謬說者。以僭妄誣罔。非聖無法。論輕則停。廩罰科重則或予擯黜。如此則觀聽一新。人務實學。有經義取士之效。而無其弊矣。夫因文體之極弊。而並欲廢四書文者。過激之說也。因四書之足貴。而並袒護今日之文體者。不通之論也。正文體乃以尊四書。變流弊乃以符舊制。其爲事至順。其圖變至易。其所關至大。其收效至神。伏乞聖衷卽降諭旨。布告天下。咸使聞知。似於維持正學。培育真才。必有大裨。臣愚一得之見。是否有當。伏乞皇上聖鑒訓示。謹奏。

議開晉邊蒙地疏

山西巡撫胡聘之

奏爲議開晉邊蒙地。以興屯利。而固邊防。謹將籌辦大概情形。恭摺具陳。仰祈聖鑒事。竊惟田制詳於周官。屯政興於漢代。墾闢以盡地利。乃經國之大猷。繕屯以實邊防。尤安邦之要策。鄧艾積穀。遂爲平吳。

之基充國屯田用成破羌之烈屯墾之利自昔爲昭我朝道光中富俊於雙林堡林則徐於新疆皆以墾荒辦屯著有成效方今款絀時艱中外臣工莫不以開源節流議圖補救然開墾經商效難驟覩裁兵撤勇省亦無多求其上裨國計下益民生程功速而興利溥莫若廣開蒙地一事較有把握而無流弊謹就管見所及爲我皇上縷晰陳之晉邊伊克昭烏蘭察布二盟旗地川原饒沃水陸交通漢置朔方九原二郡唐置天德定難諸軍有明至今稱爲河套若北假臨沃之田受降豐州之地備載往籍歷稱上腴形勢之雄甲於西北自來保障并雄經營朔漠者靡不措意於此是以前協辦大學士沈桂芬有籌費開屯以紓國計之奏升任撫臣張之洞有軍屯固圉之議前領隊大臣長庚升任撫臣剛毅先後有纏金屯田之奏諸臣鑒遠識微規畫周至惜俱議而未行臣到任後博採衆論體察邊情深知固圉開屯爲方今第一要務因於上年冬間派員赴邊履勘當經查明西二盟所屬之三湖灣纏金等地二十一段多屬膏腴道光年間曾奉旨准其租種抵欠因未妥立章程致滋事端奏明封禁今惟五大村山後等地尙私自放租而承種者忱於違禁莫敢公然墾闢以致數十萬頃濱河沃壤悉變汙萊深爲可惜本年二月復經派員與該旗領事人等會商屯墾事宜並諭以與其違禁私租動致釀爭貽患何如官爲經理按則收租應得蒙地租銀從寬議給既可裕蒙民生計更可濟國家餉需較爲有利無弊該旗員等雖

亦領悟。惟據稱此地曾經封禁。必須明奉諭旨。方能遵辦。擬俟籌議章程。卽行奏明。請旨辦理。茲於

四月十四日。承准軍機大臣字寄。光緒二十三年四月初九日奉。上諭。國子監司業黃思永奏。內蒙古

伊克昭西烏蘭布通二盟。牧地縱橫數千里。土田沃衍。河套東西。尤屬膏腴。山西纏金牧地。如今民多私

墾。不如官爲經營。請飭籌辦等語。著王文韶陶模胡聘之魏光燾體察情形。詳晰籌畫。妥議具奏。原片均

著抄給閱看。將此各諭令知之。欽此。欽遵。移知綏遠城將軍。轉飭蒙盟。並行知該委員等。一體遵照。去後。

茲據該委員等籌議大概辦法。稟覆前來。臣詳加酌核。參以近今時勢。約舉其利。蓋有數端。邊外廣漠。無

垠。無險可扼。昔之勃勃元昊。諳達濟農。皆據有河套。長驅犯邊。屢擾腹地。我朝聖武布昭。邊境靜謐。

然而康熙之代。準寇披猖。同治之年。回匪滋擾。重煩兵力。始獲救平。邇來互市日增。鄰日逼。形勝所在。

亟宜預爲之防。今既議開蒙地。擬請兼置兵屯。如墾地萬頃。卽屯兵千人。按名撥給田畝。以資耕種。酌提

租銀。以爲製備軍火。津貼口糧之用。不另給餉。仿乾隆時伊犁屯田之制。而略爲變通。以一半認耕。一半

認操。農隙則一律操練。使成勁旅。既可衛蒙盟。以安耕作。並可供征調。以應緩急。邊徼數千里。基布星羅。

聲勢聯絡。以實邊備。其利一。蒙地水草豐饒。牲畜蕃息。向多以游牧致富。今則生計日感。牧羣漸少。凡有

可耕之地。類多私自招墾。蓋其所以謀生者。已不在牧。而在租。自不必務虛名。而損實惠。且各旗地多閒。

曠儘堪租種無礙游牧查雍正年間曾奉旨派員於阿拉善河西牧場之地創開渠道溉田數十萬頃近如吉林長春府墾田卽郭爾羅斯牧地奉天昌圖府墾田卽科爾沁牧地並不聞其有礙也況蒙古貧弱至斯已極若不早爲設法勢將無以自存今旣議租以贍其身復置兵以衛其地爲蒙民策安全計無逾於此者以恤藩部其利二近來時事艱棘國用浩繁自馬關訂約以來驟增數百兆償款司農仰屋幾於羅掘俱窮乃猶舍地利而不興置田功而弗講甚非計也查西人富國首在開地往往鴻荒未闢之野榛蕪磽确之鄉如三藩謝司戈澳大利亞不數年間遂成都會今西二盟蒙地乃古之郡縣韓重華婁師德屯田故蹟歷歷可尋雖云墾荒無異復舊較之西人所開何止事半功倍現據委員查明晉邊境內可開之地不下三十萬頃若能全行墾闢除議給蒙租及一切費用外約歲可得官租二百萬兩況生聚日繁商民輻輳閭閻相望泉貨流通關稅釐金所收必倍於帑藏空虛之際歲增鉅款以裨度其支利三蒙地未封禁以前口外糧食由黃河運入腹地者源源不絕除接濟本省外並可分給陝豫光緒元年前大學士左宗棠用兵西陲皆由包頭設局採運兵糧並資騰飽丁戌大祲前升任撫臣曾國荃亦經派員赴包頭一帶採買糧石藉充賑需迨封禁後地荒糧少十八年臣在護撫任內辦理口外災賑因本地糧米不敷派員赴甯夏採買始克濟用以後設有偏災必至更難措手雖迭經奏明籌款儲穀而爲數無

多難期有濟。今既重開蒙地糧食。自必充牣。擬每歲酌提租銀。秋後由官收買。凡薩托清等廳。太汾平蒲各府所屬沿河村鎮。皆擇地建倉。廣爲儲積。以備災荒。其利四。至現擬辦法。約舉大要。一曰設局開屯放墾。事務殷繁。必須派員專理。以昭慎重。擬在三河灣地方設立屯政局。派員總司其事。其收支款目。發審案件。辦理文札。照料工程。以及一切應辦事宜。均需派員分理。仍歸總辦之員稽核。以專責成。遇有屯兵滋事。卽會同營員辦理。一曰籌費。勦辦伊始。凡開闢道路。丈量地畝。修築渠壩。建造房屋。以及委員薪水。各役工食。無不需費。查奉天吉林屯墾局。皆有經費辦公。晉省事同一律。自應准其酌提租銀。以充公用。現地租尙未徵收。擬先在歸綏道庫存押荒等款內。提動銀數萬兩。以備各項開支。一俟地租收有成數。卽行陸續歸款。一曰定租。查西二盟地固多膏沃。然亦有水地旱地之別。水地以瀕河開渠利於澆灌者。爲上。泉水地次之。旱地又次之。地既分上中下三等。自應就地之肥瘠。定租之多寡。聽商民自行租種。所入租銀。除應給蒙租外。其餘概作官租。仍酌提三成。以一成充局用。一成儲倉穀。一成津貼屯兵。餘悉報部充餉。一曰駐兵。口外游民衆多。一經招墾。勢必聞風麇聚。其中良莠不齊。慮滋事端。擬抽調大同練軍三營旂就近前往分駐彈壓。並派令開通道路。幫修渠堰。以節工費。仍酌撥田畝。俾令先行試墾。以爲屯兵之倡。俟兵屯辦就。卽將練軍調回歸伍。其餘一切詳細章程。容臣分別飭議。妥爲籌酌。再行奏明辦理。

抑臣更有進者。方今外患紛乘。世變日亟。大海之藩籬盡撤。長江之鎖鑰空存。東南各省。凡敵艦可到之處。類皆防不勝防。一旦有事。計惟秦晉一隅。可以畫疆而守耳。誠宜廣積倉儲。精練士馬。爲未雨綢繆之計。免臨事倉猝之虞。則辦屯其首務也。查西二盟壤地毗連。數省縈繞。河流不特晉邊境內土田沃衍。其與陝甘鄰界者。可墾之地尙多。果能一律開辦。漸推漸廣。行見西連瀚海。北亘畿疆。戶盡知兵。人皆足食。飛芻輓粟。供內地之轉輸。列戍分屯。屹神京之保障。縱異日海波騰沸。而西北萬里之形勢。仍可固於磐石。鞏若金甌。此尤根本之要圖。國家之至計。微臣所爲日夕經營。而迫不容已者也。緣奉 諭旨飭議。用敢不揣冒昧。縷晰上陳。所有議開蒙地暨現籌辦法各緣由。理合恭摺具奏。伏乞 皇上聖鑒訓示。遵行。謹 奏。

遵 旨籌辦京師大學堂事宜疏

管理總理各國事務衙門事務和碩慶親王等

奏爲遵 旨籌辦京師大學堂。并擬開辦詳細章程。謹繕清單。敬呈 御覽。恭摺仰祈 聖鑒事。竊本年

正月二十五日。奉 上諭。御史王鵬運奏。請開辦京師大學堂等語。京師大學堂。迭經臣工奏請。准其建

立。現在亟須開辦。其詳細章程。著軍機大臣會同總理各國事務衙門王大臣妥籌具奏。欽此。臣等以事屬創始。籌畫匪易。當卽查取東西洋各國學校制度。暨各省學堂現行章程。參酌釐訂。尙未就緒。旋於四

月二十三日。奉 上諭。京師大學堂爲各行省之倡。尤應首先舉辦。著軍機大臣總理各國事務王大臣。會同妥速議奏等因。欽此。臣等往返商榷。正在將章程妥議具覆間。復於五月初八日。奉 上諭。前因京師大學堂爲各行省之倡。特降諭旨。令軍機大臣總理各國事務王大臣。會同議奏。卽著迅速覆奏。毋再遲延等因。欽此。臣等跪誦之下。悚懼莫名。竊維今日中國亟圖自強。自必以育才興學爲要。綜考歐美各國富強之故。實由於無人不學。無事不學。其學校每年所需經費。英至九百三十餘萬鎊。每年約合華銀六千五百數十萬法至四百餘萬鎊。每年約合華銀二千八百數十萬兩。其餘諸國亦數百千萬不等。以故負笈之士。成就遠大。政治學藝日異月新。近人至以學校之多寡。覘國政之盛衰。非無因也。中國當更新之始。京師爲首善之基。創茲鉅典。必當規模闊達。條理詳備。始足以隆觀聽。而育人才。臣等仰體 聖意。廣集良法。斟酌損益。草定章程。規模略具。舉其要義。凡有四端。一曰寬籌經費。二曰宏建學舍。三曰慎選管學大臣。四曰簡派總教習。提綱挈領。在此數者。學堂養士數百。購圖書置儀器需款甚鉅。非有額撥常年專款。斷難持久。而現在經營創始。所費尤爲不貲。臣等約計開辦經費。需銀三十五萬兩。常年經費一十八萬兩。有奇。其數似已甚多。然較諸西國。尙不及十分之一。臣康敬按。當係十分之一之誤。皇上垂注大學堂。屢發 明詔。作人之意。至勤至懇矣。伏乞 飭下戶部。卽速籌撥專款。俾得興辦。所有常年經費。亦應預先指定。庶免延誤。將來如有推廣。不敷

支給再由管學大臣臨時酌度請旨辦理現在開辦經費內仰蒙聖恩撥給官地亦可稍從節省然疊舍未具尙須興築臣等竊思時事日殷需才孔亟若待從容築室又當遲以歲月查日本開學之先皆權假邸舍以集生徒今事當速舉似可權宜伏乞皇上先行撥給公中廣大房室一所暫充學舍命官選士尅日興辦其大學堂仍應別撥公地另行構建則規範既闕而舉事不滯學舍具矣任事需人大學堂設於京師以爲各省表率事當開創一切制度均宜審慎精詳非有明體達用之大臣以筦攝之不足以宏此遠模況風氣漸開各省已設學堂近又疊奉諭旨停試八股講求西學各省向課制藝書院自應一律更改將來學堂日有增益而無所統轄必至各分畛域其弊不可不防伏乞皇上簡派大臣中之博通中外學術者一員管理京師大學堂事務卽以節制各省所設之學堂其在堂辦事各員統由該大臣慎選奏派命官既須鄭重而擇師尤關緊要今士人學無本原不通中國政教之故徒襲西學皮毛豈能供國家之用欲轉移之非精選總教習不可苟得其人學術正而道藝興苟失其人學術謬而道藝亦誤伏維皇上孜孜興學尤應慎簡教習以收尊道敬學之效總教習綜司學堂功課非有學賅中外之士不足以膺斯重任非請皇上破格錄用不足以得斯宏才若總教習得人分教習皆由其選派亦可收指臂之效其餘一切擬辦事宜悉具章程之內

章程別錄
第三卷

謹繕清單
恭呈

御覽
所有臣等遵

旨籌辦京師大學堂。并擬詳細章程緣由。理合恭摺具陳。伏乞 皇上聖鑒訓示遵行。再此摺由總理各國事務衙門主稿。會同軍機處辦理。合併聲明。謹 奏。

遵議優獎開物成務人才事宜疏

總理各國事務和碩慶親王等

奏爲遵 旨議覆恭摺仰祈 聖鑒事。五月十七日奉 上諭。自古致治之道。必以開物成務爲先。近來各國通商。工藝繁興。風氣日開。中國地大物博。聰明才力。不乏傑出之英。祇以囿於舊習。未能自出新奇。現在振興庶務。富強至計。首在鼓勵人才。各省士民。著有新書。及創行新法。製成新器。果係堪資實用者。允宜懸賞。以爲之勸。或量其材能。授以實職。或錫之章服。表以殊榮。所製之器。頒給執照。酌定年限。准其專利售賣。其有能獨力創建學堂。開闢地利。興造槍礮各廠。有裨於經國遠猷。殖民大計者。並著照軍功之例。給予特賞。以昭激勵。其如何詳定章程之處。著總理各國事務衙門。卽行妥議具奏。欽此。臣等竊者泰西各國。當二百年前。一切新學新法。皆未開闢。自英有刑部尙書培根者。始定一例。凡有能製新器。著新書之人。國家給以優獎。保其專利。自此各國效之。其獎之優者。乃至賞給五等之爵。專利百。例既行。舉歐洲美洲之人。皆爭自濯磨。講求新法。故每國每年新出之器。多至二千餘項。新著之書。多至三萬餘種。智慧以相摩。而開才能。以相競。而出論者。謂泰西富強之原。全在於此。又前此一切善政。皆專

賴國家興辦。民間鮮有倡爲義舉者。自明末時。俄有富人忒亞。捐俄金二十萬鎊。開辦學堂。俄皇獎以

大藏卿

臣康按此或出日本譯書故用日本官名中國奏疏疑應作戶部尙書字樣

之職。各國效之。懸格以勸。於是富而好禮之徒。爭相捐輸。

有捐集英金數百萬鎊。爲學堂書樓之費者。美國大學堂。凡七所。而民間捐辦者四。此所謂重賞之下。必有勇夫。西國學術人才。蒸蒸日上。已然之成效也。中土之人。聰明才力。不讓歐美。而人才日乏。國勢日感。者。殆由提倡激勸之未得其道也。臣等恭繹諭旨。按照軍功。授以實職。示以殊榮。仰見聖明天錫。洞

見本原。

明詔一宣。將天下之士。靡然從風。不數年而新器新學並出。才不可勝用矣。臣等謹仰體聖

謨。擬定詳細章程十二款。

章程錄第三卷

或予世職。或予實官。或加虛銜。或請許其專售。或請頒之匾額。無非所

以奉宣。

德意鼓舞羣才。所議或疑過優。然製新器。著新書之人。其切實致用。視尋常科甲所試帖括。端

楷虛實難易。相去萬倍。何獨於此而薄之。捐集款項。興辦學堂之人。爲國家分勞。其所報効。視捐納郎

中道府爲數尤巨。何獨於此而吝之。臣等竊維鼓勵人才。必高示其始。足以動觀聽。必廣開其途。始足

以勵風氣。倘疑此例既開。恐多冒濫。然書器既由臣衙門詳核捐款。復由地方官行查。則與有司考試無

異。真才則獲殊榮。贗鼎則蒙厚罰。魚目之混。正自易防。此皆無庸鯁觸過慮者也。謹將遵擬各款。另繕清

單。恭呈御覽。如蒙俞允。擬請明降諭旨。飭下地方官。將章程出示曉諭。以風動天下。所有臣等遵

單恭呈

御覽如蒙

俞允擬請

明降諭旨飭下地方官將章程出示曉諭以風動天下所有臣等遵

旨議覆緣由謹具摺上陳伏乞 皇上聖鑒謹 奏。

遵議經濟特科詳細章程疏

總理各國事務和碩慶親王奕劻等

奏為遵 旨議覆並議經濟特科詳細章程謹繕清單請 旨飭行恭摺仰祈 聖鑒事竊臣衙門會同

禮部議覆貴州學政嚴修請設專科一摺光緒二十四年正月初六日奉 上諭國家造就人才但期有

裨實用本可不拘一格該衙門所議特科歲舉兩途洵足以開風氣而廣登進著照所請行其詳細章程

仍著該衙門會同禮部妥議具奏等因欽此又浙江巡撫廖壽豐奏請 飭妥議章程以收實效一摺三

月三十日奉 硃批該衙門議奏欽此仰見 皇上側席求賢權衡至當之意欽佩莫名臣等詳繹廖壽

豐原奏大抵以藝學精寔非培養不能成材而科場積弊已深必需實事求是酌量變通始足激勵人才

一洗從前陋習惟是特科 曠典原所以鼓舞羣倫自非剋日舉行無以轉移士習所請分別器使諸法

自可行之於既試之後不必律之於調考之先至於歲舉各節按照特科六事經由學堂選舉以修身明

理繪圖知算為根本以 聖諭廣訓孝經四書朱子小學為入門酌改制藝書院為學堂裁減例定鄉會

中額以互相作息本末兼賅實能得古人論秀書升遺意查宋世太學有積分之法歐洲學堂有卒業之

憑亦並以平時考課差其甲乙參稽定論不恃一日之短長故得士多而無蹈虛之弊若仍拘拘試四書

文附鄉會試。則庸濫浮僞。懷挾槍替之弊。誠有如該撫所云。法愈變而弊愈滋者。蓋特科爲風聲所樹。不妨寬以相求。歲舉實培養之基。不可泥於成法。臣等恭聆聖訓。但期有裨實用。不敢以前次議辦大略在先。稍涉迴護。謹議特科章程六條。開列清單。章程清單錄入第三卷恭呈御覽。如蒙俞允。卽由臣衙門咨行京外各衙門一體遵行。如有未盡事宜。仍當隨時奏辦。所有遵旨議覆。並妥議經濟特科詳細章程緣由。理合恭摺具陳。伏乞皇上聖鑒訓示。再正繕摺。閏准禮部片稱。本月十二日。欽奉。上諭。鄉會試既改試策論。經濟歲科亦不外此。自應併爲一科考試。以免紛歧等因。查鄉會試改試策論。旣由禮部議覆。經濟常科章程亦應歸入禮部議奏摺內。一併議奏。是以經濟特科章程由臣衙門主稿。會同禮部具奏。經濟常科章程應由禮部另行議覆。合併聲明。謹奏。

籌辦大學堂請簡派總教習疏

管理大學堂事務協辦大學士吏部尙書孫家鼐

奏爲籌辦大學堂事務請旨遵行恭摺仰祈聖鑒事。竊臣恭奉恩命。管理大學堂事務。光緒二十四年五月十九日。奉到總理衙門行知。並原奏章程一冊。臣詳細紬繹。大學堂事務。首在總教習得人。而京官之中。人品端正。學問優長者。原不乏人。求其學賅中外。通達政體。居心立品。又爲衆所翕服者。則實難其選。伏見工部左侍郎許景澄。學問淵通。出使外洋多年。情形熟悉。若以充總教習之任。必能衆望允

符惟官階較大。現又未即回京。臣思學堂之設。所以教育人才。與他項差事不同。如各省學政。自侍郎以至編檢皆可。特旨簡放。學堂總教習。由皇上簡派。侍郎充當。亦無不可。但係二品大員。請與臣皆不支薪水。同堂辦事。比督撫學政之例。似與體制亦無不合。如蒙俞允。許景澄未到京以前。總教習之任。即由臣暫為兼辦。臣尚兼有別項差務。恐照料未能周到。擬請准臣奏調一二員。除臣親自考查學務外。此一二員。可以助臣心力所不及。如此。則學堂之事。即日開辦。必能次第就理。至原議章程大端。雖舉節目尚宜酌改。容臣隨時奏明辦理。所有臣籌辦大學堂事務。恭摺具陳。伏乞皇上聖鑒。謹奏。

遵議五城添立小學堂中學堂事宜疏

協辦大學士吏部尚書孫家鼐

奏為遵旨議奏事。六月初六日。臣接到軍機大臣交旨。御史張承纓奏。請於五城添立小學堂中學堂一摺。著孫家鼐酌核辦理。欽此。查原奏大意。以京師大學堂額數五百名。附小學堂額數八十名。大學堂皆已經入仕之員。小學堂皆大臣子弟。八旗世職。武職後裔。此外就近願學者。均未議及。欲於五城添立小學堂中學堂。俾土著之人。與外省在京之舉貢生監。及京官子弟一體入學。此培養人才。講求實學之至意也。臣查總理衙門原奏章程。當時倉猝定議。只能舉其大端。其詳細節目。本未周備。臣亦欲推廣此項京官子弟舉貢生監之在京與本籍土著者。臣前奏派分教習八人。正欲使教此項人員。及大員子

第八旗世職武職後裔之年輕者祇以草創之始頭緒紛繁尙未能條分縷晰詳細奏明今該御史請於五城各立學堂自應仿照辦理臣愚以爲五城皆地面官與外省有地方之責者無異學堂經費之優絀規制之大小應由五城御史自行籌畫近年刑部候補主事張元濟戶部候補郎中王宗基皆自行籌費創立學堂入堂肄業者頗稱踴躍蓋聖心所向天下從風卽如國家往時以科舉取士海內士人家絃戶誦並無事官爲督率莫不爭自濯磨今五城設立學堂請卽飭下五城御史設立勸辦應否暫借廟宇及將來建立學舍之處均由五城御史隨時斟酌定能日起有功至順天府地方臣原有設立小學堂之意因經費未齊是以暫緩金臺書院考課亦應改定章程臣當與府尹臣胡燏棻籌商辦法所有議添小學堂緣由謹繕摺具陳伏乞皇上聖鑒謹奏

遵旨議行推廣學堂月課章程疏

管理大學堂事務協辦大學士孫家鼐

再六月十七日給事中鄭思賀奏請推廣學堂月課章程等語軍機大臣面奉諭旨著孫家鼐酌核辦理欽此該給事中虞學堂額滿後至者不得入學肄業欲仿書院月課之例每月屆試一次優等者酌給獎勵遇有額缺從此選補臣查學堂肄業例應甄別前準御史張承纓之奏已推及於舉貢生監今於額滿之員以月課代甄別考校於平時收錄於臨事其法甚善理合如該給事中所奏辦理如蒙俞允將

來各處學堂皆可照辦謹附片具陳伏乞 皇上聖鑒謹 奏。

浙江省城專設書院兼課中西實學疏

浙江巡撫廖壽豐

奏爲浙江省城專設書院兼課中西實學奏明立案仰祈 聖鑒事竊臣於光緒二十一年二月間遵旨議覆臣工條奏時務摺內陳明設學堂一條謹當隨時勸導舉行嗣經中外諸臣請將書院變通推廣先後奉 旨通行各省遵辦竊維居今日而圖治以培養人材爲第一義居今日而育材以講求實學爲第一義而講求實學要必先正其志趨以精其術業大學格致誠正修齊治平之道合古今中外而不易者也歐美諸邦學堂各千百計自髫髻入小學以次而中學而大學猶是家塾黨庠序國學之制也若船學若礦務若種植若製造猶是講武訓農通商惠工之政也苟事事物物務求其實朝考夕稽弗得弗措何學之不成亦何事之不舉乃積習相仍事變日亟病詞章帖括之不足恃而羣慕西學恐規模形似剽竊緒餘借一二西語西文以行其罔利梯榮之故智不獨西學無成而我中國聖人之教且變而愈忘其本此臣之所大懼也查浙江杭州省城舊有敷文崇文紫陽學海誥經東城書院六所今方以制藝取士勢難驟爲更張另設則無此經費惟有酌籌改併因勢倡導擇庠序有志之士獎進而培植之庶趨向端而成就易泰西各學門徑甚多每以兵農工商化驗製造諸務爲切於時用而算學則其階梯語言文

字乃從入之門。循序以精。漸有心得。非博通格致。不得謂之學成。屏一切模糊影響之談。而課其實事。庶他日分布傳習。學愈精而成材。愈衆。臣迭與司道籌議。並飭杭州府知府。會商紳董。就普慈寺後現有羣屋。量加修治。專設一院。擬名求是書院。卽委該府知府林啟爲總辦。延一西人爲正教習。教授各種西學。華教習二人。副之一。授算學。一授西文。委監院一人。管理院中一應事宜。一面購置儀器圖籍。由地方紳士保送年二十以內之舉貢生監。飭據該總辦考取覆試。接見詢問。擇其行誼篤實。文理優長。並平日究心時務。而無嗜好習氣者。於本年四月二十日。送院肄業。但予獎賞。不給膏火。學以五年爲限。並明定規約。妥立課程。每日肄習之暇。令泛覽經史語錄。國朝掌故。及中外報紙。務期明體達用。以孔孟程朱爲宗旨。將有得之處。撰爲日記。按旬彙送。察考。每月教習以朔日課西學。總辦以望日課中學。年終由臣通校各藝。分別等第。勤者獎。惰者罰。不率教者。斥優異者。存記。另選繙譯之人。譯述各種有用之書。爲振興學校之助。所有常年經費。如教習繙譯監院及司事人等薪修工資。並獎賞火食。每年需銀五千餘兩。此外尙有隨時購置儀器圖籍。學生紙筆。一切雜用。不在此數。除將東城書院每年膏火銀一千餘兩。全數撥用外。於各書院獎賞存典生息項下。歲提息銀三千圓有奇。及各局裁省減併。共洋銀四千圓有奇。合之數不及萬。均未動支。正項當此開辦之始。規模不敢過侈。俟經費稍充。再圖展拓。省外各府屬經臣分

札飭辦如甯波紹興金華湖州台州嚴州温州海甯等屬或就書院加課或設學堂專課各視經費多寡議章開辦亦均未請動公帑臣當隨時督察冀收實效將來該書院學生學業成就如有才能超異者由臣咨送總理衙門考試以備器使各府屬學生有可用之才由該府稟請調省考驗一體咨送以廣出身而資鼓勵除咨總理衙門及禮部外所有浙省專設書院兼課中西實學緣由謹會同杭州將軍臣濟祿恭摺具奏伏乞 皇上聖鑒謹 奏

請妥議科舉新章並造就通籍人才疏

頭品頂戴 兩湖總督張之洞
湖南巡撫陳寶箴

奏為恭摺迭次 諭旨變法求才擬請妥議科舉新章以覘實學而防流弊並請酌改考試詩賦小楷之法以造就通籍以後之人才恭摺仰祈 聖鑒事竊臣前准部咨光緒二十四年正月初六日欽奉上諭開經濟特科令中外大臣薦舉考試近日恭讀邸鈔四月二十三日欽奉上諭嚴殷以變法自強京外設立學堂為急又讀邸鈔五月初五日欽奉上諭於下科為始鄉會歲科各試向用四書文一律改試策論一切詳細章程該部即妥議具奏等因欽此際此時事艱危人才匱乏屢頒明詔破除成格力懲譴陋空疏之習思得體用兼備通達時務之士而任之海內士民見我 皇上處事之明決如此求才之急切如此孰不欽仰感奮竊維救時必自求人才始求才必自變科舉始四書五經道大義精炳如日

月講明五倫範圍萬世聖教之所以爲聖中華之所以爲中實在於此歷代帝王經天緯地之大政宅中馭外之遠略莫不由之國家之以四書文五經文取士大中至正無可議者也乃流失相沿官司不善奉行士林習爲庸陋不能佐國家經時濟變之用於是八股文字遂爲人所詬病今聖上斷然罷去八股不用固已足振動天下之耳目激發天下之才智特是科舉一事天下學術所繫卽爲國家治本所關若一切考試節目未能詳酌妥善誠恐未必能遽收實效而流弊所至不可勝防嘗考北宋初創爲經義取士之法體裁祇如講義文筆亦尙近雅馴明成化時始定爲八股之式行之五百年文徇俗而愈卑法積久而愈敝雖設有二場經文三場策問而主司簡率自便惟重頭場時文二三場字句無疵卽已中式遂有三場實祇一場之弊今改用策論誠足破拘攣陳腐之習矣然文章之體不正命題之例不嚴則國家重教之旨不顯取士之格不一則多士之趨向不定今廢時文者惡八股之纖巧苛瑣浮濫不能闡發聖賢之義理也非廢四書五經也若不垂爲定式恐策論發題或雜采羣經字句或兼采經史他書界限過寬則爲文者必至漫無遵守徒騁詞華行之日久必至不讀四書五經原文背道忘本此則聖教興廢中華安危之關非細故也竊以爲今日當詳議者約有數端一曰正名正其名曰四書義五經義以示復古文格大略如講義之討論經說二曰定題四書義書四書原文五經義書五經原文或全章或

數章或全節或數節或一句或數句均可不得刪改增減一字亦不得用其意而改其詞三曰正體以樸實說理明白曉暢爲貴不得塗澤浮豔作駢儷體亦不得鈎章棘句作怪澀體四曰徵實准其引徵史事博考羣書但非違悖經旨之言皆得引用凡時文向來無謂禁忌悉與蠲除五曰閑邪若周章諸子之謬論釋老二氏之妄談異域之方言報館之瑣語凡一切離經叛道之言嚴加屏黜不准闕入則八股之格式雖變而衡文之宗旨仍與清真雅正之聖訓相符顧猶有慮者文士之能講實學能治古文者不可多得改章之始恐僅能稍變八股面目仍不免以時文之陳言濫調敷衍成篇若主司仍以頭場爲重則二三場雖有博通之士依然見遺與變法之本意尙未相符若主司厭其空疏庸庸趨重二三場則首場又同虛設其詭誕浮薄務趨風氣者或又將邪說之說解釋四書五經附會聖教必致離經叛道心術不端之士雜然並進四書五經本義全失聖道既微世運愈否其始則爲惑世誣民之說其終必有犯上作亂之事其流弊尤多爲禍尤烈且明旨開特科立學堂而學堂肄業有成之士未嘗示以進身之階經濟雖併入鄉會場而未議及六科如何分考之法若非合科舉經濟學堂爲一事則以科目升者偏重於詞章仍無以救迂陋無用之弊以他途進者自外於聖道適足以爲邪說暴行之階今宜籌一體用一貫之法求才不厭其多門而學術仍歸於一是方爲中正而無弊昔朱子嘗南宋國勢微弱之際憤神州之

多難懼救世之無才。屢欲改變科舉。嘗考語類中力詆時文之弊者不一而足。而究其救科舉積弊之法。則曰更須兼他科目取人。歐陽修知諫院時。惡當時舉人剽竊盜襲。全不曉事之弊。嘗疏請改爲三場分試。隨場而去之法。每場皆有去留。頭場策論合格者。試二場。二場論合格者。試三場。其大要曰。鄙惡乖誕。以漸洗去。少而易考。不至勞昏。全不曉事之人。無由而進。其說頗切於今日之情事。朱子之擬兼他科目。猶今之特科。經濟六門也。歐陽修之欲以策論救詩賦。猶今之欲以中西經濟救時文也。又查今日定例。武科鄉會小試。騎射步射硬弓刀石。分爲三場。皆有去取。人數遞刪而遞少。技藝遞考而遞精。而磨勘之例。尤以末場弓刀爲重。竊謂宜遠師朱歐之論。近仿武科之制。擬爲先博後約。隨場去取之法。將三場先後之序互易之。而又層遞取之。大率如府縣考覆試之法。第一場試以中國史事。國朝政治論五道。此爲中學。經濟假如一省中額八十名者。頭場取八百名。中額四十名者。頭場取四百名。取額約十倍中額。卽先發榜一次。不取者罷歸。取者始准試第二場。二場試以時務策五道。專問五洲各國之政。專門之藝政。如各國地理。學校財賦。兵制商業。刑律等類。藝如格致製造。聲光化電等類。分門發題。此爲西國經濟。其雖解西法而支離狂悖。顯背聖教者。斥不取。中額八十名者。二場取二百四十名。中額四十名者。取一百二十名。大率三倍中額。再發榜一次。不取者罷歸。取者始准試第三場。三場試以四書義兩篇。五經義

一篇取其學通而不雜理純而不腐者合校三場均符始中式發榜如額磨勘之日於三場尤須從嚴如
 有四書義五經義詞理謬妄離經叛道者士子考官均行黜革如是則取入二場者必其博涉古今明習
 內政者也然恐其明於治內而闇於治外也於是更以西政西藝考之其取入三場者必其通達時務研
 求新學者也然又恐其學雖博才雖通而理解未純趨向未正也於是更以四書義五經義考之其三場
 可觀而中式者必其宗法聖賢見理純正者也大抵首場先取博學二場於博學中求通才三場於通才
 中求純正先博後約先粗後精既無迂闇庸陋之才亦無偏駁狂妄之弊三場各有取義以前兩場中西
 經濟補益之而以終場四書五經義範圍之較諸偏重首場或偏重二三場所得多矣且分場發榜則下
 第者先歸二三場卷數愈少校閱亦易寒士無候榜久羈之苦謄錄無卷多錯誤之弊主司無竭蹶草率
 之虞一舉三善人才必多而著重尤在末場猶之府縣試皆憑未覆以爲去取不愈見四書五經之重哉
 其學政歲科兩考生童均可以例推之歲科考例先試經古一場卽專以史論時務策兩門發題生員歲
 考正場原係一四書文一五經文卽改爲四書義五經義各一篇生員科考童生考試一切均同其童試
 孝經論性理論應仍其舊難者或曰主司罕通新學將如之何不知應試則艱試官則易近年上海譯論
 中外政學藝學之書不下數十種切實者亦當不少聞中例准調書據書考校似不足以窘考官且房官

中通曉時務者尙多總裁主考惟司覆闈尤非難事至外省主考學政年力多強諭旨既下以三年之功講求時務豈不足以爲衡文量才之資乎惟是變法之初兼習未久其研求時務者豈能遽造深通是宜於甄錄之時稍寬其格以示駿骨招賢之意兩科以後通才碩學自必粲然可觀且登科入仕者漸多則京外考官房官自不可勝用矣抑臣等之愚更有請者百年以來試場兼重詩賦小楷京官之用小楷者尤多士人多逾中年始成進士甫脫八股之厄又受小楷之困以至通籍廿年之侍從年逾六旬之京堂各種考試仍然不免其所謂小楷者亦不合古人書法姿媚俗書貽譏韓子挑剔破體察及秋毫且同一紅格大卷而殿試散館優拔貢朝考字體之大小不同同一白摺而朝考大考考差考御史各項字格之疏密不同紛歧煩擾各有短長詔令並無明文而朝野沿爲痼習故大學士曾國藩奏疏嘗剴切言之夫八股猶或可以覘理解之淺深詩賦則多文而少理詩賦猶可以見文詞之雅俗小楷則有藝而無文其損志氣耗目力廢學問較之八股詩賦殆有甚焉由是士氣銷磨光陰虛擲舉天下登科入仕之人才歸於疏陋軟熟以至今日遂無以紓國家之急今既罷去時文則京官考試詩賦小楷之舉亦望聖明奮然釐剔一併掃除查鄉會試之外惟殿試一場典禮至重自不可廢然臨軒發策登進賢良自宜求得正誼明道如董仲舒直言極諫如劉蕡者而用之斷不宜以小楷爲去取一經殿試

中東戰紀本末

三編卷一

請妥議科舉新章並造就通籍人才疏

即可據爲授職之等差以昭鄭重。朝考似可從省及通籍後無論翰苑部屬一應職官皆以講求實學實政爲主。凡考試文藝小楷之事斷斷必宜停免。惟當考其職業以爲進退。則已仕之人才不致以雕蟲小技困之於老死。俾得汲汲講求強國禦侮之方。此則尤切於任官修政之急務者也。至於詞章書法潤色鴻業及館閣撰述應奉文字需用此項人員之時特頒諭旨偶一行之不爲常例。略如考試南書房考試中書故事嚴則止及翰詹寬則無論翰詹部屬小京官皆可與考。視其原有階品分別授官應候請旨裁定與三年會試殿試取士之通例各不相涉。庶幾文學政事兩不相妨矣。難者又曰本朝名臣出於科舉翰林者多矣。安見時文詩賦小楷之無益不知登進貴顯限於一途固不能使賢才必出其中。抑豈能使賢才必不出其中。此乃偶然相值非時文詩賦小楷之果足以得人也。且諸名臣之學識閱歷率皆自通籍任事以後始能大進。然則中年以前神智精力銷磨於考試者不少矣。假使典試者不專以時文詩賦小楷爲去取所得名臣不更多乎。竊謂如此辦法博之以經濟約之以道德學堂有登進之路科目鮮無用之人時務無悖道之患似此切實易行流弊亦少。此舉爲造就人才之樞紐而卽爲維持人心世道之本原。臣等憂慮所及不敢不效其一得之愚。惟事體重大猶望勅下廷臣會議施行。不勝惶悚激切之至。所有擬請妥議科舉新章暨請改考試詩賦小楷之法各緣由臣等詳籌熟商意見相

同。謹會同恭摺具奏。伏乞 皇上聖鑒。謹奏。

奏陳籌辦大學堂大概情形疏

管理大學堂事務協辦大學士吏部尚書孫家鼐

奏爲籌辦大學堂大概情形恭摺具陳仰祈 聖鑒事。竊六月十七日。臣議覆五城建立中學堂小學堂一摺。奉 旨著五城御史設法勸辦。與大學堂相輔而行。用副培養人材之至意。其大學堂章程仍著孫家鼐條分縷晰。迅速妥議具奏。欽此。臣維學堂創辦之初。千端萬緒。其章程原難倉猝定議。遽臻美備。卽日本初設學堂。至今二三十年。章程幾經變易。不厭精益求精。況我 國家政令更新之始。京師首善之區。草昧經綸。動關久遠。尤須規模闊綽。條理詳備。始足開風氣而收實效。臣每日會集辦事各員。公同覈議。雖不在學堂辦事之人。臣亦多方咨訪。廣集衆思。總期受以虛心。任以實心。持以公心。矢以誠心。博取衆長。折衷一是。以仰副 皇上作育人材。振興國勢之至意。茲將現擬籌辦大概情形。分條開列。恭呈 欽定。

一、進士舉人出身之京官。擬立仕學院也。由科甲出身。中學當已通曉。其入學者。專爲習西學而來。宜聽其習西學之專門。至於中學。仍可精益求精。任其各占一門。派定功課。認真研究。每月考課。朋友講習。日久月長。其學問之淺深。造詣之進退。同堂自有定論。臣亦隨時考驗。其人品學術。分別辦理。

仕優則學以期經濟博通

一、出路宜籌也。凡學堂肄業之人，其已經授職者，由管學大臣出具考語，各就所長請旨優獎。其作為進士之學生，亦由管學大臣嚴覈品學，請旨錄用。擬採湖北巡撫譚繼洵之議，學政治者歸吏部，學商務礦務者歸戶部，學法律者歸刑部，學兵制者歸兵部，及水陸軍營學製造者歸工部，及各製造局學語言文字公法者歸總理衙門，及使館參隨終身選轉不出本衙門俾所學與所用相符，冀收實效。

一、中西學分門宜變通也。查原奏，博通學凡十門，按日分課，然門類太多，中材以下斷難兼顧。擬每門各立子目，仿專經之例，多寡聽人自認。至理學可併入經學為一門，諸子文學皆不必專立一門。子書有關政治經學者，附入專門聽其擇讀。又專門學內有兵學一門，查西國兵學別為一事，大率專隸於武備學堂。聞日本使臣問答亦云，兵學與文學不同，須另立學堂，不應入大學堂之內。擬將此門裁去，將來或另設武備學堂，應由總理衙門酌覈請旨辦理。

一、學成出身名器宜慎也。查原奏，小學中學大學堂肄業人員，卒業領憑，遞升作為生員舉人進士，在國家鼓勵人才原可不惜破格之獎。然冒濫情弊亦不可不防，似宜於鼓勵之中仍示限制，應如

何嚴定額數與認真考覈之處應照原奏會同總理衙門禮部詳擬請旨

一、編書宜慎也。查原奏內開一編譯局取各種溥通學盡人所當習者悉編爲功課書分小學中學大學三級量中人之才所能肄習者每日定爲一課謹按先聖先賢著書垂教精粗大小無所不包學者各隨其天資之高下以爲造詣之淺深萬難強而同之若以一人之私見任意刪節割裂經文士論必多不服蓋學問乃天下萬世之公理必不可以一家之學範圍天下昔宋王安石變法創爲三經新義頒行學官卒以禍宋南渡後旋即廢斥至今學者猶詬病其書可爲殷鑒巨愚以爲經書斷不可編輯仍以列聖所欽定者爲定本卽未經欽定而舊列學官者亦概不准妄行增減一字以示尊經之義此外史學諸書前人編輯頗多善本可以擇用無庸急於編纂惟有西學各書應令編譯局迅速編譯

一、西學擬設總教習也。查原奏有中總教習無西總教習立法之意原欲以中學統西學惟是聘用西人其學問太淺者無所裨益其學問較深者又不甘於小就卽如丁韋良曾在總理衙門充總教習多年今若任爲分教習則彼不願臣擬用丁韋良爲總教習專理西學仍與訂明權限其非所應辦之事概不與聞

一、專門西教習薪水宜從優也。閱日本使臣問答謂聘用上等西教習須每月六百金。然後肯來。丁韋良所言亦同。今丁韋良自以在中國日久。亟望中國振興情願。照從前同文館每月五百金之數。充大學堂西總教習。至西人分教習薪水。亦擬照原奏之數酌加。

一、膏火宜酌量變通也。臣訪詢西教習丁韋良據云。泰西大學堂來學者皆出脩脯極貧者始給紙墨。從無月給膏火辦法。蓋以圖膏火而來學者必非誠心向學。出資來學乃真有志於學者也。臣又觀總理衙門章京與日本使臣論學堂事宜問答之語。與丁韋良所言大略相同。今者國家專籌的款。不令學生出資。已屬格外之仁。似不必更糜鉅費。擬請仿西國學堂之例。不給膏火。但給獎賞。其如何發給之處。應俟開辦後詳細斟酌辦理。

以上八條。分晰臚陳。恭候訓示。此外未盡事宜。尙當查取東西洋各國學校制度。暨各省現辦學堂章程。體察情形。詳慎斟酌。一俟擬議就緒。卽當奏陳。至暫假房舍。是否由承修王大臣查勘修理。抑由內務府修理。應候欽定。惟房舍一日不交。卽學堂一日不能開辦。擬請飭催趕辦。以期早日竣工。學務得以速舉。仰慰宸廑。所有籌辦大學堂大概情形。繕摺具陳。伏乞皇上聖鑒訓示。謹奏。

遵旨詳議變通武科疏

頭品頂戴湖廣總督張之洞

奏爲變通武科。遵旨詳議。闡明舊制。酌擬新章。以防流弊。而勵將才。恭摺仰祈 聖鑒事。竊准兵部咨開。具奏變通武科一摺。並擬定大概章程十條。光緒二十四年二月二十六日。欽奉 上諭。著照該大臣等所議。鄉試自光緒二十六年庚子科爲始。會試自光緒二十七年辛丑科爲始。童試自下屆爲始。一律改試槍礮等因。欽此。又准該部咨。議覆廣西巡撫黃槐森奏。武場改試洋槍。並考取中式。分別選用一摺。令各督撫各就見聞所及。詳細奏明。並開列各項章程。報部酌辦等因。光緒二十四年三月二十八日。具奏。奉 旨依議。欽此。咨行到鄂。仰見 皇上因時制宜。請戎奮武之至意。欽佩莫名。部咨並稱。令各省體察情形。指陳利弊。各抒所見。陸續奏咨等因。竊維今日用兵。專恃火器。外洋各國槍礮之製。日而出而益精。武學教練之法。日推而益密。中國武科。取士斷宜專習火器。別定新規。然後無所習非所用之弊。惟是變法伊始。防弊宜慎。取才宜精。臣查初次部咨。會奏各條。恐器械之不能盡一也。則定指名代購之例。恐藏用之漫無限制也。則定報明有案之例。二次部咨。照廣西撫臣黃槐森原奏。洋槍由士子購買。槍桿鐫考坐姓名。防微杜漸。頗極周詳。顧臣猶有鯢鯢慮者。軍火一項。例禁甚嚴。固立法之精義。亦有國之恆規。考之東西各國。保妥之槍。遊獵之銃。皆須繳納稅捐。頒發執照。違者或科罰。或沒入。或監禁。則視其多少。而爲之差。蓋與我國舊例用意大略相同。自髮捻蕩平以來。各省遂無大亂。其實陬澨邊隅。亂萌時有。卽如

近年熱河教匪甘肅回匪亦甚披猖或兵甫集而眾降或鋒一交而敵潰實由同治初年洋槍洋礮流入中華漸推漸廣官軍所用無論精粗總係洋械火器精利聲威震響亂民無抗拒之資宵小弭蘖芽之漸今若概准演習一縣火器累百盈千收藏之家良莠不齊武生武舉本多強梁生事之徒又假以利器一有意外會匪游勇糾結橫行頃刻亂作其禍豈可勝言雖云稽察責諸地方然州縣事繁習惰不過視為查私鑄查燒鍋禁宰牛禁賭博之類但以具文行之若時常挨戶搜查則不免騷擾若但憑差役一報鄉保一結則必然有名無實即如民間私藏鳥槍州縣官例有處分而閩粵鄉鎮槍礮如林然則稽察之說豈可恃乎光緒十七年江南有查獲洋人美生私賣軍火接濟會匪謀奪鎮江以及金陵之案二十二年廣東有查獲匪徒孫文私運軍火入城為亂圖據廣州省城之案前鑒不遠豈可更揚其波且近日各國槍礮式樣日新名目繁雜同一槍礮而藥彈門類區別甚多改造原裝等差不一若應考者每人各執一式之槍如何考校高下如須同係一式私家零購則先後參差由官代購則不勝繁擾此層似多窒礙臣詳稽舊制參考新章審酌通籌謹擬一營伍學堂武科三事合一之法查原奏章程第四條云欲廣為招徠則綠營制兵防營練勇不妨准其報名鄉試又二次部咨云此次改革意在合考試與操防通融定制凡武生投營營兵應試以及武舉武進士如何教練管束各大吏當參酌營制妥籌良法各等語竊謂莫

如就此條之意而推之。查武場條例。八旗驍騎校前鋒領催等官。以及馬甲步甲。分別准應武鄉試。武童試。綠營兵丁。有願應武童試者。各歸本縣。與武童一體考試。其取進武生。准應鄉試。取中武舉。准應會試。其千把等官。或係武生。或係武舉。均分別鄉試會試。故各省向有兵童兵生名目。是武科人才。取諸旗綠。各營弁兵本係國家舊制。既以用其素習。兼以勵其勤操立法之意。至爲精切。閱達至今。於旗綠弁兵。而外。又有防營弁勇一項。比之綠營。年力人才較爲強壯。操練火器較爲熟嫻。今武科改試槍礮。莫若卽令營弁兵勇應試。最爲無患於地方。而有益於軍旅。若令應武試者。皆於武備學堂肄業一節。勢有所難。目前風氣初開。有武備學堂者。祇四五省。一省亦祇一堂。且武學教習甚難。不能不取材異地。故學堂之經費。既鉅。學生之額數無多。大率一堂不過數十人。又必須文理清通。氣習馴謹者。若各府各縣。均設學堂。一時斷無許多之經費。亦斷無許多之教習。若謂令武職教練。則中華將弁向來惟尙勇敢其精細者。不過約束紀律較爲詳明。其于火器理法。測算繪圖。工程製造。邊海形勢。罕能通曉。至文理通暢。能讀洋書者。尤不易覯。故各省大小武職。能教兵勇者。或間有之。能教將弁者。決無其人。其稍能通曉一二。能教兵勇者。卽已矜貴。非常則必留在防營。使充營官教習。豈肯令其散往各屬教授武生武童乎。是學堂之廣設。尤爲不易。至各營兵勇。究係曾經本營華洋教習教練。雖不能遽語精深。尙可得其粗淺。且外洋定

章凡入武備學堂三年者必須隨營操練一二年以增閱歷斷無學生常在營伍之外者若即令兵勇應試名籍易考鈴束易施所用槍礮發之本營自然一律擬請惟兵勇准應武童試兵勇取進武生後仍在營充伍者准應武鄉試兵勇取中武舉後仍在營充伍者准應武會試其已拔實缺外委實缺把總候補千總者准作為武生應鄉試已補實缺千總守備者准作為武舉應會試綠營弁兵令該營專管之參游都守保結冊送勇營弁勇令該管之本營管帶官保結冊送童試由各營送交原籍知府錄送學政考試免其縣考以省紛繁而免曠誤旗營仍照舊章鄉試仍由綠營勇營各營官冊送學政錄科會試仍照舊章但武弁兵勇均應照例歸原籍考試不得混考凡非在營現充武弁兵勇者均不得應武童試此後既無營外之武童自無營外之武生既無營外之武生自無營外之武舉武進士矣其從前取進中之武生武舉現未在營者准其呈請附入本省防營或學堂自備資斧隨同學習其槍礮即用本營本堂者藥彈價值由該生呈繳並仿照外洋學堂章程令其酌繳本生火食束脩雜用器具各費由該管營官及管堂之員察其年力精壯性情謹樸者方准收錄若不守規條不能勤學頑鈍難教者均隨卽斥退其學堂畢業者分發本省各營酌量委用將來風氣漸開華弁可充教習者漸多各府州縣有自行籌資設立武備學堂者准其稟官辦理既設學堂則必由官約束稽察堂中雖有槍礮可無伏戎藉寇之虞迨學成後

統發各營分別効用。則營伍學生合爲一貫。而整飭科舉。卽所以整飭營伍矣。總之非現在營伍之兵勇不准應武童試。非現在營伍之武生武舉不准應武鄉試。武會試卽例准應試之武弁若現不在營者亦不得錄送咨送鄉會試。正與部臣前奏寓營制於科舉之意相合。而其利有三。外洋火器價值甚昂。平日練習需用藥彈爲數尤鉅。若生童惜費不購。則操練無具。臨場考錄勉湊中額。仍無裨益。若各省紛紛購買。則合計所費不資。似平空增一絕大漏卮。亦爲非計。今應試取之兵勇。則操練械藥本是各營應有之需。間有願附防營專心練習者。規矩嚴肅。人數必不甚多。且所有槍礮卽由官借用。藥彈由該生繳價。是曰塞漏其利一也。我朝將材輩出。大率不外乎旗營官校。綠營弁兵。招募練勇三項。總之皆係行伍。自咸豐軍興以來。其由武舉武進士呈功著稱者。實屬寥寥。此輩恃符武斷如虎而冠。魚肉鄉民。窩庇匪盜。每遇歲試鄉試。武童武生聚集省城府城。必滋生無數事端。街市店鋪日有戒心。訛詐逞兇。防範隱忍。待至場畢。則彼此相慶。各省官商士民無不以爲巨患。萬口一辭。徒以舊例相沿。幾如附骨之疽。去之無術。究其所長者。不過粗豪膂力。倖中箭枝。不識字者十人而九。臨敵之火器既未嘗習。制勝之韜鈴更未嘗解。卽使安分守法。豈能與於干城腹心之選乎。且各省武生武童舊習騎射硬弓刀石。亦只臨場肄習數月。無論中否。過考輒已廢棄。於國家儲材禦侮之意毫不相涉。今若專令營弁兵勇就試。卽入武學登

武科以後。仍有本營長官。鈴束無從爲非。其技藝亦不至荒廢。如虜專准兵勇應試。恐武童武生必少。則又不然。一省綠營弁勇合計多者二萬以外。少則一萬五千以外。三年之內止取武生千餘名。取武舉數十名。或十人而取一。或二十人而取一。何慮不敷。且應試者果能人人皆有材藝。何在於多。如本無材藝。混場僥倖。聚衆橫行。多愈爲害。從此可爲地方暗減。此一項違法擾害之游民。此尤潛移默化之微權矣。是曰戢暴。其利二也。疇昔征討髮捻之時。各路軍營有以步卒水手不數年而保至提鎮者。海內忠勇之士。翕然向風。近年軍務敕平。保案少。則防軍之拔擢難。文法繁。則綠營之升遷尤難。雖有偉材壯志。無所得官。糧餉聊以餬口。操練視爲具文。雖經按期簡閱。空言獎勵。收效終微。蓋兵勇自視不過如擔夫匠役。食力營生。其謹愿者。僅不爲會匪地痞而已。人既卑視兵勇。兵勇因而自卑。若望其深明敵愾。同仇之大義。講求破敵致勝之方略。蓋亦難矣。今若懸此一途。以爲營弁兵勇進身之階。功名所在。則肄習自精。不待朝廷督責。將帥勸勉。而各省各營皆爲勁旅矣。是曰勵軍。其利三也。抑臣尤有進者。親上死長者。強國之本。原明恥教戰者。強兵之要術。當此豪強憑陵不已。正所謂天下危。注意將之會。近年東西洋各國精研兵事。最重武職。其國君卽服提督之服。隣國之君互相贈送。以將官之銜。故人以當兵爲榮。以從軍爲樂。以敗奔爲恥。王子之尊。下儕戍卒一隊之長。榮若登仙。凡挂名軍籍者。居鄉則威黨貴之。過市則路

人敬之以故弁兵之自愛聲名修飭行檢過於儒士中國乃有好鐵不打釘好人不當兵之諺稍有身家
戚所鄙棄貴賤之分強弱之源也夫中國所貴者士士之徒步而致公卿者多矣人之貴之蓋有由也中
國所賤者兵兵之荷戈而流爲傭丐者衆矣人之賤之固其所也卽使不終於困餓而三四十歲以外猶
爲廝養之賤卒五十歲以外始爲循資之裨將旣已純乎暮氣豈能建立奇功今欲重武厲兵而積習已
深不能驟改空言訓勉亦恐無裨惟有勵行伍以科舉之一法使其非由行伍不得科舉非由科舉不得
將官爵祿所在則豪傑爭趨流品旣殊則廉恥自立將領不肯侮辱旁人不敢輕藐從此凡爲兵勇儼然
並列士流欣然同得高第夫然後世族文儒皆肯入伍感慨漸發人人有執干戈衛社稷之心然則今日
欲求中國士氣之奮軍實之修轉移微權必在於此又臣區區之微意也綜考各國軍政有武學而無
武科其各等學堂以次考拔發營錄用卽是中武科武試從無不由學堂出身之官弁亦無不充軍營將
校之學生其法實將武營武學武科三事合而爲一其法最善故今日欲採擇西法莫如先自練兵始學
西人之練兵莫如自開兵勇之升階合學堂營伍始矣若其學習考試之法非僅改用槍礮遂能收效歷
考外洋諸國從無不讀書不明算不能繪圖之將弁亦無不識字之兵丁誠以今日戰事日精戰具日巧
卽一哨弁之微亦斷非粗材下品所能勝任若祇考槍礮準頭從容施放中靶者多殊難去取且憑此卽

授以待衛參遊都守之官似亦太易擬請仿馬步箭弓刀石武經三場之制頭場試槍礮準頭兼令演試裝拆運動之法二場試各式體操及馬上放槍步下擊刺之技三場試測繪工程臺壘鐵路地雷水雷與他戰法等學鄉會試格式宜較嚴童試格式宜較寬三場合較智勇兼優將來洊膺將領庶可勝任又考外洋兵制及武學章程初入營及未弁入學堂者多不得過二十歲蓋以年力少壯則體操及測算各事始能按程學習穎悟易通以後凡應試武童武科亦宜酌定年限卽武科從寬亦不得過二十五歲至所試之槍礮則以單響毛瑟爲主蓋此項槍彈各局多能自製礮則以單響七生半車礮及六生車礮爲主蓋此項礮用處最多而江甯局製熟鐵六生車礮一名兩磅礮成本較輕雖不如外洋之精操練亦頗可用他局仿造尙不甚難卽自江南購造亦不甚貴若本省自有七生半車礮者亦可通融學習考試通行似惟此兩種槍礮最爲適用而易得若快槍快礮過於精巧珍貴各路軍營尙且難得各省生童豈能皆習此種他日製造既廣改習亦不難也方今時際艱危宜防隱患事關變法不厭求詳臣管見所及不敢緘默是否有當恭候 聖裁其有未盡事宜自當遵照部咨陸續開單奏報所有變通武科闡明舊制酌擬新章以防流弊而勵將才緣由理合恭摺具陳伏乞 皇上聖鑒勅部核議施行謹 奏

遵議特設商務大臣及 特派近支宗室遊歷外國事宜疏 總理各國事務衙門王大臣等

奏爲遵 旨議奏事。光緒二十四年四月初四日。准軍機處鈔交侍郎榮惠奏。請特設商務大臣。及選派宗支。遊歷各國。又十二日。鈔交御史楊深秀奏。請 簡派近支。遊歷各國等語。先後奉 旨。著總理各國事務衙門。一併議奏。欽此。查閣侍郎榮惠原奏。稱中國商人經紀之術。不減東西各國。患在商情渙散。不能齊一。本有輕重。貨有良楮。價有高下。爭利傾擠。人各一心。商務所由日壞。若專派大臣。設法整頓。商務必有起色。利權漸能收回。商司販運。工司製造。工爲商源。商爲工委。工務尤爲緊要。而工務必以物產爲盈虛。物產之中。又以礦務爲先。各省礦產最多。若設立公司。逐漸開採。利源甚溥。惟開創之初。商人往往苦於貲本不足。若經商務大臣。考核詳明。不妨請發官款。嚴定章程。官商合辦。俾底於成。請 飭各省督撫。就本省三四品以上紳士。無論京外職官。但求精於權算。能知大體者。保薦數員。聽候 簡派。專辦本省商務。礦務。自能熟悉情形。考究的當。不用員役。一依經商之法。庶工商情無隔閡。上下一氣。利源必興等語。臣等查該侍郎所稱。整頓商務。以開利源。自係當務之急。礦務業經奉 旨。准各省紳商集股設法開採。至商務專派大臣督辦一節。查臣衙門於光緒二十一年十二月二十四日。議覆御史王鵬運奏。請講求商務一摺。業請於各省會。設立商務局。由各商公舉殷實穩練。素有聲望之紳士。派充局董。駐局辦事。將該省物產行情。綜其損益。逐細講求。其與洋商關涉者。如絲茶等貨。考其利病。何者可以敵洋

商何者可以廣銷路。若確有把握。准其逕稟督撫。爲之提倡。再由各府州縣。於水陸通衢。設立通商公所。各舉分董。以聯指臂。所有各該處物產價值漲落。市面消長盈虛。卽由各分董。按季呈報省局。彙總造冊。仿總稅司貿易總冊式樣。年終由督撫咨送臣衙門。以備參考。其各局所遇有稟官之事。無論大小衙門。均不得勒索規費。各局所地方長吏。月或一二至。輕騎滅從。實心諮訪。以恤商之誠。行護商之政。各等因。奏奉諭旨。飭下各省督撫遵行在案。所籌非不詳盡。夫以官府親闖之事。終多隔膜。各省商務。不由官爲設局。而聽各商公舉總董。駐局辦事。又有分董。以聯指臂。並遇事稟由督撫爲之提倡。是卽該侍郎所稱聯絡商情。上下一氣之意。似毋庸另設大員督辦。徒擁虛名。仍無實濟。爲治不在多言。顧力行何如耳。應請旨。飭下各省督撫。查照上年奏案。實力遵行。毋得虛應故事。又榮惠原奏稱。東西各國。俗尙遊歷。國王之尊。儲貳之親。往往遍遊地球。藉資閱歷。亦可爲邦交輯睦之證。滿洲王公宗室貝勒貝子。閔才偉略。必不乏人。擬請簡擇年力富強。才識通明者。輕裝減從。隨帶書記繙譯。遊歷全球各大邦。令出使各國大臣。妥爲照料。予以厚祿。凡山川風俗。政教律法。大小學堂。水陸營制。槍礮器械。礮臺戰艦。礦務工作。詳細考究。筆記成書。事竣歸國。足備任使。又御史楊深秀奏稱。三代之制。自王之世子。庶子。皆入太學。泰西猶用我經義。上自王子。旁及近親。皆先入學堂。與羣士齒。又學於兵艦。親爲水手。學於練軍。勇列卒

伍然後次第升擢。乃爲船主將校。稍長之後。必遍歷各國。或因其性之所長。入其各學。專習一業。數年而成。日本前派熾仁親王等。出遊泰西。分習諸學。故能歸而變政。克有成效。請特派近支王公之妙年。明敏有才志者。遊歷各國等語。臣等查邦交以聯絡而固。人才以歷練而成。該侍郎請派王公貝勒等出洋遊歷。以聯外交而練才識。亦係因時制宜之要。楊深秀所論各國王子近親皆先入學堂。與羣士齒。又學於兵艦。練軍由卒伍升將校。乃使之遍歷外國。增長識見。此非以無本之學爲無益之遊也。卽如日前來京之德國親王。係學堂出身。現充水師提督。精通各國語言兵法。所至之處。足令壇坫增光。今王公貝勒等。如果有留心時事。學問淹通。志趣向上者。應否由宗人府查察保薦。會同臣衙門具奏。請旨飭令出洋遊歷之處。臣等未敢擅便。所有遵議緣由。理合恭摺覆陳。伏乞 皇上聖鑒。謹 奏。

遵議遴選生徒遊學日本片

總理衙門王大臣等

再准軍機處鈔交御史楊深秀片奏。泰西各學。自政治律例。理財交涉。武備農工商務。礦務莫不有學。日本變新之始。遣聰明學生出洋學習。於泰西諸學。燦然美備。中華欲遊學易成。必自日本始。聞日本大開東方協助之會。願智吾人士。助吾自立。招我游學。供我經費。以著親好之實。經其駐使矢野文雄函告譯署。伏乞 飭下總署。速議游學日本章程。選舉貢生監之聰敏有才。年未三十者。在京師聽人報名。由譯

署給照在外。聽學政給照等因。光緒二十四年四月十三日奉 旨。著總理各國事務衙門議奏。欽此。查本年閏三月間。准日本使臣矢野文雄函稱。該國政府擬與中國倍敦友誼。藉悉中國需才孔亟。倘選派學生出洋習業。該國自應支其經費。又准該使臣來署面稱。中國如派肄業學生。陸續前往日本學堂學習。人數約以二百人爲限。經臣等備函致謝。並告以東文學堂甫經設立。俟酌妥辦法。再行函告。該使臣亦稱。須預議妥章等語。近年以來。日本講求西學大著成效。又與中國近在同洲往來甚便。既經該國函請派往遊學。臣等公同商酌。擬卽妥訂章程。將臣衙門同文館東文學生酌派數人。並咨行南北洋大臣。兩廣湖廣閩浙各督撫。就現設學堂中遴選年幼穎悟粗通東文諸生。開具銜名咨報。臣衙門知照。日本使署陸續派往。卽由出使日本大臣就近照料。無庸另派監督。各生應支薪水用項。由臣衙門核定數目。提撥專款匯交出使大臣隨時支發。該御史所請在京聽人報名。由譯署給照。在外聽學政給照。未免漫無限制。應毋庸議。所有遵議緣由。理合附片具陳。伏乞 聖鑒訓示。謹 奏。

變法自強宜謀定後動疏

督辦大學堂事務協辦大學士孫家鼐

奏爲變法自強宜通籌全局分別輕重緩急謀定後動敬陳管見仰祈 聖裁事。竊臣近日恭讀 詔書力求振作。海內臣庶莫不歡欣鼓舞。相望治安。顧今日時勢譬如人患痿痺而又虛弱醫病者必審其周

身脈絡何者宜攻何者宜補次第施治自能日起有功若急求愈病藥餌雜投病未去而元氣傷非醫之
良者也臣昔侍從 書齋曾以原任詹事府中允馮桂芬校邠廬抗議一書進呈又以安徽青陽縣知縣
湯壽潛危言進呈又以候選道鄭觀應盛世危言進呈其書皆主變法臣亦欲 皇上留心閱看採擇施
行歲月蹉跎延至今日事變愈急補救益難然卽今爲之猶愈於不爲也臣觀馮桂芬湯壽潛鄭觀應三
人之書以馮桂芬抗議爲精密然其中有可行者亦有不可行者其書板在天津廣仁堂擬請 飭下直
隸總督刷印一二千部送交軍機處再請 皇上發交部院卿寺堂司各官發到後限十日令堂司各官
將其書中某條可行某條不可行一一簽出或各註簡明論說由各堂官送還軍機處擇其簽出可行之
多者由軍機大臣進呈 御覽請 旨施行如此則變法宜民出於公論庶幾人情大順下令如流水之
源也且堂司各官簽出論說 皇上亦可借此以考其人之識見尤爲觀人之一法臣愚昧之見是否有
當伏乞 皇上聖鑒謹 奏

遵議鄉會試詳細章程疏

禮部

奏爲遵議鄉會試詳細章程恭摺仰祈 聖鑒事光緒二十四年六月初一日內閣奉 上諭張之洞陳
寶箴奏請飭妥議科舉新章一摺鄉會試改用策論前據禮部詳擬分場命題章程已依議行茲據該督

中東戰紀本末

三編卷一 遵議鄉會試詳細章程疏

八十四 廣學會校刊

等奏稱。宜合科舉經濟學堂爲一事。求才不厭多門。而學術仍歸一是。著照所擬鄉會試。仍定爲三場。第一場試中國史事。國朝政治論五道。第二場試時務策五道。專問五洲各國之政。專門之藝。第三場試四書義兩篇。五經義一篇。頭場按中額十倍錄取。二場三倍錄取。取者方許試次場。每場發榜一次。三場完竣。如額取中。至學政歲科兩考生童。亦以此例推之。先試經古一場。專以史論時務策發題。正場試四書義五經義各一篇。禮部卽通行各省一體遵照。其未盡事宜。著該部隨時妥酌具奏。欽此。欽遵。到部。臣等伏查鄉會試例分三場。本無輕重。無如考官以先入爲主。而偏護前場士子。因以速化爲心。而專講時藝。遂致揣摩剽竊。流弊日滋。而八股一道。久爲通人所詬病。前者欽奉諭旨。改試策論。茲復定爲隨場去取之法。於博學中求通才。於通才中求正士。本宋臣歐陽修之議。而黜落浮華。歸重實學。於通變因時之道。尤爲折衷。至當。洵足以轉移風氣。振起人材。惟是科場條例。頭緒紛繁。內外簾一切事宜。必須通行籌畫。方免臨事周章。臣等參酌時宜。博稽例案。謹擬詳細章程十三條。章程錄第三卷開列清單。恭呈御覽。伏候命下。分別咨行內外各衙門查照辦理。此外如尙有未盡事宜。應由各督撫隨時酌度。咨由臣部另行覈議具奏。所有遵旨妥議緣由。是否有當。伏乞皇上聖鑒訓示。遵行。爲此謹奏。

請裁鄉試算學中額片

禮部

再查光緒十三年總理各國事務衙門會同臣部奏定算學中額請由各省學政將報考算學生監於歲科試時另出題目錄取者咨送總理各國事務衙門試以格物測算諸題錄送順天鄉試每二十名取中一名等因在案現在鄉會試改試策論兼考中西經濟京師大學堂肄業生又定有以次遞升作為舉人進士之例所有順天鄉試原設算學中額擬請即行裁撤以免繁複是否有當謹附片具奏請旨

遵議山西省路礦辦法並改訂章程疏

總理衙門王大臣等

奏為遵議山西鐵路礦務辦法改訂章程請旨遵行恭摺仰祈聖鑒事光緒二十四年二月初八日准軍機處片交奉 上諭都察院奏山西官呈訴山西興辦鐵路流弊滋多請飭停辦一摺山西興辦鐵路前據該撫奏稱因所產煤鐵各礦須修鐵路方能運銷現有皖粵各紳商籌借洋款來晉開辦當經降旨允其開辦並令預防流弊酌定詳細章程奏明辦理迄今尚未奏到茲據山西官呈稱該撫竟將潞安澤州沁州平定三府一州典與洋人深堪詫異著將現辦情形及擬定章程刻日具奏原呈所指方孝傑劉鵬二員聲名甚劣均著撤退毋令與聞該省商務又左都御史徐樹銘奏山西礦務鐵路宜歸紳民自辦各節著胡聘之一併詳議具奏等因欽此是月二十四日復准軍機處鈔交山西巡撫胡聘之奏遵旨覆陳晉省鐵路礦務現辦情形分繕合同章程清單呈覽一摺奉硃批該衙門議奏單三件

中東戰紀本末

二編卷一 請裁鄉試算學中額片

八十五 廣學會校刊

併發。欽此。臣等正在核議間。復於三月初六日。准軍機處片交。御史何乃瑩奏。山西鐵路礦務。請停借洋款一摺。軍機大臣面奉 諭旨。該衙門知道。欽此。三月十四日。准軍機處片交。都察院奏。山西京官條陳。山西商務局借款章程。關繫重大。據情代奏一摺。軍機大臣面奉 諭旨。著歸入胡聘之前奏內。一併議奏。欽此。臣等當就山西巡撫胡聘之所訂合同章程。按之山西京官及徐樹銘何乃瑩陳奏各節。悉心參酌。逐條覆核。原訂借款章程。利息既重。國家應得餘利。幾同虛指。租稅課等項。概未聲叙。似於各國開礦程式。尚多遺漏。自應酌量增改。以濬利源。而山西京官原呈。謂將潞安澤州沁州平定三府一州。典與洋人徐樹銘原奏。謂將鐵軌開礦兩事。包與商人均屬言之過甚。卽山西京官二次公呈。將合同章程。逐層辯駁。亦多附會。無以折服洋人。何乃瑩奏。請停借洋款。固屬正辦。惟泰西各國。率皆經營路礦。以馴致富強。晉省煤鐵礦產之富。久爲西人所羨。若深閉固拒。轉恐利權旁落。何如豫爲之地。猶得操縱自如。現在中國商情。集股不易。僅用土法開採。實係難成。方孝傑劉鵬二員。奉 旨撤退後。義國商人羅沙第。俄國商人璞科第。卽各聳其公使。先後來臣衙門催辦。謂合同業經山西巡撫遵照奏案批准。斷難更改。並謂已各報其本國政府。往復辯論。至再至三。勢亦難於中止。臣等公同商酌。晉省路礦業經奉 旨准借洋款開辦。果將合同章程。斟酌妥善。於國於民。均有裨益。當與各該使臣訂明。事關商務。非同別項交

沙事付應選與洋商商辦使臣不必攬預以免糾葛臣等遂博攷西國礦路章程與義商羅沙第俄商璞科第將原定章程逐一增改礦章第一條原稿僅叙辦理晉省孟平澤潞等處礦務語涉含混改爲先與礦師勘定何鄉何山何種礦產繪圖貼說稟由山西巡撫查明果與地方情形無碍方准開採並添叙如係民地公平租買如係官產照該處田則加倍納賦第五條聲明所開礦地遇有墳塋祠墓必須繞越毋得發掘第六條增入所有礦產按照出井之價值百抽五作爲落地稅報効中國國家官利八釐改爲六釐公積一分改爲逐年還本仍隨本減息用本還清公積卽行停止至所餘淨利提二十五分歸中國國家餘歸公司自行分給并聲明款係商人籌借如有虧折與中國國家毫不干涉第八條添入開礦所需料件機器等物進口照開平各礦章程完納海關正稅礦產出口仍照關章納稅第十六條於租買民人已開之礦添叙不得稍有抑勒第十七條於添造支路轉運礦煤添入應訂章程屆時另議第十八條每年盈虧清冊添入各請華洋公正人一名核算無訛以符各國公司通例又鐵路合同第六條添入鐵路經過地段如係民地應向業主公平租賃如係官地應與地方官議定租價并照該處田則逐年納賦第七條聲明路成後中國於正定太原陸路兩處設關收稅與鐵路無干第十條原議每年餘利以四成歸公司二成報効國家一成歸商務局三成歸華俄銀行現改爲以二成歸商務局四成報効國家一

成歸商務局辦公之用。三成歸華俄銀行。仍聲明俟借款完清。此三成餘利銀行亦即停收。原議第十四條鐵路初成。客貨稀少。恐不敷養路之費。准於附近鐵路地方。酌開煤鐵礦數處。現今全行刪除以清界限。其餘各條亦均逐句推敲。期於妥協。并將劉鶚方孝傑所立公司名目一律刪除。統歸山西商務局主辦。俾一事權。臣等與該洋商逐細磋磨。始經定議。分繕清單。恭呈御覽。該洋商等守候日久。該國使臣屢催定議。勢難再緩。如蒙俞允。即由臣等飭令電調來京之山西商務局紳士曹中裕。與洋商羅沙第璞科第。在臣衙門畫押。以免稽延。至賈景仁被參各款。由臣等另片具覆。所有遵議山西路礦辦法緣由。理合恭摺具陳。伏乞皇上聖鑒訓示。遵行。再。此摺係總理衙門主稿。會同戶部具奏。合併聲明。謹奏。

遵旨覆陳籌造南北鐵路情形疏

督辦鐵路事宜大理寺少卿盛宣懷

奏為籌造南北鐵路。時屆年半。遵旨將辦理情形。先行奏陳。恭摺仰祈聖鑒事。竊臣恭閱邸抄。光緒二十四年五月初八日。內閣奉上諭。前因蘆漢開辦鐵路。設立招商公司。特派盛宣懷督辦。計時將及兩年。所有勘路購地各事宜。應已辦有端緒。此項鐵路關係緊要。豈容觀望遷延。現在業已籌有的款。著盛宣懷。剋日興工趕辦。並將辦理情形。先行具奏。倘再延不開辦。玩誤要工。責有攸歸。盛宣懷豈能當此重咎耶。此外粵漢甯滬各路。並著承辦各員一體迅速開辦。毋得任意遲緩。欽此。仰見聖主以幹路為

重要策勵責成嚴申訓誠俾海內咸迴視易聽曉然於朝廷先務之所急圖功之奮迅跪聆之下感悚交深伏查蘆漢幹路臣於光緒二十二年九月奉命會同直隸督臣王文韶湖廣督臣張之洞辦理是年十月陛辭出都十一月由天津航海至滬當將開辦蘆溝橋至保定府一段工程並在上海設立鐵路公司緣由先後奏報二十三年三月在漢口工次籌辦漢口迤北勘路購地各事又將幹路先後次序操縱機宜會摺密陳並請撥借官款聲明蘆保業經興築淞滬亦在開工此兩段來年均可造成九月間又將幹路由楚入豫詳勘襄樊信陽兩道比較便利會摺請旨遵行聲明北端蘆保一段土工已竣料物陸續運購到工年內外可開車運料一面派員續籌保定至正定一段買地事宜南端漢口至孝感一段已儲備木石各料墊造造橋均仰荷飭下戶部總理衙門議行在案計開辦以來一年有半臣無日不督飭華洋員司分頭勘路按圖購地請求料物催趲工作並在津漢各設鐵路專門學堂及預籌製造各廠不敢稍涉遷延今蘆保已開車運料年內全工可竣淞滬月內告成漢口滬口間外江內湖數十里工最艱鉅夏漲以前鑿石築土亦皆歲事幸與前奏均符然保定迤南溝口迤北未能兼程並進者則籌款之周折而事變之不及料也總公司原以招集商股爲歸宿但華商須待工成利見而後來臣經辦輪船電報前事不忘近如昭信股票以明詔之剴切官吏之勸諭所得者自服官之人及官力可及之

鹽當各商外。商民買票。寂乎罕聞。尤可與樂成。難與圖始之明驗。臣說帖原議。故先官款。次洋債。而商股後焉。蘆漢議准借撥部款一千萬。嗣會奏請由戶部先撥五百萬。連南北洋官款三百萬。支付蘆保淞滬漢滬三段工用。業已告罄。臣惟路工的款必資洋債。而遲速難易之權操於出借之人。且洋商與中國議借款。明餌暗索。向多以利爲誘。臣與王文韶張之洞商定。議借路款。首除斯弊。惟我既無私利之心。當多爭公中之利。彼不能挾制於後。愈不肯遷就於前。初與美商議。病其所索權利過多。繼及英商相去不遠。臣以事關數十年之利害。深慮借款吃虧。還款不易。筆禿脣焦。未敢遽定。去年冬間。馳赴武昌。與張之洞面決機宜。適有比商瑪西等介漢口。比領事就議。持向與英美力爭數大端。相要。比商皆允。如議張之洞與臣密商。比以鋼鐵工作著名。國小而無大志。借用比款。利多害少。遂舍英美而就比。兩次定約。均達天聽。至本年正月。首次交款之期。比人來滬備言。膠州之事。大局震動。且國債以鹽課釐金抵押。歸稅務司管理。於前訂之蘆漢借票。相形見絀。無人肯受。另送續約條款。要素甚多。屢駁屢改。拖延數月。至於廢約罷議。而後轉圜。逮五月初七日。始與畫押。其間委曲艱難情形。隨時皆與總理衙門王大臣及直隸湖廣督臣往返電商。迄於無可讓減。方與定議。並已會同專奏。皆在聖明洞鑒之中。比國總工程司俞貝德赴漢口查勘。已做各工。訂定頒批借款到華。卽得接續撥辦。由蘆入滬。節節前進。俟定以南迄於黃河。

比公司必須俟來年續付借款方能接造。然圈地築土皆當先期趕辦。俟續發部款到日分段購築。計約一年道工堅實。比款續到接造北段。庶幾工無停待。一氣呵成。令該總工程司另立文憑。除黃河橋工外如無意外擔攔。款不中輟。限令三年竣工。行車。粵漢一路自鄂至湘。業經督撫臣派員會同總公司派出之員前往查勘大略。並曉諭一切。惟粵省尚未准委員會勘。美款甫定草約。而西班牙開戰。美公司稍有所持。昨接駐美使臣伍廷芳來電。該公司派人過夏後來華勘估全工。須俟勘定議立正約。即可分頭開工。美國路工甲於各國。諒無耽延。滬甯一路英國工程司勘估大概將竣。正約一定。開辦必速。以今日中國之勢。借外國之款而又要之以商借。商還絕無實抵。不待智者而知其難也。紆迴年餘。鉤心鬪角。三路之款次第就範。卽三路之工操券可成。此皆仰賴國家之護持。總署王大臣之指示。非臣一人筆舌之勞所能倖致。至於造路以費省工速為主。臣初任事亦欲雇用洋工程司。任我指使而不假以事權。無如中國員司就使皆精白乃心。究竟事非諳習。華人苦工師之多方挑剔。司咎華人之辦理兩歧。常致欲速而反遲。求省而轉費。是以獨排羣議。與立約各洋商堅明約束。訂限期借用某國之款。卽訂用某國總工程司代爲營造。年限之內其事權略如海關稅務司一切。購料辦工用人理財悉資經理。仍事事預請總公司核定。而後行。此後三路同舉。合同內皆限以款到之日爲始。三年竣工。竣工前與王文韶張之洞

會奏蘆漢粵漢合爲一氣竭五六年之苦功當可使南北幹路相爲銜接以符原議等語蓋三路係分三國借款營造緊約寬期互相比較則一成而無不成也惟臣植薄能鮮憂讒畏譏雖竭盡心力而爲之恐難勝此艱鉅必需遴舉賢能各專一路之任與各國工程司按約辦理而以總公司挈其綱領綜其大成又必俟各省督撫臣體國公忠同心協力庶幾事無阻格依期戴工上紓聖人宵旰之勤下免微臣貽誤之咎大局幸甚所有籌造南北鐵路辦理情形謹先繕摺具陳伏乞皇上聖鑒訓示謹奏

請酌改兼使片

總理衙門

再查奏派出使大臣之始駐俄駐德本係各有專責奧斯馬加和蘭兩國始由駐德使臣兼領嗣於光緒十三年間臣衙門以兼駐之國宜令附近分隸以便往來因奏請以出使俄國大臣兼駐德國而以奧和兩國附之奉旨允准歷屆遵行在案現在德國既復設專使和蘭地與德近自應由出使德國大臣兼領庶於來往照料一切相宜擬請酌量更改將和蘭改隸德使其奧國仍隸俄使均甚近便理合附片陳明伏候聖鑒訓示遵行謹奏

遵議臺貨改照洋貨徵稅事宜疏

總理衙門王大臣

奏爲遵旨議奏仰祈聖鑒事竊准軍機處抄交光緒二十三年五月十八日御史張仲忻奏臺灣土

貨進口請照洋貨收稅一片。本日奉諭旨該衙門查核具奏。欽此。欽遵抄出到臣衙門。查原片內稱臺灣既歸日本。其由該處所產貨物。自應比照洋貨收稅。不得仍前辦理。擬請敕下總署轉飭稅務司。改照外洋進口稅章抽收。以裕餉源等語。臣等遵卽札飭總稅務司妥籌申復。嗣據呈稱馬關定約以後。情事改變。臺灣一處應作爲外國看待。開具洋貨土貨進出口征稅辦法四款。并聲稱此項臺貨入內地之稅單。釐卡委員以臺貨與土貨相似。不肯遵照稅單放行。應飭各釐局免征放行等因。臣等查臺灣既非內地。該處進出口貨物。非改照通商各口稅章辦理。不足以昭劃一。該御史所陳不爲無見。既據總稅務司申復各款。核與通商各口稅章辦法相同。自應查照辦理。至該總稅務司所稱臺貨與土貨相似。凡領有入內地之稅單。應飭各釐卡照章免征一節。核與領單之洋貨入內地不再重徵之章相符。亦應准如所請。以免轆轤而杜口實。如蒙俞允。應俟奉旨後。由臣衙門咨行南北洋大臣。閩浙總督。福州將軍。兩廣總督。並札行各海關道。一體遵照辦理。謹將總稅務司所擬辦法四款。辦法章程錄第二卷另繕清單。恭呈御覽。所有遵議臺灣土貨進口征稅緣由。理合恭摺復陳。伏乞皇上聖鑒。謹奏。

譯書局編纂各書請候

欽定頒發並請嚴禁悖書疏

協辦大學士吏部尙書孫家鼐

奏爲譯書局編纂各書宜由管學大臣進呈

御覽恭候

欽定再行頒發並請將悖謬之書嚴行禁止

中東戰紀本末

三編卷一

遵議臺貨改照洋貨徵稅事宜疏

八十九廣學會校刊

恭摺仰祈 聖鑒事。臣查開辦大學堂原奏第五節內云。宜在上海等處。開一編譯局。集中西通才。專司纂譯。其言中學者。薈萃經史子之精要。及與時務相關者。編之勒爲定本。請 旨頒行。各省學堂。悉遵教授。庶可以一趨向。而廣民智等語。又查原奏內云。將來學堂日有增益。而無所統轄。必至各分畛域。其弊不可不防。伏乞 皇上簡派大員。管理京師大學堂事務。卽以節制各省所設之學堂等語。是學堂教育人才。首以書籍爲要。而書籍考訂。尤不可不精。若使書中義理稍有偏歧。其關乎學術人心者。甚非淺鮮。臣觀康有爲著述。有中西學門徑七種一書。其第六種幼學通議一條。言小學教法。深合古人學記中立教之意。最爲美善。其第四種第五種春秋界說孟子界說言公羊之學。及孔子改制考。第八卷中孔子制法稱王一篇。雜引讖緯之書。影響附會。必證實孔子改制稱王而後已。言春秋既作。周統遂亡。此時王者卽是孔子。無論孔子至聖。斷無此僭亂之心。卽使後人有此推尊。亦何必以此事反覆徵引。教化天下。方今聖人在上。奮發有爲。康有爲必欲以衰周之事行之。今時竊恐以此爲教人。人存改制之心。人人謂素王可作。是學堂之設。本以教育人才。而轉以蠱惑民志。是導天下於亂也。履霜堅冰。臣實懼之一旦犯上作亂之人。起於學堂之中。臣何能當此重咎。皇上旣命臣節制各省學堂。臣以爲康有爲書中凡有關孔子改制稱王等字樣。宜明降 諭旨。亟令刪除。實於人心風俗大有關係。若夫經書之在國朝久

經列聖欽定。未可妄事改纂。若謂學者不能徧讀古人原有專經之法。至於擇其精粹者讀之。如朱子小學之例。亦無不可。總宜由管學大臣。閱過進呈。御覽欽定。發下。然後頒行。子史亦然。如此則趨向可一。民智可廣。而民心庶不至妄動矣。臣愚昧之見。謹專摺具陳。不勝戰慄屏營之至。謹奏。

敬接孫燮臣中堂繕就此疏。光緒二十四年五月二十九日具奏於朝。本日軍機大臣面奉諭旨。著孫家鼐傳知康有為遵照欽此。

遵旨明白回奏。並請斥逐居心不可問之章京疏。禮部尚書總理各國事務大臣許應騷。

奏為遵旨明白回奏事。本月初二日內閣奉 上諭。御史宋伯魯楊深秀奏。禮臣守舊迂謬。阻撓新政。一摺。著許應騷按照所參各節。明白回奏。欽此。並軍機處抄錄原奏。交出到臣。俯思躉直之招。尤仰荷聖明之洞察。許自陳達。良深感悚。謹將被參各節。為皇上縷晰言之。如原奏謂。臣腹誹。朝旨。在禮部。昌言。經濟科無益。務欲裁減其額。使得之極難。就之者寡。一節。查嚴修請設經濟科原摺。係下總署核議。臣與李鴻章等。以其因延攬人材。轉移風氣起見。當經議准。覆陳。若臣意見參差。可不隨同畫諾。何至朝旨既下。忽生腹誹。且誹存於腹。該御史奚從知之。任意捏誣。已可概見。至歲舉中額。應由臣部妥議。會同具奏。恭候 欽定。臣維事關創始。當求詳慎。自古名臣著論。斤斤以珍惜名器為要。圖況鄉舉一階。膠。

庠所重儻過爲寬取恐濫竽充數鄙夫之所喜卽志士之所羞人才何由鼓勵是以與同部諸臣熟商定額期協於中既不欲存刻核之見以從苟更不敢博寬大之名以邀譽且現未定議該御史竟謂臣務欲裁減不知何據而言向來交議事件未經覆奏以前言官不得攙越條奏今該御史隱挾成見逞臆遽陳殊非體例原奏又稱詔書關乎開新下禮部議者臣率多方阻撓一節邇來迭奉明諭如汰冗兵改武科諸政事均不隸臣部豈能越俎代謀此外惟楊深秀釐正文體一摺係奉旨交議按之西學時務無甚關涉且未擬藁何得云多方阻撓耶原奏又稱臣接見門生後輩輒痛詆西學遇有通達時務之士則疾之如讐一節竊臣世居粵嶠洋務夙所習聞數十年講求西法物色通才如熟悉洋務之葉廷眷精練槍隊之方耀善製火器之賴長均經先後奏保及中東事起三員業早凋謝未展其才臣深惜之方今時事多艱需才愈亟凡有偏長片技堪資實用者臣斷不肯失之交臂卽平日接見門生後輩無不虛衷諮訪冀有所益並最以務求實際毋尙虛華初何嘗痛詆西學該御史謂臣譬視通達時務之士似指工部主事康有爲而言蓋康有爲與臣同鄉稔知其少卽無行迨通籍旋里屢次構訟爲衆論所不容始行晉京意圖僥倖終日聯絡臺諫黃緣要津託詞西學以聳觀聽卽臣寓所亦已干謁再三臣鄙其爲人概予謝絕嗣又在臣省會館私行立會聚衆至二百餘人臣恐其滋事復爲禁止此臣修怨於康有爲之所

由來也。比者。飭令入對。卽以大用自負。向鄉人揚言及奉。旨充總理衙門章京。不無觖望。因臣在總署有堂屬之分。亟思中傷捏造。浮辭諷言。官彈劾勢所不免。前協辦大學士李鴻藻嘗謂今之以西學自炫者。絕無心得。不過藉端牟利。借徑弋名。臣素服膺其論。今康有爲逞厥橫議。廣通聲氣。襲西報之陳說。輕中朝之典章。其建言既不可行。其居心尤不可問。若非罷斥驅逐。回籍將久居總署。必刺探機密。漏言生事。長住京邸。必勾結朋黨。快意排擠。搖惑人心。混淆國事。關繫非淺。臣疾惡如讐。誠有如該御史所言者。原奏又稱。臣深惡洋務一節。臣自承乏總署。已逾一載。平日仰蒙。召對。輒以商務礦務置船置械等事。皆屬當務之急。屢陳。天聽。請次第施行。臣是否窒塞風氣。應亦難逃。聖鑒。竊自膠事定議後。總署交涉事件。益難措手。倘徒爭以口舌。斷不能弭隱患。臣望淺材庸。自揣萬難勝任。惟有仰懇。天恩。開去總署差使。俾息讒謗。而免隕越。實爲厚幸。所有微臣遵。旨明白回奏緣由。繕摺具陳。伏乞。皇上聖鑒。謹。奏。

特參黨誣熒聽之言官並瀝陳主事劣蹟疏

三品銜湖廣道監察御史文悌

奏爲言官黨庇誣罔熒聽請。旨飭查覆奏。以肅臺規。恭摺仰祈。聖鑒事。竊奴才生長滿洲舊族。誦習孔孟遺書。世受。國恩。幼承家教。惟知奉公守法。時欲報。主。捐軀。憶昔乙酉之年。在戶部郎中任時。

中東戰紀本末

三編卷一 特參黨誣熒聽之言官並瀝陳主事劣蹟疏

九十一 廣學會校刊

京察一等蒙 皇上召見於養心殿親聞 聖訓命奴才謹慎當差破除情面奴才退卽以此八字鐫刻圖章終身膺佩是以奴才蒙 恩外簡河南知府三年不受一人私書京中故舊亦皆未嘗以一字通問服官京外三十餘年從不敢沾染陋習與人結盟換帖除幼年受業同學六人外亦絕無拜上官舉主爲師頗以此取怨招尤不以爲悔蓋深懷 皇上破除情面訓辭亦由奴才四世祖鄂伯諾費揚武在康熙年間見族人鰲拜亂政伏罪因著有清文家訓今後世子孫首重寡交永戒植黨赤心報 國勒石祠堂奴才等世守之弗敢違也今者備員臺諫目覩同官中有爲人指使黨庇報復紊亂臺規者奴才於此事確有聞見謹遵 皇上破除情面訓誠縷晰陳之奴才於光緒二十四年五月初九日恭讀邸鈔見御史宋伯魯楊深秀聯銜參劾禮部尙書許應騷守舊迂謬阻撓新政及許應騷奉 旨明白回奏原摺各一件許應騷在 朝聲譽初碌碌未有奇節奴才與之向無往來晤對亦未聞其有講求舊學之名此次見其覆奏摺內所稱珍惜名器物色通才等言深合大臣之體始知該尙書立身行事自有本末轉過於奴才平日所聞至該尙書摺內所指工部主事康有爲請將其罷斥驅逐證以奴才見聞所及許應騷所言亦適相符合伏維奴才服官京外已數十年康有爲向不相識去年十二月奴才改官御史忽於今年二月間由原任大學士閻敬銘之子道員閻迺致奴才一信言有傑士康某欲訪奴才相見奴才昔在

戶部爲閭敬銘賞識天下所共知然於閭迺竹向亦不相聞問祇於去年十二月引見御史之日在朝房始一識面奴才當卽函覆閭迺竹云方今士大夫存誠踐實之時非標榜聲氣之日康某何須必相見也以阻之而康有爲仍復踵門來見奴才因與晤言接談之頃聞其議論頗多偏宕然見其激昂慷慨以爲是蓋志士憂時鬱喑激而出此雖卽以言規正之心亦喜其負氣敢任或可救今時萎靡佻倪積習不爲無用於其去後曾致閭迺竹信告以康有爲不無血性可愛惟其看天下事太易正恐不足有爲迨後康有爲數數來奴才處送奴才以所著書籍數種閱其著作以變法爲宗而尤堪駭詫者託詞孔子改制謂孔子作春秋西狩獲麟爲受命之符以春秋變周爲魯孔子當一代王者明似推崇孔教實則自申其改制之義大抵援據公羊何休學黜周王魯變周從殷之說首引董仲舒春秋繁露淮南子各書以爲佐證不知何休爲公羊罪人宋儒早經論定董仲舒本傳其所著蕃露玉杯竹林各自爲卷今本則皆在繁露一編之中故崇文書目已疑春秋繁露非董子原書程大昌攻之尤力國朝文淵閣著錄春秋繁露十七卷亦置之附錄提要謂其中無關經義者多再考漢書董仲舒本傳當時其弟子呂步舒已不知其師說以爲大愚何況數千年後士不獲親見聖人自三傳以下假託聖言以伸己說者何可勝數又焉能於蠹簡之餘盡廢羣籍而執一家之言謂獨得聖人改制之心哉至淮南子一書乃漢淮南王劉安所

著其殷變夏周變殷春秋變周三代之禮不同等言不過叛王肇亂之辭殆與漢末張角妖言蒼天已死黃天當立正同尤不可據爲典要由是奴才乃知康有爲之學術正如漢書嚴助傳所謂以春秋爲蘇秦縱橫者耳然奴才猶以爲方今時事孔棘求才未可一格譬如烏附蛇蝎皆有毒藥品然以之治風痺疾轉良於參朮著苓只在用之何如也及聆其談治術則專主西學欲將中國數千年相承大經大法一掃刮絕事事時以師法日本爲長策奴才於咸豐庚申年始年十二三歲卽留意西學故三十餘年所見泰西書籍頗多亦粗通其二十六母拼字之法及其七十課學言之訣頗有志習學其天算格致之術前者在戶部會計光緒七年出入計帳全用西洋歲計算法非絕口不談洋務者比卽近日數上奏議彈章亦曾以推廣新學爲言已在聖明洞鑒之中惟中國此日講求西法所貴使中國之人明西法爲中國用以強中國非欲將中國一切典章文物廢棄摧燒全變西法使中國之人默化潛移盡爲西洋之人然後爲強也故其事必須修明孔孟程朱四書五經小學性理諸書植爲根柢使人熟知孝弟忠信禮義廉恥綱常倫紀名教氣節以明體然後再習學外國文字言語藝術以致用則中國有一通西學之人得一人之益矣若全不講爲學爲政本末如邇來時務知新等報所論尊俠力伸民權興黨會改制度甚則欲去拜跪之禮儀廢滿漢之文字平君臣之尊卑改男女之外內直似只須中國一變而爲外洋政教風俗

即可立致富強而不知其勢小則羣起鬪爭召亂無已大則各便私利賣國何難奴才曾以此言戒勸康有爲而康有爲不知省改且更私聚數百人在輦轂之下立爲保國一會日執途人而號之曰中國必亡必亡其會規設議員立總辦收捐款竟與會匪無異以致士夫惶駭庶民搖惑私居偶語亦均曰國亡國亡可奈何設使四民解體大盜生心藉此以聚集匪徒招誘黨羽因而犯上作亂未知康有爲又何以善其後是則康有爲立會倡始名爲保國勢必亂國而後已焉奴才於其立保國會後曾又與面言恐其實生亂階令其將忠君愛國合爲一事幸勿徒欲保中國四萬萬人而置我大清國於度外而康有爲亦似悔之奴才由是不欲與之往來然仍謂其心或無佗只不過不知輕重尙未深惡其人迨後許應駟等阻其在會館聚衆又有人奏參康有爲忽到處辭行奴才處亦兩次來辭云將回里養母奴才當卽作詩送之諷以歸隱並有勸其切勿走胡走越之言不意其僞爲歸養以息譏彈而暗營保薦以邀登進乃於辭行之日忽有召見之事奴才至是始覺其詐僞多端斷乎非忠誠之士心鄙其人矣而康有爲見奴才於其賜對後絕無聞問又於四月初七日使其弟康廣仁至奴才處求見奴才未與相見爲奴才留一信云康有爲在寓患病現奉旨令其進書是時宋伯魯楊深秀等已參劾許應駟許應駟已明白回奏惟原摺邸鈔未見奴才欲知宋伯魯等所奏云何又聞康有爲奉旨進書欲知其進書之意何在


且仍欲勸其安靜勿再生事端。遂於初八日至康有爲寓所。其家人因奴才問病。引奴才至其臥室。案有洋字股信多件。不暇收拾。康有爲形色張惶。忽坐忽立。欲延奴才出坐別室。奴才隨僕。又聞其弟怨其家人不應將奴才引至其內室。奴才乃忽忽立起。惟告以中庸有云。萬物並育而不相害。道並行而不相悖。萬不可分門別戶。致成黨禍。置國事於不問。而康有爲兄弟同言。卽今在朝諸人。又何嘗以國事爲問乎。奴才仍勉以旣蒙恩命爲總署章京。則當謹慎趨公。以圖報効。康有爲言。實不能爲此奔走之差。現奉旨進書。進仍然回籍。其弟又謂奴才云。朝廷特罷制藝。何不從速。仍待下科。且生童小試。尤當速改策論。奴才見其終不可諫。乃舍之而去。初九日。遂於邸鈔中見許應騷覆奏疏言。康有爲少卽無行。通籍回里。屢次構訟。晉京後。終日聯絡臺諫。實緣要津。再三干謁。又在會館。私行立會。聚衆至二百餘人。入對奉旨。充總理衙門章京。不無期望。捏造浮詞。諷言官彈劾等情。奴才更深信康有爲不過一輕浮巧猾之徒。獨怪以閭敬銘之狷介家風。而閭迺竹何爲交結此人。且引薦至奴才處也。由是憶其曾於閨三月間。擬有摺底二件。囑奴才具奏一件。欲參廣東督撫一件。請釐正文體。更變制科。當時卽經奴才曉以科道爲朝廷耳目之官。遇事原不能不向人訪問。然必進言者自有欲言之事。參詢詳細於人。若受人指使。而條奏彈劾。是乃大干列祖列宗嚴禁。斷不敢爲。且其欲參廣東巡撫。奏中特爲清查沙田一

事而發奴才拒之尤力。至今其擬來奏底仍存奴才處。而其釐正文體一事已有楊深秀言之矣。至康廣仁所言罷制藝不必待下科小試尤宜速改策論而宋伯魯又適有此奏。是許應騤謂其聯絡臺諫誠不爲誣。又康有爲於閏三月間忽遣其門生廣東崖州舉人林纘統持其信函至奴才處求見。奴才問林纘統係會試舉人亦卽延見。乃林纘統並非來京會試。因其在崖州有聚衆州衙闕堂塞署之案。其子弟迄今仍監禁州獄。康有爲令其尋奴才爲之奏辨。時奴才正在都察院署理京畿道事務。告以如有冤抑應到院呈訴。不當在私宅商辦。乃林纘統竟於次日備辦禮物至奴才處餽送。甚至奴才幼子童奴皆有贈貽。奴才大駭。立卽驅逐之去。告以如敢再來定卽奏交刑部。林纘統去而康有爲旋來。奴才以正言責之。康有爲且言禮亦微物。係由康有爲代備。初不以爲愧怍。至今康有爲引薦林纘統申訴之信亦仍存奴才家中。是則許應騤言其構訟亦不爲無據。至康有爲兩三月中凡至奴才處十餘次。路隔重城。或且上燈後亦至。往往見其車中攜有衾枕。奴才家丁問其隨僕皆言其行蹤詭祕。恆於深夜至錫拉胡同張大人處住宿。蓋戶部侍郎張蔭桓與康有爲同縣同鄉交深情密。是則許應騤言其賁緣要津亦屬有因。若云用爲總署章京不無觖望。奴才實親聞康有爲有不能當奔走差使之言。由此觀之。則許應騤所論康有爲各節皆非揣測之辭。概可信也。總之康有爲之爲人講學如唐之李贄。干進如明之陳啟新。尤復瞻

大妄爲不安。本分性非安靜。而奴才始尙以其深通洋務不妨節取所長留爲偵探參訪之用。故兩次至其寓所。回拜十餘次。在奴才家與之晤言。雖無一次不規勸其失於其囑託。均不敢聽受。後亦明知其生事。然不欲參劾。蓋恐或阻抑朝廷破格求才之路。今見許應騷所奏。厯指其奸若終始不言。則有違皇上破除情面之訓。實甚且康有爲又曾在奴才處手書御史名單一紙。欲奴才倡首鼓動衆人伏闕痛哭。力請變法。其單內所開多臺諫中知名之人。而宋伯魯楊深秀卽在其內。後康有爲立會保國。在單之人皆不與聞。惟宋伯魯楊深秀兩次到會。列名傳布。奴才於其開單之時。卽告以言官結黨爲國朝大禁。此事萬不可行。乃楊深秀旋卽便服至奴才處。仍申康有爲之議。且奴才與楊深秀初次一晤。楊深秀竟告奴才以萬不敢出口之言。是則楊深秀爲康有爲浮詞所動。概可知也。至宋伯魯奴才未曾與之晤言。而聞其曾上設立公司之奏。亦係康有爲持此議。先尋御史黃桂鋆陳奏黃桂鋆不爲所使。竟由宋伯魯奏之以康有爲一人在京城任意妄爲。徧結言官把持國是。已足駭人聽聞。而宋伯魯楊深秀身爲臺諫公然聯名庇黨誣參朝廷大臣。夫容臺本執禮之官。宗伯以守舊爲過。一則曰重邦交。再則曰傷邦交。以今日之非禮舊制。諸臣曲全大局。正患無禦侮之才。儻使許應騷能折衝樽俎。遇事挽回。得一分卽可爲朝廷存一分國體。凡爲大清臣子。孰不喜之。奈何獨以爲罪乎。尤可怪者。原摺

竟敢擅擬以三四品京堂降調正卿于預。皇上黜陟大權實從來所未有此風。又何可長也。宋伯魯前者黨庇薛允升。今者又與楊深秀黨庇康有爲。專以報復爲得計。原摺謂可免鄰封之笑柄。以奴才觀之。御史等縱不慮天下後世笑。不知同臺中正有笑之者矣。孟子曰。國君進賢如不得已。國人皆曰不可。是康有爲也。我聖祖仁皇帝御製臺省箴曰。或藏嫌怨。謬爲雌黃。受人指囁。尤爲不減。是宋伯魯楊深秀也。奴才身沐聖朝厚恩。久存不敢避嫌遠怨之志。故於三月初一日初次封事。卽以請甄別御史爲言。今日觀此情。初亦再四躊躇。恐蹈明季科道攻訐惡習。遲遲十日不敢輕於陳奏。繼思國家變法原爲整頓國事。非欲敗壞國事。譬如人家屋宇年久失修。欹斜欲覆。勢宜改造。自應招集工匠依法拆卸。庶乎瓦木不損。終成室廬。若任三五喜事之徒。運以重椎。組以巨索。邪許一聲。曳之傾仆。而曰非此不能捷速。姑無論甄石梁棟毀折摧傷。且恐因而壓人。更何改造之有。其間稍有阻止持重者。則反加之毆詈。此何理也。今康有爲之變法。宋伯魯楊深秀之參劾。何以異。是此奴才所以終不敢已於言也。所有康有爲之爲人如是。是否可用。應如何辦理。皇上自有權衡。至宋伯魯楊深秀顯有庇黨熒聽情事。然奴才終恐啟臺諫互相攻擊之風。仍未敢擅擬其去留。可否請旨飭下都察院堂查覈該員等是否堪勝御史之任。覆奏請旨辦理。奴才爲整肅臺規起見。謹繕摺縷陳。伏乞皇上聖鑒。再康有爲歷次致奴才信。

函及所擬摺底。如有應行考覈之處。奴才當呈交都察院堂官。咨送軍機處備查。合併聲明。謹奏。
謹按。此疏既上之後。五月二十日。欽奉 上諭。御史文悌奏。言官黨庇誣罔。請旨飭查一摺。據稱。御史宋伯魯。楊深秀。前參許應騷。顯有結黨熒聽情事。恐啟臺諫攻擊之漸等語。該御史此奏。難保非受人唆使。向來臺諫結黨攻訐。各立門戶。最為惡習。該御史既稱為整肅臺規起見。何以躬自蹈此。文悌不勝御史之任。著回原衙門當差。欽此。



SURPLUS



DUPLICATE